

顺治永安县志

陈廷枢

文硕阁

wenshuoge.com

目录

关于我们	3
清顺治本目录	5
永安县旧志序	15
重修县志姓名	17
志例	18
卷一 天文志	20
卷二 地理志	21
卷三 建置志	28
卷四田赋志	42
卷五宦历志	57
卷六选举志	79
卷七人物志	99
卷八杂志	114
卷九艺文志	121
卷十题咏	152
陈邑侯重修永志跋言	173

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

清顺治本目录

重修永安县志序

重修县志姓名

志例

卷一天文志

星野

气候

节序

卷二地理志

山川

山

峰

岭

寨

石

岩

洞

溪

湖

砂

潭

卷三 建置志

疆域

沿革

坊里都图

街巷市墟

街

巷

市

墟

职制(俸粮附)

县署

行署

浮流仓

预备仓

学署

学田

社学

武署

属署

铺舍

庙坛

城池

巡警铺

演武场

贡川堡

桥渡

桥

渡

亭

卷四 田赋志

户口

土田

贡赋①

赋

贡料

贡

课程

役法①

差役

纲 银

均 徭^①

机 兵

驿 站

寺 租

水 利

官 陂

梅 溪 陂

坑 冶

屯 田

物 产(志)

分 类

卷五 宦历志

知 县

县 丞

主 簿

典 史

教 谕

训 导

巡 检

武职历官

正千户

副千户

百户

名宦

宦迹

卷六 选举志

征辟

科贡①

进士

乡举

武举

岁贡

例贡

掾仕

例官

坊表

卷七 人物志

名贤

宋

明

儒林

孝义

乡行

忠烈

元

义勇祠

贞烈

武功

中贵①

内官

仪宾

期寿

寿官

卷八杂志

祥异

丘墓

宋

明

寺观

义斋

养济院

漏泽园

仙释

卷九 艺文志

永安县治记

新建永安县儒学记

成化八年重修永安县学记

弘治十二年重修儒学记

万历二十一年①重修儒学置田记

永安县学建立乡贤名宦祀典记

栟榈书院

科甲题名记

忠洛无银矿记

安贡堡记

郭公去思碑

永怀祠记

苏近斋先生去思碑

卢侯永思碑

黄少沧先生永怀碑

唐田王庙碑

障水陂记

赖孝子传

六烈祠记

忠勇祠记

重造南塔记

鼎建孚佑广烈王庙碑记

重建北塔碑(记)

重建北塔碑(记)

张侯重建西桥记

重修贡溪浮桥碑记

禁矿祛弊记

议修县北浮桥碑记

儒学义仓记

重建邑东马陵桥记

张侯新建云龙书院记

寺僧减饷祛蠹记

严禁安沙开炉记

刘侯立田兴水利记

重建永安县治堂记

文昌、武曲两桥碑文

又文

邑侯刘重建城隍庙记

郡佐司马黄公平寇生祠记

卷十题咏

燕江十景

贡川八景

题拊桐山

拊桐山景

大湖八景

题拱极楼(二律)

题登云塔万玉轩(二律)

题高飞洗心亭

迎春日过永安，待赦先晚行遇雨(一律)

桃源洞口

拊桐书院

经桃源洞坎壁间韵

拊桐寺

桃源洞

拊桐寺

过桃源有怀李忠定公

游栢桐登桃源洞绝顶

游修竹湾登紫云低

游桃源洞

陈邑侯重修永志跋言

永安县旧志序

永安县志序

夫志，记也。昉于禹之《贡》、周之《职方》，迨班史改迁书为志，而后郡国仿之，渐以详矣。今制，寓内治各有志，而邑合于郡，郡合于藩，藩合于一统，实兼史家志传之体。一披阅而幅员之延袤块圪，疆场之夷险沃瘠，户赋之登耗，风俗之媿恶，与夫崇文经武之要，忠廉孝节之懿，彪见牖列。即二亥不能武，二酉不能藏，《齐谐》、《夷坚》不能志者，亦犁然具焉。猗欤休哉！以是知邑志乃总志之所由成，而国史之所摘采，其所系良重矣。

永安，岩邑也。其分建自景泰壬申，盖惩邓茂七之乱，而析沙、尤之壤为之县，以便治。累朝熙洽，駸駸兴起，遂颉颃剑南所辖诸部。万历壬辰岁，民望承乏兹土，入其境则山川明秀，土壤修也；莅其堂则钩矢简入，案牘清也。勉图职事，百废稍兴，独于邑志阙焉。间尝披故籍，得前令卓君所藏李、曾、林三先生志草，然中多脱遗，难卒就镵。因条上其事。会当事诸大夫軫念地方，得允可，乃諏日虔事，请乡先生之有物望者，若萧君时中、赖君万筠，而副以学博苏君日登、杨君继秀、李君南闾；编次校阅，则有若府庠余生名世、邑庠陈生自烝、林生奇嵩。又检阅库中，得所自理赎醵几九十缗，以付邑主簿夏秉彝、典史陈策经纪其费。众美咸萃，群力俱举，凡三越月，为万历甲午孟夏而抵厥成。爰进邑缙绅、青衿士、众乡父老，谓之曰：永安志，志永安者也。稽分野、叙沿革，则记之建置；表形胜、纪风俗，则记之治域；记食货则土宜贡赋详；记秩统则职官廨署备；绥文德则学校而艺文不遗；励武功则记兵防，而战绩亦附，以至备观省；昭劝戒则于名宦乡贤、高士烈女之记尤加意焉。诸君谓，永安分治，厖厖菁犷，黠固捍圉，庶其有豸乎？谓邑志创立，特饰鞶帨，为文具已乎？

夫宇宙运会，随时以庚；斡旋化理，因人而振。昔舜分冀、青为幽、并、营，广德化也。今介沙、尤而永安之，虽以惩乱，实以廓治。三代而下，户口渐盛于东南，至宋元丰，遂当天下十之五。邹、鲁既邈，而宋紫阳、龟山、豫章、延平诸君子相望以兴。永安固东南之一隅，而诸君子过化之乡也。生齿渐蕃，余休未泯，运会宜尔。民望承乏兹土，斡旋寡术，鳃鳃然虑无为之导者，假诸志以少干将隆之运，俾按尺籍而品式难逾，慕休于名宦、乡贤、高士、烈女，而憬然以兴也。又乌知紫阳、龟山、豫章、延平诸君子，不彬彬于永哉？

新岭以南，宝山以西，绵亘而环治者，今不能家喻耳提，乃精神不无有贯者，尚绎兹刻而共勛之。

万历甲午季夏之吉，永安县知县宛陵苏民望书

重修永安县志序

古之太史采十五国风以备顾问，以稽循良，史之所系岂不甚重哉！志盖一邑之史也，司是役者，必宅心卑牧，详其次第，以救流失，而后可登康阜之书。故居中驭下，用宣呈猷，唯邑令是赖。

庚寅秋，余至永邑，辄思重辑之。奈承凋敝之遗，众未安堵。惴惴兢兢，先筹所以害民者而绥定焉。宥失不经，首蒸髦誉，毋俾胥役紊纪以为民病。其有剽悍者如冯先明、姜明达等，用招抚之；逼处城邑，久踞跳梁者如渠魁曾六等，投而复叛，必尽委曲以导之；至魏老寿桀骜难驯，则国宪聿彰，又何概用宽假也。葺学宫，建粮仓，起公署，树城楼，职所应尔，敢不殚心？惶惶两年，每怀靡及，自是民心少憩。而壬辰春夏，值漳邑风鹤之警，隘谷窃发，时为民患。余思古之兵农合一之法，日简勇者练之，使相助为义。自城邑以迄乡堡，同心协力，互为声援。于是贼势渐散去，稍获宁戢。

嗟乎！应兹僻隅，荒凉草昧，御乱给需，十供八九。若必待于暇日而始裒辑故典，其可得乎？永志板失，用是惄然访之名硕孝秀，得其原本，自万历癸巳以后多阙失焉。与孝廉陈行忠、门人曾省交相考核，凡系风教者搜载义例，以补文考之所未备，此非为是编纂盛业也。盖曰端化之本，罔敢陨越以貽珥笔羞，且不愧我祖父冰玉之家乘也云尔。

顺治九年岁次壬辰冬月，赐进士第、兵部观政、文林郎、福建延平府知永安县事、辛卯本省同考 吴兴陈廷枢题

重修县志姓名

纂修总裁

知永安县吴兴陈廷枢

同纂

教谕举人莆田黄豹

训导长乐何鼎铉

永安县举人陈行忠

永安县生员曾(原文“鲁”，应为“曾”字。)省

考订

门人陈丹书 邓勳 张华 李长沐 邢正忠 陈炜

志例

一国有史，邑有志。彰善殛恶，公典也。考今时志，大都称善似过于详，恶则略而弗录，曷故哉？太史公云：“孔子著《春秋》，隐、桓之间则彰，至定、哀之际则微。志之意有由然哉！”虽然，称美而不称恶，固为雅道，或过于饰而失其实，亦岂公道乎？明有一定之公论，幽有不可欺之鬼神。滥竽斯役，慎哉！慎哉！

一自创邑一百四十年间，闻见不及者多矣。然自正德以前则林孜有手录，自嘉靖以后则李杏有志草，详略不同，典故稍备，今日岂敢妄意去取于其间哉？兹以往又三十年矣，凡所见闻，昭在心目。仍考郡之近志，博取耆耆之见闻，庶几备省览之一资也。

一天所以始事，悬象于天下，示于人吉凶，悔吝不能掩者。至其炎乡之气候不能无偏，荒徼之节序不尽淳美。若夫观天象以致修省之道，因气候以达节宣之宜，矫其俗尚之不合于礼以□之，正则存乎其人哉。

一地承天施者也，山峙川流，故形胜具而风俗成。今永以蕞尔之地，不改辟矣；一百四十年生养休息之民，不改聚矣。所恃以安静不扰，各遂其生，其惟良守牧哉。兹志地里意也。

一天地定位，圣人成能。古之圣人，曷尝不敷土便民兴事哉！兹建置所当详也。乃划其封疆，时为沿革；制乡里都市，以奠厥居；设官守分职以总政治，以揆文奋武。则师儒以隆教化，兵守以明威严。又慎其城守，险其走集，谨其堤防。或通往来，或以崇报祀。其大为庙坛、为署舍、为仓库、仪器；其细，为桥渡、为铺舍、为亭场。建置之意，盖其详哉。备录而不遗，要皆王道之大务也。

一任土作贡，从古为然。若其方物之毕陈，丁口之毕作。固上所以任乎下，下所以奉乎上，皆是物也。至于屯田、水利，亦系于土田；徭役、差使，咸趋事之大义。然人情不古，法立弊生，奸猾宿胥缘以为市，巧取巧避，上下相遁，蠹毒滋矣。因考据典则，详著颠末于篇，庶几存心民物，君子省览而知所向往。

一宦历于兹土，皆民上也。上以子视民，民亦宜以父母以报上。故有名宦祀以报功，宦绩纪以昭美。其余皆列其名籍及任之年月。

一选举有正科，有杂科。甲科、岁贡为正，例贡、掾史为杂。籍在别省者，亦书其名。例贡未授官，止书其名，掾则必授官，始入矣。至于勋移、恩典、坊表，毕录志荣也。

一人物或以耆德硕行而祀瞽宗，或以文雅奇卓而树表范，皆后人所景仰者。其或淫

雅并奏，贤不肖混淆，虽徼虚美于一时，而有愧心于百世，亦何益哉，徒滋訾议矣。至于贞烈行谊，有关于人心风俗者，何可遗也。武功贵戚皆出于地方者，何可泯也，因毕书以见谊。

一名宦祀提学熊□，出于上司之檄，郡不祀也，而县祀之。提学宗□，亦由按院檄也，郡已祀而县不祀。意者，宗尝分守延平，有惠政于地方，祀之宜也。而熊□犹祀之于县，非尊崇之，实卑褻之矣。余有疑未安焉，敢俟议礼君子改正。

一乡贤祠祀于嘉靖中年。初祀时，木主陈公瓘、邓公肃、邓公文铿。而陈公世卿，乃瓘之祖也，昔在宋，固沙之人，今其所居，则为今永安二十六都，故址存焉，丘墓在焉，子孙奉祭扫者存焉，其馀子孙居县、居乡者，何啻千百。陈公瓘不知何时去其祀，固以流寓他方，不祀亦宜，而世卿岂宜遗落？况邓公肃、邓公文铿，其出身时皆沙县人。邓公肃读书于永之栟榈山，因号焉，居址尚沙县地方也。邓公文铿所居今割永安，既祀之，而世卿独不祀，可乎？余谓乡贤宜祀陈公世卿；其邓公肃，栟榈有专祀矣，乡贤不宜又祀，以免重复。

一祥异示惩，人所创见。丘墓埋玉，设为贤淑，乃人所景仰，欲起九原而不可得者。仙释者，自是方外一等人。寺观创久亦难尽废；若养济、漏泽，亦王政之务，皆不可阙。依例书之，以备考验。

卷一 天文志

星野

自黄帝命官观天文，辨分野，以占灾祥，以斗牛之次，为星纪。春秋时，以分属吴、越，但其入分度数，代各不同。今《一统志》以起斗四度至二十二度为吴分，以牛及女一度零为越及闽、广分。则闽、广度当在牛六、七度之间。观象、玩占于此可知矣。

气候

闽僻在东南，去中州远，故其气候亦乖于中和。一岁之间，热多而寒少。大抵晴则暖，雨即凉；未春有先时之花，临冬有长青之草；高山则六月衣裘，亢旱则三冬罕雪；溪雾则昼昏而高山爽朗，山岚则日暗而平地清明。气候不同如此。

节序

元旦烧香谒神，各相拜贺，以三日为节。上元，燃灯祈禳。清明拜扫。立夏食米团。端午，插艾佩菖蒲，以角黍相馈，祀先、竞渡。中秋，醺钱赏月，家家扫墓。重阳登高，饮茱萸酒。腊月，各送牲粿，名为分年。除夕祀先，爆竹以除不祥。

卷二 地理志

山川

山

栟榈山 治北二十里，多产栟榈木，故名。宋左正言邓肃读书其中，自号栟榈居士。旧传，神仙往来其间，峰峦岩岫，不可胜数，神剏鬼划，高下相属，烟云出没无时，草木蒙茸，四时一色。宋李纲尝目为小武夷。天柱峰，与狮子岩并耸，百余丈如削；射垛峰，昔仙人射于降仙台，以此为垛，明道中，耕者常得数十石箭于台侧；观音岩，在野云洞侧，石壁万丈；集仙岩、头陀岩，昔唐裴头陀创庵，而居野云洞，云雾吐吞；降仙台，在山之上，一石高平如台，旧传仙人降此台下；石室，棋局界画分明，有黑白数子，左右有烂柯石可坐；步云台、走马埭，山绝顶宽广而斫平，相传仙人走马其上，蹄迹尚存；铜盘涧，流十余里，潞而为潭，泓亭涵碧；接仙桥、天池，在山之上广里许，澄澈不涸；金刚石、宝盖石、试剑石、天威石、乐音石，中空，扣之则响，俱栟榈之奇胜也。李纲诗曰：“栟榈百里远涉溪，水石称为小武夷。列岫笼烟红削玉，澄潭浸月碧生漪。猿猱饮水连修臂，樛木连云拥老枝。天下幽奇多僻壤，真疑造化恶人知。”又，陈侁诗曰：“昔年曾入武夷山，今日栟榈仿佛间。仙子不知何处去，漫留踪迹在尘寰。”

东山 城跨其上，县脉之所入。宜栽树，不可使童。

东华山 城中日出即见，故名。有庵，今许伦重建。

文笔山 县东南，巽位。形如卓笔，因筑寨。近修起。

金星山 县西，兑位。形如圆金，关两溪水口。

南山崎 县西南，坤位。形如大将之旗，卓然而立。

龙凤山 县西北，乾位。绵亘高大，峙于县背。

登云塔山 县南一里。□塔凌霄，与学宫对峙，旧塔被毁，知县王廷肃重建，知州萧时中为碑记。万历年间，雷火烧毁，近存塔柱；崇祯年间拆，造唐王庙砖墙。

天斗山 山高峻，顶凹下，广可五里，状如斗。山阴一石穴，名风穴；一洞，名云洞。每云冒山即雨。石窦有一石龙，界风穴、云洞之间，石磴险巖，人迹罕到，惟樵者攀缘而上，得观头角鳞介之异。上有白云庵。

庄山

大坪山 县南二十里。中有陈氏祠庵。

大龙会山 山高峻，群峰簇聚，如龙会然。二山在二十四都。

吉山 吉溪傍。

天台山 二山，县西南，二十九都。

宝山 四十都。产铁矿最佳，因名。

雪山 四十一都。通天岩侧，与狮子峰对峙。

琼山 黄甲山 白岩山 石罗山 万山中突起七大峰，次第排列。面西有洞，口可入人，深不能穷。中有灶，人传为前时避乱于此。此四大山俱四十一都。能化为人，助军破贼而不受赏。后求其处，不可得，止四山名。今四时祈祷，皆请四山之神。

马峰山 二十八都。其山圆峰插黛，旁一山似马。进士苏信居其下，因号焉。

荆山 二十六都。山如三台锡帽之状，四时青翠，有五色可爱。宋进士余授祖居，故称余荆山云。

桃源洞 在治北二十五里下，栢桐寺对岸。邑人别驾陈公源湛创自万历初年。悬岩耸削，如鬼斧神工，仰视眩人心目。高悬石壁镌“桃源洞口”四字。有仙迹，每岁一字有白苔翳之，尤为怪观。从锁洞桥入，迤迤盘折，涧水潺湲。三月桃花盛开，光景殊绝。中有闻风台、八角亭、一线天等景，历有名咏。

仙掌岩 在栢桐寺山下一里许，名曰葛里。迤迤曲折，村落自非人间。小桥流水，磅礴高下，为九姑泉，如锅样。或一里、半里为一姑。泉至九姑则岩之尽处，内为仙掌岩，为最。岩顶小筑明致庵，邑人庄氏涵元者创之。中有断桥、戏波桥、烟封、霞锁等景为胜，名人多咏及之。

修竹湾 在栢桐山之上。无岸路，惟舟可入，湾尽种竹，路突折如蛇，变幻莫侧。中有“紫云砥”，为山绝顶。俯瞰长江，萦回如带。天启丙寅，邑人饶氏子构之。

先觉窝 在修竹湾下之里许。地幽僻深窈，苔径云笼。内有八景：赤麟献书、丹凤冲霄、玉柱擎天、珠帘瀑布，及骏嘶、狮吼、斗印、试剑石，为窝中胜景，名人多有题咏。

天柱岩在栢榈山之上。削壁千寻，势若笋立，上镌“凌霄劈秀”四字，天启年间，郡司马陶公崇政先生笔。

走马岩在栢榈寺之后。万丈悬崖，顶如平地，广可里许方圆。传有神人常走马其上，至今蹄迹恍忽可得也。

凌霄塔在县北五里许。塔在层崖之巅，俯深潭百丈。下为文昌阁，创自泰昌，僧人募构。其潭为放生潭，澄澈可镜，须眉俱见。水有鱼亿万数，鼓髻冲波，捕之莫可得，疑为神物。旁有静室，为云半庵，徽衲卜筑趺坐处，竹槛蕉窗，寒梅烟柳，参差错落。望大江城郭，真如练如画，光景异常，为邑水尾福也。

峰

大秀峰 县东北，艮位。巍然秀拔群山。一名真阳山。旁有双峰，号双飞蝴蝶。

卓笔双峰

去县五里。双峰并耸如卓笔然，中有小峰，知县林孜读书其处，因号三峰。

羊角峰 二十四都。遥望如羊角然。

翠竹峰 二十六都。宋秘书少监陈世卿居其下，有师古堂焉。诗曰：“师古堂前酒一樽，共谈时事出孤村。临期上马无他祝，多买诗书教子孙。”“翠竹峰前是我家，归来重整旧生涯。烟霞尚有留人意，可奈门前驷马车。”

狮子峰 四十一都。形似狮。与雪山对。

合掌岩 在斗山上。

岭

黄田岭 二十八都。抵龙岩、大田二县界。

大望岭 二十八都。抵宁洋县界。

新岭 二十六都。上有小庵，永、沙分界。

梨子岭 三十都。抵连城界。

眼隔岭 三十二都。抵清流界。

牛岭

九龙岭 二岭，二十四都。

铁山岭 四十二都。产铁矿。

寨

清明寨 有庵。二十七都。

猫儿寨 其形高圆，似猫。二十七都。

大陶寨 即龙头寨。三十都。

石

观音石 大溪中，高耸如观音佛。百姓多往祈福。

壁石 其石大如屏壁，自山插立溪中。

岩

黄杨岩 二十五都。界永安、归化二县间。岩上多产水黄杨木，故名。又名万寿，又名麟峰。四壁如削，周回可十里，角出群山之上。三洞连属，一在淳化院寺傍。洞户空阔，秉炬而入，萦纡二里许，路狭风驶，炬遂灭，不能进。旧传有龙居其下，土人尝得齿牙骨角之类。每云气氤氲辄雨。有龙井，又有石龙，鳞爪皆具。一在岩半，名碧云。怪石仿佛如狮子。洞极幽邃，路险，人迹罕至。有穴名虚白，上通天光，有僧庐其外。一在绝顶。有石井下透两洞，深不可测。又一穴名天窗。或投以石，震响久之，其深莫测。岩之南有梅斋，东有石门岩。顶数峰突起，奇怪万状。骚人墨客题咏甚多。

永镇塔岩 县北一里。挺然特立，正当燕溪中流。上建层塔，下汇深潭，为县玄武镇山。嘉靖癸卯塔毁。

侍郎岩 黄杨岩北二里许。旧名翠云岩。宋熙、丰间，侍郎张□、祭酒杨时、司课陈瓘读书于此。不置卧榻，煮粥饮水，终岁不到岩下。其旁有观音洞，深里许，石上多观音、罗汉之像。又有石室，广可六七丈，前数十峰如卓笔。下有石鼓、试剑石。绝顶怪石罗列，好事者多采以供清玩。

黄龙岩 二十六都。

甘乳岩 二十九都。有洞，广袤约五十余丈。洞口怪石森列，有一石突出如莲花，泉自石中迸出，滴巨石上，如甘乳。人或秽器承之，泉脉即断。旁一石穴，风自穴出。昔有人秉烛入，越三日，乃及深处，闻澎湃声，心怖，即出。又一石罅，深不可测。出洞过石桥，缘小径至山顶，有小亭，名看经亭。看经亭后有小庵。前转数十步，一小洞如覆鼎，石光璀璨。洞后又一洞，名透天，相传神仙窟宅，游者必斋戒，否则辄遇怪物云。

百丈岩 县北二十里。过桥，陟石磴，岩开一洞，昔马仙姑嫂、姐妹五人升仙之处。旧传，岩巔架一扁担，被童取去。灵迹显著，四方取香火保禾者，每岁夏秋络绎不绝。四时烟云掩蔼，一开霁，香炉、狮子诸岩呈现万状，真一山中蓬壶。

莲花岩 去县五里。状如莲花。

瑞龙岩 二十四都。

通天岩 崖壁峻绝。山半一巨石，横跨如梁。由石梁行过，仅容二人闯首而入。其中夷旷，泉石幽洁。石梁后阻高山，因而为门。其山如窰，仰天而见。

苏岩 直起千余丈，土人郭氏依岩架层楼，遥望如神仙居。岩中有石龙头，吐水注石穴中，各滴乳。并近岩一池，方广可一亩，鳞类多夥，惟鲫差大。每三岁水遽红，而鱼辄死。上二岩，四十一都。

官寨岩 二十七都。旧为寨，岩石峻绝。幽花异草，四时芬馥。

寿春岩 二十七都。大湖主簿赖朝胜创立，男、主簿赖士孚重修。筑亭榭于其上，中有双龙书舍、登云阁、环翠楼。峻岩怪石，奇花异卉，不可胜纪。游玩者轻千里而至，诸名贤题咏甚多。

天宝岩 在四十一都庵坑。形如伞盖，有小庵，有大庵。庵火废而基存，甚宽敞。今移下，狭小不称矣。前对高峰，即石峰。

洞

曹岩洞 即龙水洞。二十七都。旷空可容千余人。

赫灵洞 二十九都。一名真阳洞。

云峰洞 二十四都。上坪马仙行宫，高与云齐。县之龙山。

新庵洞 百丈岩之背。洞口两壁峭立，中路如削成，而岩千状，举目应接不暇，诚一洞天也。中有黄天玄坐化处，又有大使林达祖祠。

溪

燕水溪 县北。水尾二水分流，中隔一岗，有似燕尾，因名燕溪。其源凡四派：一派西出汀之宁化县境，过清流县，下九龙，历张坊，谓之龙溪，至赖口。一派西南出汀之连城县姑田里。由湖口、洪田、吉山，谓之吉溪，至赖口合流至燕溪。一派南出漳之宁洋县分界马家山，下林田，合桂口，由黄历出车坡，至燕溪。一派东自大梅溪滌头，由梅溪、后溪直至塔下，与燕溪会流；过贡川、经沙县直入剑溪，同归于海。

吉溪 县西南一里许。

九龙溪 即清流九龙之水。惟二溪通舟楫，故纪焉。

湖

大湖 即二十七都清水塘，土人谓之湖。其水由龙溪入岩穴，伏流至此，四时不竭。

砂

安砂

三十二都。或曰聚砂成岸，春水冲激其岸不崩，故曰安。或曰以县名安，故名。

潭

石壁潭 县西。潭水沉澄碧，渔者每获巨鱼。

大陶口潭 三十都。石岩之下，深不可测。

下塔潭 燕溪水至此，萦回深蓄。

杉岭潭 县南一里三十落岭下。

百丈岩潭 石间似龙头，祷雨有应。

天台山潭 二十九都。常有云雾，祈雨响应。

南溪龙潭 源自蓬美畚出，由小涧至南溪马后。两边石壁立，中石塍横过石隙，直下三四丈。潭口狭小，中实阔大。龙居其间，人恒见之。旱甚，投鉄其间，则雨大至。

卷三 建置志

疆域

永安县，本析沙二十四都上四保及二十五、二十六、二十七、二十八、二十九、三十都、三十一、三十二都，共九都，又析尤溪之四十都、四十一、四十二、四十三都共四都为邑。自嘉靖十六年，析去四十都设大田，此分割一都之地也。隆庆六年，析二十八都二图、二十九都一图、三十都一图设宁洋。惟割图不割地，疆域紊矣。县仍从沙、尤，旧属延平郡。自县北至沙县杉口界，九十里而近；东北至尤溪四十四都，一百二十里而遥；东至大田县英果等地，百里而近；东南至大田县集贤里，一百里而遥；南至今宁洋县马峰岭界，九十里而近；西南至连城县秋家岚界，一百二十里而遥；西至清流县九龙滩界，百里遥；西北至归化叶坊、吉口二处，一百(里)而遥。县邑疆域大概如此。大抵闽地在古为荒服，与中州不同。若但计地里，而不计田数，虽古大国何以加是？要之，中间山林居其九，田亩但一分耳。分治以来，承平日久，生齿渐繁，地不足以居，田不足于食，庶而未富，方惧其将来也。

沿革

永本沙之浮流一巡司地也，沙又延平七里中之一。前代沿革，一系于郡。往牒可睹，兹以往可益乎，可损乎？其当更易者，宁洋割地，可议乎？其邑内坊、都、图沿革，另载坊、乡、里下。

坊里都图

永安之设，割沙县九都、尤溪县四都。景泰三年，分置坊一、都十三，统图六十四。成化十八年，分坊为十图。弘治五年，增坊为十二图。嘉靖十四年，析四十都隶大田县。隆庆五年，又析二十八都二图、二十九都一图、三十都一图，隶漳之宁洋县。今坊十二、都十二，统图六十三。

在城曰坊。为坊七：太平、龙兴、里仁、安仁、仁义、进贤、忠义。七坊，知县刘忠器立石。为图十二。

在乡曰都。

二十四都，为图三。九龙、黄竹坑、上坪、大松洋，距城六十里，县东。旧感义里。

二十五都，为图十。忠山、岩前、高眉坑、大源，距城八十里。

二十六都，为图十一。贡川、余荆山、大坡、小坡、冲村、瑶田、东坑，距城四十里。上二都俱县北。

二十七都，为图三。大湖、曹岩、岭后、仓坪、大梅溪、积谷寮、洛溪、张埔头，距城二十五里。县治东南北俱是。

二十八都，为图四。桂口、邢庄、西洋、林田，距城六十里，县南。上四都旧崇仁里。

二十九都，为图二。吉山、下卞、热水口、洪田、苦竹、上石、爽溪、廖地，距城六十里。

三十都，为图二。湖口、洪沙口、后澄，距城六十里。上三都旧怀恩里。

三十一都，为图二。张坊、曹远、上、下早，距城四十里。上三都俱系县西南。

三十二都，为图七。安沙，距城九十里。上二都旧善安里。

四十一都，为图三。大坵头、纳洋、龙塘、蔡洋尾，距城九十里。

四十二都，为图一。后埔、鸬鹚丘，距城一百里。

四十三都，为图三，上槐林、下槐林、西霞坂，距城一百二十里。上三都县东，旧万足里，尤溪也。

街巷市墟

街

新街(县前)，旧街(城边)，中街，后街(司前)，前街。以上俱民街。

头百街，二百街。俱尚宝坊。

三百街，四百街，六百街。俱安静坊。

五百街，九百街。俱东宁坊。

七百街，八百街，十百街。俱长乐坊。以上街在军营。

巷

衙门巷

水巷

童宅巷

后宫巷

市

安沙市三十二都。

贡川堡市二十六都。

岩前市

忠山市二市在二十五都。

墟

吉口墟

新桥墟俱二十五都。

西洋墟二十八都。

大湖墟二十七都。

洪田墟二十九都。

岭后墟在留坊。

职制(俸粮附)

知县一员。岁俸九十石，闰月加七石五斗，柴薪四名，马夫役，折支。

县丞一员。万历八年，奉文裁革。

主簿一员。岁俸六十六石，闰月加五石五斗，柴薪二名，马夫十役。顺治年间，奉文裁革。

典史一员。岁俸三十六石，柴薪一名，马夫十役。

儒学教谕一员。岁俸三十六石，闰月加三石。斋夫二名。

训导二员。每员岁俸、斋夫与教谕同。崇祯年间，奉文裁革一员。

廩膳生二十名。每名月廩一石。

增广生二十名。

(附：学生今百有奇)(原文缺学生数字。)

司吏一名。

安砂镇巡检司、湖口寨巡检司各一员。每员月俸五石。

司吏一人。

阴阳学训术一人。

医学训术一人。

僧会、道会司各一人。

县司吏六名。

典吏一十四名。

铺长一名。

架阁书吏一名。每岁共支本色米三十四石二斗。

正统十四年，调邵武卫后千户所军置永安守御。千户所正千户原二员，今一员。每员岁俸一百九十二石。今裁革。

副千户原二员，今一员。每员岁俸一百六十八石，今裁革。

百户原十员，后无继七员，调卫二员，今一员。每员岁俸一百二十石。今裁革。

典吏一名。今裁革。

旗军原一千一百二十四名。今裁革。

操练共三百九十六名。今裁革。

县署

永安县，景泰三年九月开县，本府抚民通判倪冕创立小屋三间莅事。四年冬，本县知县韩隆创正厅三间，后堂三间。设幕厅于正堂之左，库房于正堂之右。东、西两廊分列六房，中道戒石亭。仪门三间，于正厅之前。樵楼五间，于仪门之外。知县廨舍于正厅之北，川堂于正厅之后。左、右立县丞、主簿廨舍二所。东南立典史廨舍一所，设吏舍于六房之后。建土神庙于仪门之左。立牢房于仪门之右，周围墙垣。万历十五年，知县傅本智改戒石亭为坊，堪舆谓高压正堂。二十一年，知县苏民望见县前逼窄，捐俸召匠计之。后建戒石亭，徙其坊于县之对街，题曰“保障群黎”。坊之内三向各建悬榜廊，改申明、旌善二亭于樵楼之左右。巡捕、主簿夏秉彝于县之东、西设立栅门，曰东关，曰西关。夜加扃固，以防不虞。

行署

建南道分司旧有上、下分司，在县治北。下司已废。嘉靖己未年，官卖二司。景泰五年，本府通判杨季奇创。万历二十一年，知县苏民望重整。

顺治四年丁亥，寇乱拆毁，丘墟。知县陈廷枢因上司往来，借居民房不便申请，顺治四年，分已征未给工食奉赦银两，另新架造。

府馆在县治前。

贡川公馆二十六都。

忠山公馆二十五都。

东洋公馆二十八都。旧址官卖，今别建。

浮流仓

在县之北城内，旧仓公厂高阜，即洪水所不能及。丁亥冬，山寇破城，拆毁。特画

，且工费浩繁，难以蹴捐。知县陈廷枢谋所以储粮处，不得已，捐资买民房一所，暂置仓屋于县西衙空地。未一月落成，宏固可观。此不得已之苦心，亦权宜之计策也。

预备仓

县秋冬赃罚谷，上仓备赈。丁亥寇毁，未架。

学署

在县治东。景泰五年建，正德四年毁。知县刘灿重建，事载祭酒蔡清记。嘉靖二十一年，知县裴建修之。万历二十一年秋，知县苏民望到任。期年，环视学宫倾圯，楹瓦不全，泮池如矩而非制，棂星直出而不收。进诸生而言曰：“吾力能办之。”即毅然以兴起斯文为己任。措处罚鍰□□两(原文缺罚鍰的数字。)，不足，又捐俸补助。朽者易之以新，漏者补之以全。庙庑为先，移棂门进五丈，填泮池一丈，为半壁之形。明伦堂、尊经阁、斋宇，以次修理，开扩隔道之路，徙儒学门五丈。百尔维新，焕然改观。宫墙之富，宗庙之美，可以想见阙里矣。适建南道吴璘以巡历至，深嘉而乐与之。是役也，不三月而告成。费出于县，分毫无损于民。经营不懈者为典史陈策，督工颇有劳者为耆民邢存志、饶师生。请太史翁正春为之记，见《艺文》。

明伦堂在先师庙后。

居仁斋由义斋翼明伦堂之左、右。

号房在东、西庑之后，凡二十间。

饌堂在号房之上，左、右各二间。

御制卧碑在明伦堂左上。

敬一亭在启圣祠之左。

尊经阁在明伦堂后。

典籍《大狩龙飞录》、《大明律》、《洪武正韵》、《御制大诰》、《大明会典》、《大学衍义》、《四书集注》、《五经集注》、《四书大全》、《五经大全》、《礼教仪节》、《为善阴隲》、《三儒类要》、《文章正宗》、《孝顺事实》、《性理》、《通鉴》、《纲目》。丁亥寇乱，无存。

射圃旧址在县治北门外，演武亭左。嘉靖三十五年漂于水。

儒学门在棣星门左。崇祯间，知县刘胤倡首重葺。丁亥冬折损，惟明伦堂特甚。知县陈廷枢甫下车便兴学校，捐俸馀，会学博徐鸿、何鼎铉谋复修之。首文庙及明伦堂两庑。增损泮池，新架三门等项，栋宇一新。此陈公樸械之遗也。

教谕衙一在明伦堂左，从居仁斋入；一在明伦堂右，从由义斋入。右者颓坏，训导朱钟借居尊经阁，至今仍之。

学仓在教谕衙之左。

祭器库在东饌堂之上。

祭器木香炉、大铁香炉、烛台、铜酒樽、铁香炉、花瓶、铜盆、铜爵、筴、簠、俎、铁盆、牺尊、牲匣、铏、簋、豆。

学田

知县苏民望适下车，见师长之出入无舆，又非产马之地；诸生中多有贫不能葬，身无完衣，长无家室者，慨然叹曰：“此有司之责也。尊师重道之谓何？随吾力之所及何如耳。”万历癸巳岁，偶清欺隐罚鍰二百八十七两八钱四分，又凑赎十二两一钱六分，申合上司，置买学田以贍师儒。设学百四十年，所创见者留心学校，良亦勤矣。今载其田亩，并经用式于下，以备稽考。

一买得二十五都民人姜钦米田三段，用银三百两。约正杨教为中。

一段土名寺前、罗里坑二处，米三十九石五斗，外租五斗，外冬米。

一段土名寺前坂，米十六石，外冬米。

一段土名桥尾墩后，米十石。

一查出永留庵田十六石。

社学

一在儒学前，一在县治北门内。嘉靖三十五年，署县事、延平府通判谢承志改此社学为四贤书院，祀杨、罗、李、朱四先贤。

武署

永安千户所在县学后。景泰三年，延平卫指挥韩瑄建。正堂三间，中阶为屏门，东、西两旁有千百户。厅久废。大门三间，万历三年，副千户陈瀚重建。

吏目厅在正堂之东。后厅五间。

旗纛庙三间，在所署后。

镇抚司在旗纛庙东。

武备库在旗纛庙东。现贮堪用军器三万二千一十六件。

军器局在军营后山。

属署

安沙镇巡检司在县治西八十里三十二都。

湖口寨巡检司在县治西一百二十里三十都。与连城、龙岩、宁洋三县界。俱正统五年设。

镇堡公寓在县治北贡川堡。

税课局旧志载在县治西七十步。官未设舍宇，未创基址，今莫之考。

阴阳学在县治左。万历十八年，训术萧相汉请县增广土神庙后六间为廨舍。

医学在县治左。

铺舍

县前铺在县治东侧。司一名，兵四名。

黄坊铺在二十七都，去县治二十里。

贡川铺在二十六都，去县治四十里。

张关铺在二十五都，去县治六十里。

新岭铺在二十五都，去县治八十里。以上三铺，司一名，兵三名。在县治之北。

桂口铺去在县治三十里。

林田铺去县治六十里。以上二铺，司一名，兵一名。

东洋铺去县治六十里，兵止一名。以上三铺俱在县治南二十八都。

庙坛

先师庙两庑戟门棂星门

启圣公祠在先师庙之右。

名宦祠在戟门左。祀故督学熊汲、知县邓概、知县刘灿。

乡贤祠在戟门右。祀宋陈瓘、邓肃，明邓文铿、陈隆、林腾蛟、李杏、赖孺(疑为“赖豫”之误，见卷七《人物志·孝义》。)、陈源湛、严九岳、罗明祖。

社稷坛在县治西门外一里许斋所。隆庆五年，知县许培之建。

山川坛在县治南门外。

邑厉坛在县治北门外。

城隍庙在县治东，儒学之左。门廊颓坏，万历十五年，邑民陈真焕新之。崇祯间，知县刘胤重架后宫，并造砖墙一完。

唐田王庙在县治南门外。祀唐李肃，字行，陈州人。唐世以功封田王，建立庙。天子幸奉天关，叛将牛氏乘中原多事，闭关窃据。及朱泚平，天子赐王弓矢，命曰：“闽粤弗庭，汝往征之。”王率精锐数万，至临汀浮流口，猝与贼遇。后兵不继，王力战而死。尸浮水上，弥月不变。乡民詹纠殓而祀之。凡有祷辄应。贞元间，有司以闻，敕封孚佑广烈王。以妃陈氏配享，从以五神，曰胡、曰陈、曰周、曰张、曰汤，皆裨将也。

童公营在二十七都桂溪地方。公，沁州人，名御仔。于后秦甲戌年入闽，征寇有功，至桂溪身歿，乡人即全躯祀之。唐中统五年，帝敕旨封为护国佑民，开基土主童侯之神，妻曾氏亦封夫人。

晏公庙在县治北门内。

英烈王庙在北门就外，旧名龟山庙。高阜如龟，合抱樟木数十根。丙辰，大水漂流，今改新地万历年间，苏民望栽插松树遮荫，通邑风水。

关王庙在县治东安静坊。

名山庙在贡川。

神山庙在所后牛湾巷。

四贤书院祀吾延平杨、罗、李、朱四先贤。旧址在县治北门外。嘉靖三十五年，漂于水。署县事延平府通判谢承志改北社学为之。万历八年，奉勘合毁卖，暂迁神主于英烈庙之侧。十一年，续奉勘合，凡天下书院毁者，俱准复立，而此地今犹未复也。

栢榈书院宋左正言邓栢榈先生读书处也。知县郭仁建于屏岩下。嘉靖四十六年，知县卓光谟改在栢榈寺左旁。

忠勇祠在二十八都邢庄。祀阵亡邢志宏、邢宗善、邢仲卿、邢景清、邢必崇。嘉靖间建邑，进士林腾蛟记。

姚公祠在县治北门外永济桥头。祀故知县姚仲韶。嘉靖间，邑民建。

六烈祠在贡川。祀烈女邓氏、陈氏、邓氏、刘氏、姜氏、林尾姑。隆庆间，知县许培之建，武平僉事毛为光记。

永怀祠在贡川。祀知府周贤宣。本乡人建，僉事李杏记。

刘公祠在县治北武曲桥头。为知县刘胤建桥立。

纹山祠在贡川堡内。祀乡贤罗明祖。其子罗艰建，辛未进士陈道晖记。

城池

永安自正统十四年沙寇邓茂七平，都督范雄奏请于沙、尤二县界筑城。周围五里，三十二步为门，曰东门、曰南门、曰西门、曰北门、又曰小水门。自东抵北，自北抵西，皆负山阻溪，濠塹无事开凿。独南门外系平地，凿地注水以为池。今架屋其上，诚恐失没。窝铺十六处，绕列各门。永之隍壖，亦可谓截然完固矣。

四门城楼。南楼因乱折损大半，顺治八年重修；西楼尽行烧毁无存，顺治八年全新架造；北楼角几颓，顺治九年整复；东楼乱毁，以守御急暂造屋数间，以避风雨。皆知县陈廷枢之力也。

巡警铺

民市八坊，军营四坊，各有小铺。向年巡逻，民任其劳，近奉宪令，兵丁巡警，百姓免役。

演武场

在县治北。其地平旷，周围可百数丈。嘉靖三十五年，为洪水致圯十之一二。万历十四年，有请迁之东漏泽园者。时本府推官卢泮署邑，亲视其地，见枯骨坻坻数千，固不允，莫若旧址为善。乃令军人运北桥废石，益加砌固。二十一年，知县苏民望又为之重建厅亭，于是永可训练矣。

贡川堡

贡川距邑四十里。嘉靖三十六年、七年，广贼入境，烧劫俘戮，民汹汹无宁日。上司行示村落筑堡自卫，贡川遗民谋派筑堡，请诸抚按本道，报曰可。下本府议，本府知府委官督造。广六百二十三丈，高二丈四尺。乡人德之，立祠尸祝。堡记载《艺文志》。

桥渡

桥

武陵桥东门外。原名马陵，系马仙家之陵。屡经洪水，邑桥惟此独存，若有神呵护之。

广宁桥西门外。旧系李仁、黄琦、赖宗杰募众建立，后系黄仙佑重建。今火，烧毁。

永济桥县北。往府通衢。先吴应、赖宗杰募众，嘉靖间，知县姚仲韶重建。丙辰，大水漂去。

城北石桥学正林凤仪运大石为梁。今坏。

中村桥二十六都。

建安桥二十五都。

会清桥贡川堡。

延寿桥即大坡桥。民人张良建。上二桥二十六都。

安定桥民人陈真焕重建。

坡角桥益溪。

拼榈口桥

德星桥

忠善桥

集福桥

永镇桥

龙凤桥上五桥俱二十七都岭后。

桂口桥

西洋桥

邢庄桥

盈丰桥小螺。已上四桥俱二十八都。

洪田桥二十九都。

生卿桥二十九都。刘宗基建。

福溪桥三十一都。

杨梅桥四十一都。

溢洋桥四十一都。

广平桥四十二都。

蓬仙桥二十八都。

渡

浮流口渡原民人杨彦诚、彦祥置田造舟以济。万历间，知县傅本智创建浮桥，民利赖之。知县苏民望鼎新重建。

下渡北桥下。

益口渡二十七都。乡人饶觉灵置田给舟。立祠在焉。

固发口渡贡川。今作浮桥。

小练渡

上国塢渡

下广渡军人吴永祥置田立渡。

上石舡渡民人赖鼐置田立渡。今移苦竹。

上板桥渡已上五渡俱二十九都。

大淘口渡

小陶口渡二渡，三十都。

流坑渡二十七都。乡人赖万四置田立渡。

东关渡二十五都。乡人萧宪置田立渡。

曹远渡张绸置田立渡。

亭

洗心亭在高飞寺后。知县郭仁建，为讲学之所。

永思亭在县治北。万历八年，为署印推官卢泮亲供报田之法，深救丈量之弊，永民德之，故立碑焉。

永怀亭为署印训导黄鏊重慎赋役，令各图自派，深救派粮之弊，士民立碑以志思焉。

卷四田赋志

户口

景泰三年，沙县、尤溪县割来户八千二百四十，人丁共一万三千一百六十六丁，女口共一万六千四百七十四口。

嘉靖十六年，割去大田县户一百四十九，口七百三十四。

嘉靖四十一年，户八千一百有一，口二万九千二百四十三。

隆庆五年，割去宁洋县户三百七十，口一千三百八十九。实在户七千七百二十二，口二万七千八百五十四。

万历二十年，户七千七百二十二，口二万七千八百五十四。

土田

土田之目有二，曰官田，曰民田。官粮二则，三斗五升则，七斗则；民粮五升则。丈量后，官、民粮一例依则摊派。

景泰三年，沙县、尤溪县割来官米三千一百六十二石七斗七升三勺三抄，额派京库折色银八百五十二两五钱五分零。民米三千六百九十六石一斗三升四勺三抄，并丁口额派京司府三库银四百五十两八分九厘。

埋没田米七十二石。

鱼课米一千六十六石九合四勺。派司库银三百七十三两一钱三厘三毫。

鱼米九十石零。

成化八年册至弘治五年，官田七十八顷八十二亩五分八厘五毫；民田八百三十四顷六十七亩七分三厘。

地，六十五亩四厘；山，二亩三分二厘；园，五十八亩一分；池，三十九顷三十七亩三分七厘。

嘉靖十六年，分去大田县官米二则，七斗则，官米七十四石五斗六升九合一勺；七斗则，官米二石五斗三合。民米，一百二十八石三斗三升三合八勺。

隆庆六年，分去宁洋县官米二则，三斗五升则，官米五十七石五斗八升三合五抄七撮三圭二粟一粒；三斗则，官米四十石二斗六升四合四勺五撮二圭二粟五粒四黍。民米，一百七十五石八斗六升九合一勺九抄二撮四圭四粟。池米四十三石六斗八升三合。

万历七年，奉文清丈。原额官、民田，池，地，九百顷三十二亩零七毫六丝九忽。内官米三千六十六石三斗一合六勺四抄九撮七圭四粒，民米四千四百一十石四斗五升三合八勺七抄八撮八圭一粟，池米原额一千一百六十七石一斗六升二勺，外将船料射派米三百二十四石七产吉二升六合。共成课米一千四百九十一石九斗二升六勺一抄三撮。

万历十五年，亲供报田，依清丈原额，折净上则田地八百九十九顷二十九亩一分二厘二毫。据报，田地租米一十三万四千二百六十三石五斗五合，租谷一十九万七千五百四十四石九斗四升六合。照原额亩数分折，亩田地租米该二石五斗九升一合三勺二抄五撮，租谷五石一斗八升二合六勺五抄为一亩。每亩依额派苗四升九合二抄一撮六圭一粟五粒。派足原额，官民正耗米四千四百八石四斗七升七勺一抄五撮八圭一粟四黍。又依清丈原额，鱼池三十四顷五十九亩五分五毫。据报，池租米三千七百一十四石二斗一升，池置谷一万一千三百六十九石九升一合。依额派亩数分租，折亩池租米二石七斗一升六合八勺，池租谷该五石四斗三升三合六勺为一亩。每亩仍依原派米三斗三升七合三勺七抄七撮七圭一粟九粒。派足原额，鱼池米一千一百六十七石一斗六升二勺。

万历二十一年册：官、民田地九百顷四十五亩一分九厘五毫八丝六忽，内新增续报米一顷一十六亩七厘三毫八丝六忽。官米三千六十八石九斗二合九勺九抄八撮六圭七粟七粒五黍，民米四千四百一十四石一斗九升五合六勺九抄五撮七圭九粟八粒五黍。

丈量为浮粮。初，法非不善也。然委手足于群小，寄耳目于算手，三则混加，弓手伸缩，移形换段，倏忽如鬼。册书受赂以减则，豪强阡陌而隐半，瘠田以步广多科，腴田以滑计少粮。及册入总书之手，科亩数足随都图，公然售卖，并其丈册而没之。是奸书视丈为奇货，百姓因丈而破家。不均不平，棍徒蠹兴。执减、漏、欺、隐四字，骗害乡村，滥及无田之家。人无月粮，十室九空，村落萧条，莫甚于此。谚云：“田经丈量，耕不充肠。”盖病之也。署印推官卢公泮，灼知二十八宿以欺隐蚕骗良民。辗转告害，莫可穷极，博访父老，乃创为亲供报田之法，条陈两院、道府，详允清查。所委主簿薛伸精于科算，不二月册成亩定，一邑称平。不止救丈量之弊，其法简易，可行于百世。百姓请侍郎陈公省为记，以纪去思。然法立弊生，有一二法外遗奸，将米作谷。但额足赋输，尚有可原。孰有如沙人丢却寄庄户租米谷四千余石而不报，且并户而脱去。论者谓永不失额，报此徒增额数。此目前苟安之见。不知额固不可增，不报实有害于永。他日永人无知，贪买此田，沙人必载

沙粮米税苗八升二石，谷税苗四升二石。以永田而受沙粮，以沙粮而射永田，其不因田而坐困者几希。又有田在封内三图，半隐射于宁洋三都，以辽远而推于大田、尤溪。卖主系归化人，田却在永，近地则推之于归化而不报。此四边之民，丈量则射之而不丈，报田则隐之而不报。薛主簿以行迫位卑，莫竟其事。然隐册尚存，今也不必借口通县使心思耳目不能周，徒滋劳扰，不必履亩，茫茫无下手处，使重困之民益增惊畏。惟据其隐册，召佃一审，多方查实。在沙人隐者，申之院道，责令照旧立寄庄户收科。在永民而推射四县者，科归本户。俾通县均匀减派，受一分之赐。庶田正赋均，棍恶自息，民病可瘳耳。

今奉文清丈。前朝薛主簿疏贴，为法甚良。现在搜索旧贴给换，缺者补之。

鱼池课米一千四百九十五石四斗九升一合二勺五抄四撮，有闰，课米一千六百二十石二斗三升七勺六抄五撮。

鱼池课米原额一千一百六十七石一斗六升二勺，即亲供报田册亦依此额，今沿。丈量后，以缸料酒派，多米三百二十四石七斗二升六合。夫船户之料，犹之匠户之价也。定于国制，非百姓得以擅移。今查缸料三千九百六十九料四分五厘，每料派银二分二厘，共该银八十七两三钱一分九厘。又船一百二十只，可以派之于鱼课米内，公然溢额而不之顾，恐人讦发，又从而撒之于车碓。则一百二十名之匠户，他日亦可推丁尽户绝而派之于民米。此系奸里大半买其田，而射其料。背又从而私科于料户，非奉明文明属挪移酒派。今志于此，以俟改正。

贡赋①

(注释：①该标题为编者所加，以与目录对应。)

赋

官米三千六十八石九斗二合九勺九抄八撮六圭七粟七粒五黍。)今额官米三千九十七石五斗八升二合五勺七抄五撮。每石派折银三钱八厘九毫五丝四忽三微六纤二渺五尘，共银九百四十八两一钱五分九毫六丝九忽微四纤。内起运京库金花折色正价银七百七十四两四钱九分七厘四毫五丝，杠索银一十一两六钱一分七厘四毫五丝九忽。甲丁二库折料正价银三十二两二钱二分五厘七毫八丝，水脚银六两四钱四分五厘七毫八丝。今额解正价银二十四两二钱三分一厘，铺垫银五两三钱八分四厘，水脚银四两八钱四分六厘二毫。外官剩银，拨入民折内凑解司备饷。

民米四千四百一十四石一斗九升五合六勺九抄五撮一圭九粟八粒□黍。今额民米四千四百五十五石四斗四升七合四抄六撮，存留半纳本县浮流仓本色米一行八百一十二石三升五合三勺五抄七撮九圭五粒，给县所官吏、旗、军人等俸粮。

今额遵经制，解省米八百石，余米征完，给发防守官兵月粮。

本县儒学仓本色米三百五十八石八斗。每石派银七钱，共学粮银二百五十一两一钱六分，给师生俸廩。今额除留给俸廩外，近奉文拨银一十两三钱五分一厘九毫八丝七忽二微解府，凑给官俸。又拨银二十四两三钱四分六厘六毫八丝，解匀给各卫、所，进表、霜降等用。仓剩米二十石一斗六勺三抄九撮九圭九粟四粒二黍，共银一十一两八分九厘四毫五丝一忽九微九纤六秒八尘一埃，解司备饷。

今额解仓剩改折备饷银二十二两四钱三分三厘五毫，折色米二千八十石三斗八升六合九勺五抄二撮五圭五粟五粒，共折价银一千四十两一钱九分三厘四毫七丝六忽三微二纤七渺五尘，支給官库俸粮。

今额解折价改充兵饷银六百五十四两一钱四分三厘四毫七丝六忽三微二纤七渺。仓剩折价备饷银三百两，留给官俸银八十六两一分。

仓剩备饷米八十四石八斗六升二合三勺一抄九撮五圭，共折银四十二两四钱三分一厘一毫五丝九忽七微五纤，解司饷。

解司备用银一百四十八两四钱四分九厘一毫四丝八忽三微一纤二秒，解司备饷。官剩银凑在内。

今额解粮剩银一百六十七两六钱七分二厘六毫。

贡料

合籍丁苗之入而派之贡，以上供，名之曰贡料。

粮单额派料钞银一千一百五十二两六钱一分八厘七毫九丝三忽一微。实在人丁一万三千一百四十八丁，民米四千四百一十四石一斗九升五合六勺九抄五撮七圭九粟八粒五黍。

今额民米四千四百五十五石四斗四升七合四抄六撮。

每丁石派银六分五厘六毫三丝六微七纤七渺，共料钞银一千一百五十二两六钱一分八厘七毫九丝三忽一微。内起运折色民弓、弦、箭料，正价银一百七十八两六钱八分二厘，水脚银二两八钱五分八厘九毫一丝二忽。

今额正价银一百五十二两二钱七分七毫，水脚银二十九两二钱七分二毫。

本色军器民料，正价银二百六两三钱一分六厘五毫，水脚银三十九两八钱三分三厘八毫。

折色军器民料，正价银二百六两三钱一分六厘五毫，水脚银三两三钱一厘六毫四忽。

今额解本色民办军器正价银四百六十八两七钱四分二厘六毫，水脚银八十九两六钱八厘一毫。

营、都、屯三司料正价银三百四十三两五分，水脚银五两四钱八分八厘八毫。

抵解农桑夏税绢，正价银一十两六钱六分九厘五毫三丝一忽二微五纤，水脚银四钱五分七厘五毫。

存留抵捕无征司库，钞银九钱八分二厘二毫四丝八忽九微。料剩银一百五十四百六钱六分一厘九毫三丝六忽九微五纤八尘八埃。

今额解银五十四两六钱六分一厘九毫三丝六忽九微五纤八尘八埃。

贡

农桑绢一十五匹七尺七寸五分，每匹价银七钱，该银一十两六钱六分九厘五毫三丝一忽二微，水脚银四钱五分七厘五毫。

弓二百六十张，弦一千三百条，箭三千二百六十枝，杂皮三百七十一张，翎毛九千六百二十二根，翠毛二十五个。军器折色民料，正价银二百六两三钱一分六厘五毫，水脚银三两三钱一厘六丝四忽。

已上俱于料钞内派解。

课程

鱼课原额一千一百六十七石一斗六升二勺，今以缸料三百二十四石七斗二升六合派在内，共课米一千四百九十一石八斗八升六合二勺。有闰，课米一千六百二十石二斗三升七勺六抄五撮，每石征银三钱五分。今额课米一千六百三十六石三斗四千九勺七撮五粟。无闰年，该课银五百二十二两一钱七分二厘二毫一丝四忽五微五纤解司饷。

今额课银五百二十八两六钱二分六厘五毫七丝四忽八微七纤五渺，闰月银两充饷。

有闰年，该课银五百六十七两八分七毫六丝七忽七微五纤。今额课银五百七十二两七钱一分九厘三毫一丝七忽四微六纤七渺五尘。

铸泻课钞二錠二百文，官房租钞三十三錠一贯八百六十文，窑冶课钞四贯七十一文，茶课钞一十一錠二百文，茶引油课钞六錠一贯，房地赁钞九錠一贯三百一十文，酒醋课钞五十四錠一百文。以上七项课钞俱免征。

酒税银八两二钱，有闰加银六钱，解司饷酒户办。今额解八两四钱，有闰加银七钱。

铁课一万二百二十五斤，炉户出办军器用。

盐钞，计口食盐而派之。

粮单额派。无闰年，银四百二十七两五钱六分五厘五毫六丝二忽六微六纤；有闰年，银四百六十六两一钱一分一厘六毫八丝四忽三微九纤五秒。

实差丁口二万七千八百五十四丁口。无闰年，每丁口派银一分五厘三毫九丝九忽四微四纤四抄，内起解南京正银一百四十三两五钱八分三厘七毫四忽三微三纤一抄三尘五埃一沙二漠，水脚银一两七钱二分三厘四忽四微五纤一抄九尘七埃六沙二漠。解司银一百七十七两六钱四分九厘八毫八丝四忽八微七纤七抄三尘二埃四沙二漠。解府银一百四两六钱八厘九毫六丝八忽九微九纤九渺三尘四埃八沙四漠。

有闰，每丁口派银一分六厘七毫八丝七忽七微四纤三抄。内起解南京银一百五十五两六钱六分四厘四毫四丝三忽四微五纤一抄八尘六埃五漠，水脚银一两七钱六分六厘七毫九丝七忽三微二纤一抄四尘二埃二沙三漠。解司银一百九十五两三钱四分八毫七丝七忽八微九纤九抄四尘三埃一沙七漠。解府银一百一十三两三钱三分七厘五毫六丝五忽七微二抄二尘八埃五沙五漠。

续垦升科民米二十石二斗一升六合一勺二抄一撮，共派银七十一两三钱三分六厘二毫八丝。

今奉文田米新增饷银八百二十一两二钱七分二厘五毫。

役法①

(注释：①该标题为编者所加，以与目录对应。)

差役

今条编谓之徭、纲、机、站四差。实差成丁一万二千五百九十八丁一分，今实差人丁一万二千四百八十二丁。民米三千九百八十三石四斗五升，今民米三行八百零六石二斗二升七合六勺九抄五撮二圭。

四差共银四千九百二两八钱二分九厘九毫五丝六忽。

今派四差银五千二百五十九两四钱一分三厘一丝六忽。

纲银

每丁派银二分八厘一毫九丝四忽九微九纤，每石派银六分五毫八丝八忽三微一纤，共纲银六百一十七两二钱六分七厘七毫一丝六忽。

今额纲银六百三十七两五钱九分七厘五毫一丝六忽，内都察院心红、纸札、油烛、柴炭银三两八分，解福州府收候支用。今额解四两八钱一分，有闰加银七钱二分。

两院助给县学贡生路费银三两。

总兵府油烛、柴炭、案衣、执事家火银一两七钱八分二厘一毫三丝三忽，解福州府发闽、侯二县支用。今额增解察院阅操银七两，近奉文新裁充饷。

布政司进表箱银五两五钱，修衙银一十四两六钱八分，解本司支应。

督粮道纸札、书、手工食银六两六钱八分，解理问所支用。今又公费银三两一钱。

分守建南道修衙、家火、年例、执事、轿伞、案衣银二两五钱七分。阅操犒赏银四两四钱一分，修换什物、家火银二两五钱五分。俱解南平县支用。

今额增解厨役一两二钱，书手工银银三两六钱，有闰，加银三钱。奉文新裁银一十两充饷。

按祭司进表随舡家火、纸札、工食银六两七钱，解司支应。

分巡建南道纸札银一两五钱，解瓯宁县支应。提学道岁考生员试卷、茶饼并赏花红、纸笔共银一十五两九钱六分。

两院守、巡、提学各道出巡、往来使客，顾募门皂银一十两。

上司巡历往来，下程、门厨、皂隶、米菜共银八两。查盘官合用心红、纸札、下程

、门皂米菜银三两一钱七分。

本府进表合用纸张、绶袱、盘费等银三两二钱二分。攒造朝觐各项文册、纸札银五两三钱九分。升迁、应朝、祭江并回任祭门银二钱七分五厘。今额增修理浮桥银六两。

新官到任祭品银四钱三分，公宴银四钱二分。使客下程庆吊公礼银九两一钱八分，灯笼夫银二两九钱八分。又奉文增银二两五分七厘三毫，增厨役银一两二钱，年例执事银三两三钱五分。今额增厨役银，无解，余照旧。

本府并各馆首领、司狱、府学教官、修理衙宇及置办轿床(原文“轮床”，应为“轿床”之误。)、铜、锡、木器家火银四两四钱七分。

察院布、按分司本县及儒学共修理银一十两，收县支应。

本县攒造朝觐须知绶袱、宪纲循环钱粮等册书，手工食银一十五两。升迁应朝祭江并回任祭门银一两。

新官到任祭品银一两三钱三分三厘三毫四丝，公宴银一两八钱三分三厘三毫一丝。

习仪拜贺救护香烛、庭燎、茶果银六钱。

春秋祭礼，启圣公、文庙、山川、社稷、乡贤、名宦、邑厉、霜降等项，共银一百三十八两；乡饮二次，银二十两，今额裁减银一十两充饷。

鞭春、春牛、芒神、春花、彩杖、春宴香烛二两七钱三分。桃符、门神、花灯银二两，今额裁减银一两充饷。

季考生员试卷、茶饼、赏纸等项银一十六两。县学岁贡生员往京盘缠、牌匾银三十两二钱五分。正、陪贡生员往省盘缠银四两五钱。考试、生儒进学、花红、彩旗银一两五钱。朔、望行香、纸、烛银一两二钱。

新任知县并各衙及典史、教官修衙银一十二(漏数字单位。据清道光《永安县志》载，应为“一拾二两三钱三分三厘三毫”。)。清军驿、传道三厘三毫。

本府笈夫银，铜、锡、木器一应家火银一十三两，料青、白皮银六两三钱三分，实银一十。堂帟褥、夏冬案衣等银一十一两，存恤孤老。

犯柜银四；募轿、伞夫役工食银三十六两正；修理正道(漏一“心”字，应为“心红

”。)红、茶果、纸札、油烛、公费银五十两。三铺各该以俱照经费录载。

今额正道张油、烛公费银三十两正，添补祭礼银二十两正，管解南北二银二十两正。

征年该军伞扇银一十两正。

今额解银工食共银二十八两八钱正。

大比年府学公费，油烛充饷银七两八钱正。县学四十程，并油烛、柴炭、酒席银三十两，银五十五香烛，谢神猪、羊银二两三钱三分，银三十两内解。

今额增武银八两七厘五毫三丝二忽两三钱三(此处前面应有漏字。)。纸札银二两五钱七分一厘五毫，置办轿床五钱五分。刷印匠、装钉册籍黄原充饷银七两二钱正。

县堂大小公一两六钱七分九毫六丝八忽六钱正。夏冬衣布银二十一两。

押解囚、知县出入添钱。

本县库用心县前等五铺银一两，偏道桂口等，此五项今银五钱。本县心红纸、五铺银五两，偏道银一两。

修宅、家火、乡饮公宴等项银八两。修理仓盐、京军黄二册杠索盘缠，以十年追迎送上司册银四两，黄册银三两六钱。

灯夫四名，一两七钱一分三厘八毫。

又裁，本县科举遗才生员盘缠银七两五钱，本县使客下两对读生员盘缠银七两五钱。共祈晴祷雨两以三年派征年该银一十八两，预备供应三厘三毫三丝三忽。分守道公费举盘缠银二两。

均徭①

(注释：①原标题为“儒学”，不妥。编者据万历《永安县志》改。)

无闰，每丁派银六分一厘七毫四丝一忽二微，每石派银一钱四分四厘六丝三忽，共均徭银一千三百五十四两八钱六。今额编银一千四百四十二两八钱八分，连闰在内。

闰年加银五十六两二钱。内门司中解户一名，银三十两，无闰。今额增解富户银四两二钱八分。司护表夫一名，银五两，无闰。

借拨皂隶一名，银七两二钱，闰加六钱。县祇候七名，每名银一十二两，共银八十四两。闰月每名加银一两。

马夫(原文“夫”，应为“马夫”。)三十名，每名银四两，共银一百二十两。无本闰。

此二项今改照经费录载。

正官员下薪银三十六两正，典史员下薪银一十二两正，均经教谕员下薪银一十二两正，训道员下薪银一十二两正。

房司吏六名，每名银一十两八钱，共银六十四两八钱正。

房书手六名，每名银一十两八钱，共银六十四两八钱正。

有内徭银五十四两二钱正，机银九两六钱正。

布政二名，每名银七两二钱，共银一十四两四钱。闰月每名加银六钱。

按察一十七名，每名银七两二钱，共银一百二十二两四钱。闰月每名加银六钱。

原本今改照经费录款载。皂隶一十六名，每名七两二钱，共银一百一十五两二钱。又拨给典马史衙书办一名，银一两二钱正。

县库夫二名，库书一名。每名银七两二钱，共银二十一两六钱。闰月每名加银六钱。今库书一名，银一十二两。库子四名，每名银七两二钱，共银四十两八钱。内支徭银二十一两六钱，机银一十九两二钱正。

禁子三名，每名银九两，共银二十七两。闰月每名加银七钱五分。

今禁子八名，每名银七两二钱，共银五十七两六钱。内支徭银三十九两正，机银一十八两六钱正。实应役四名，空缺四名。浮流仓仓夫二名，每名银三两六钱，共银七两二钱。

预备仓仓夫四名，每名银一十二两，共银四十八两。

今额裁减仓夫一名，银六两。裁减仓夫搬运，脚力银七两二钱二分。今仓书一名，银一十二两正；斗级四名，每名银七两二钱。共银四十两八钱。新裁仓夫工食银一两一钱八分，充饷。

本县儒学斋夫六名，每名银一十二两，共银七十二两。闰月每名加银一两。

膳夫二名，每名银二十两，共银四十两。

门子二名，每名银七两二钱，共银一十四两四钱。闰月每名加银六钱。

库夫二名，每名银七两二钱，共银一十四两四钱。

斗级二名，每名银七两二钱，共银一十四两四钱。

今改照经费载。

学书一名，银七两二钱正。

门子五名，每名银七两二钱，共银三十六两正。

殿夫一名，银四两，经费无载。

建南道并县前公馆各门子一名，每名银一两五钱，共银三两，经费无载。

贡川公馆门子一名，银一两，经费无载。

东洋兼看林田公馆门子一名，银一两，经费无载。

山川、社稷二坛，各坛夫一名，每名银八钱，共银一两六钱。

今额裁减山川、社稷坛夫银一两。裁外坛夫，经费无载。

县前铺司兵五名。黄坊、贡川、张关、新岭共四铺，各铺司兵四名，共二十一名。每名银五两四钱，共银一百一十三两四钱。闰月每名加银四钱五分。今额裁减县前铺兵一名，银五两八钱五分。

桂口、林田二铺，各铺司兵二名，每名银五两四钱，共银二十一两六钱。闰月每名加银三钱。

东洋铺司兵一名，银二两。续加编县前等铺，铺司兵工食银二十七两。

安沙、湖口二巡检司弓兵各四十名，共八十名。每名编银七两二钱，共银五百七十六两。内抽三百八十一两六钱解司饷。每司应役一十七名，每名银五两四钱，共三十四名，共银一百八十三两六钱。闰月加银四钱五分。又奉文于内扣革工食银一十两八钱。今额扣解弓兵银四百零五两正，均徭闰月银五十四两伍钱五分。

今改照经费载，安沙巡检员下薪银一十二两。

湖口巡检员下薪银一十二两。

安沙、湖口二巡司书一名，皂隶二名，共六名。每名银七两二钱，共四十三两二钱正。

机兵

旧额编机兵三百五十名，共银一千七百九十七两六钱四分。内除一百二十名丁米分割宁洋县外，本县不申减编，从而编克饷银三百九十三两四钱四分。应役兵一百三十名，每名编银一十两八钱。内每名抽三两六钱，该银四百六十八两，俱解司饷。实银九百三十六两，给兵工食。

今编每丁派银八分七毫七忽二微，每石派银一钱八分八厘三毫一丝七忽。无闰共机兵银一千七百八十三两二钱四分，内解充饷银八百六十一两六钱四分。

机兵一百六十名，每名工食银五两七钱六分，共该银九百二十一两六钱。内精兵一名，工食银五两七钱六分。解道。有闰，共加工食银一千八百六十两零四分。今额裁减机兵一十八名，银一百四十两四钱。裁减机兵五名，银三十九两正。裁减精兵一名，银七两八钱正。新裁团操机兵，银一百四十四两。新裁机兵银一十七两四钱，机兵闰月银六十二两四钱。

今马快八名，每名银一十八两，共银一百四十四两正。

步快五十名，每名银七两二钱，共银三百六十两正。

六房书手凑给工食银九两六钱，库子凑给银一十九两二钱。

典史衙皂隶四名，每名银七两二钱，共银二十八两八钱。

看监禁子凑给银一十八两六钱正。

典史衙门子一名，银七两二钱正。

每丁加银三厘五毫一丝九微二秒，每石加银八厘一毫七丝一忽一微五秒。

驿站

万历二十一年十月，新增站银四十两一钱八分五厘二毫。又设碓夫二名，共银四两。今裁。

每石派银二钱七分三厘九毫六丝四忽，共站银一千九十一两三钱二分二厘四丝。内解九百四十两一钱八分五厘二毫本府给驿银，一百四十七两一钱三分六厘八毫四丝存县支应。

今额站银一千三百一十七两八钱七分五厘五毫。

内解府银一千一百二十五两五钱二分，按季支解。

又依经费录，于站银内支給儒学教官一员，每年喂马草料银一十二两，按季支給。又给本县轿伞夫七名，每年工食银五十两四钱。

又给捕衙马夫一名，每年工食银七两二钱。存县支給，应付不拘多寡，难以限数，余剩银尽行征解。

此赋役全书也。旧则不可寻，惟据粮单而志之。其间分大田、分宁洋丁米既去，而差役无减，额则有增于昔，赋则有加于今，非中正可久之道。矧生齿既繁，地不足以供，徒抱杞忧。长民君子念庶富之训，则知赋役之关于民生也大矣！

寺租

充饷银一百四十八两四钱四分六厘，今增银三两九钱五分九厘一毫六丝。

水利

官陂

自大帝宫前岩子角上入东门，过铁甲局，绕学宫前，流至南门出。不惟有资灌溉，城中一遇火警，亦预有备。知县欧阳弘申编圳夫二名，常川督视，逾年革去。今每年一修浚，亦地方之利也。

梅溪陂

发自大梅溪，水入山隔官圳，过龙腰、黄竹洋，分三派。中派流至新营坂，止灌溉民田数千亩。今田主定一看圳夫，俾流通不滞。官府惟严禁豪奸专拦，庶水利不壅，旱暵有备。

坑冶

下坑在四十一都。平地坑、周坑、火烧桥坑俱在四十三都。溪南坑、舍兜坑，此皆铁坑也。近日二十九都、三十都纷纷起炉，岁有常课。但每炉招募徽、浙矿夫不下百余人，用之烧锻。但群聚难戢，泥水浸禾，民田受害，地方鸡犬不宁。且天地生财有数，及矿竭炭穷，矿夫难散，弄兵潢池，势所必至。

军门近有严禁，不许滥起炉场，诚桑土衣枷之戒也。

前炉已停，无主废。

今兴起煽：二十八都蚌溪炉，二十四都凤凰尾炉，四十二都东溪炉，四十二都蔡坑炉。

屯田

邵武县屯军一十三名，每名原派屯粮六石，共计粮七十八石。

建宁县屯军一百一十三名，每名原派屯粮六石，共计粮六百七十二石。

二县共屯粮七百五十石，俱系本所差人催。今永安所裁革，其屯粮延平府所卫催。

物产

谷之属早稻(金成针谷)、晚稻、秫、粟、麦(小麦、荞麦)、豆(绿、黄、乌、赤)、黍，可为酒，麻(油麻、黑麻)。附：薯、芋、山药、蕨粉数种可以御饥。

蔬之属芥、姜、葱、蒜、菠薐、苕苳、萝卜、茄、匏、甕菜、同蒿。瓜有冬、丝、苦、西之殊。笋有冬、绿、黄、斑之色。菇(红、白木耳、香菇佳)。

果之属桃、李、梨、栗、枣、柿、柑、桔、枇杷、杨梅、青梅、银杏、石榴、香櫞、甘蔗、葡萄、莲房、菱角。

木之属松、柏、桧、杉、桐、柳、桑、柏、槐、椒、冬青、皂荚、枫、榕、桤、棕榈、樟、相思木。

竹之属猫竹、南竹、紫竹、绿竹、黄竹、石竹、苦竹、绵竹、秋竹、方竹、面竹。

花之属山茶、海棠、茶靡、木槿、长春、杜鹃、山丹、茉莉、素馨、瑞香、兰、桂、梅、葵、鸡冠、芙蓉、含笑、玉簪。

草之属蒲、萍、蓼、苹、葭、长生。贡川之草可织蓆，荆山龙须之草尤妙。

毛之属马、牛、羊、犬、猪、猫、麋、麂、獐、鹿、猿、猴、野猪、豪猪、虎、豹、熊、黑、鼠、狼、竹鼠、兔、狸。

羽之属喜鹊、鸦、鸠、莺、燕、布谷、啄木、画眉、伯劳、雀、雉、鳧、鸕、鹤、鸬鹚、白鹇、杜鹃、竹鸡、鸚鵡、鸛、鸳鸯、提壶、翡翠、鹭鸶、白头翁。近年，恶少用员子铳打鸟，一打数十，鸟或尽树而毙。飞类不遂其生，亦仁政之当禁也。

鳞之属鲤、鲈、鳊、鳙、鲫、鳊、黄颡、黄尾鲢、鳊、鳊、鳊、草鱼(池塘蓄者)。近年夏秋之交，乡民用茶枯末沿河倾放，绝流而取，非“数罟不入”之禁也。

介之属龟、鳖、蟹、螺、蚬、蚌。

虫之属蛇、虺、蜈蚣、蝥斯、蝙蝠、螭蟬、萤、蚁、蜘蛛、蚯蚓、蝴蝶、苍蝇、虻、蟋蟀、螟蛉、螳螂、蛙，其于房也为蜜蜂。

卷五宦历志

知县

韩隆景泰四年任。见《宦绩》。

俞鼐天顺五年任。

李睿天顺八年任。

刘忠器进士，新昌人。成化六年任。

施谦监生，归安人。成化九年任。

沈复举人，浙江人。成化十四年任。

邓概有传。祀名宦。

潘彪监生，浙江人。成化二十一年任。

张珣监生，新昌人。成化二十三年任。

钱昆举人，常熟人。弘治六年任。

刘锦举人，慈溪人。弘治八年任。

梁世材弘治十一年任。

刘灿有传。祀《名宦》。

周祥监生，无锡人。正德九年任。

孙熹监生，通州人。正德九年任。

罗珊有传。见《名宦》。

姚章举人，海宁人。嘉靖二年任。

时锦举人，慈溪人。嘉靖五年任。

覃廷璫举人，四会人。嘉靖八年任。

徐勋有传，见名宦。

程口监生，广信人。嘉靖十六年任。

陈沂举人，江阴人。嘉靖十八年任。

裴建监生，贵溪人。嘉靖二十年任。

詹铉相举人，婺源人。嘉靖二十一年任。

姚仲韶有传。见《名宦》。

郭仁有去思碑，见《宦绩》。

刘本举人，上虞人。嘉靖三十二年任。

陆策岁贡，隆安人。嘉靖三十四年任。

胡价岁贡，凤阳人。嘉靖三十七年任。

欧阳弘举人，归善人。嘉靖三十九年任。

李大标举人，潮阳人。嘉靖四十三年任。

卓光谟岁贡，长乐人。嘉靖四十三年任。升审理正。

许培之举人，新会人。隆庆五年任。历升兴化通判，养利知州。

徐辂有传，见《宦绩》。

史重渊举人，余姚人。万历八年任。

傅本智举人，金溪人。万历十四年任，以忧去。

王廷绣岁贡，黄岩人。万历十七年任。

苏民望选贡，宣城人。万历二十年任。

张守让广东南海人，举人。万历二十一年任，升南直大理寺评事。

黎仪广西阳朔人，举人。

施恒言浙江乌程人，举人。万历三十四年任。

余文中浙江西安人，举人。万历三十八年任，升汀州府同知。

何宗圣湖广随州人，举人。万历四十三年任，升中府经历，转工部郎，历工部右侍郎。

李如鸿浙江严州人，举人。万历四十七年任。

谭鵬禔湖广衡阳人，壬戌进士。天启二年任。

冯开泰广东文昌人，举人。天启四年任。

陈盛穰湖广承天人，恩贡。崇祯元年任。

许士奇南直华亭人，举人。崇祯二年任，升河南归德府同知。

刘胤江西南昌人，举人。崇祯五年任。刑部主事，历榆林卫佥事。

何思湖广归州人，恩贡。崇祯十二年任。升云南大理府赵州知州。

黄凤翔广东澄海人，岁贡。崇祯十五年任。

徐起霖南直通州人，恩贡。崇祯十七年任。顺治三年擢本府推官。

高咸临浙江钱塘人，贡生。顺治三年任。

张毓秀山西大同人，贡生。顺治六年任。

陈廷枢浙江归安人，己丑进士，顺治七年任。

县丞

赵昂景泰五年任。

钱水天顺四年任。

谢真天顺六年任。

冯璘

宋善

陈铭监生，海阳人。

陆辅吏员，嘉兴人。

钟质有传，见《名宦》。

张盱监生，淳安人。俱成化年间任。

李瓚江西人。弘治六年任。

司马庠监生，山阴人。

吴禧吏员，乐平人。俱弘治年间任。

凌谔监生，句容人。

邓玘监生，桂阳人。

唐希贤监生，万载人。

许纲监生，石门人。俱正德年间任。

黎应吏员，苍梧人。嘉靖四年任。

程相监生，广信人。

潘节监生，曲阜人。

陈世达监生，三水人。

常纪监生，湖广人。

李诸吏员，寿州人。

邹旻监生，德安人。

龚宋监生。

张世鑑吏员，太平人。

张天瑞岁贡，铜陵人。俱嘉靖间任。

周汝松监生，直隶人。

李性南昌人。隆庆年间任。

赵寅岁贡，雩都人。

胡乔嘉兴人。万历年间任。恤贫民，常代纸罚，佐政务允当人心，有钟质之风，惜任未久而歿。

以后奉文裁革。

主簿

赵弘

张冲并景泰年间任。

孙永安天顺年间任。

丁源知印，归安人。成化元年任。

汪广监生，浦江人。

朱皓吏员，仁和人。

洪仲知印，寿昌人。

方旭监生，乐清人。

姚振监生，浮梁(原文“梁浮”，应为“浮梁”。)人。并成化年间任。

陈杰监生，广德人。

祝俨吏员，铅山人。并弘治年间任。

沈烂如皋人。

杨今监生，广安人

徐廷俊吏员，番禺人。并正德间任。

周玺监生，恭城人。嘉靖三年任。

盛琰监生，秀水人。嘉靖八年任。

留文辉监生。

钱世庄吏员，杭州人。

徐国宾监生，海宁人。

陈汝鼎监生，处州人。

马胤龙监生，象州人。

钱训中书。

周章吏员。

李元和吏员，丰城人。

李逢旻儒士，浙江人。并嘉靖间任。

吴春

虞良璧监生，钱塘人。

贡有年监生，歙县人。

蘧廷臣监生，贵溪人。万历二年任。

郑灿吏员，仁和人。

潘大模监生，桐林人。

陈应时岁贡，高要人。有学有守，卒于官。

朱希召监生，清远人。

陈志监生，南丰人。万历十八年任。

夏秉彝监生，六合人。万历二十年任。

陈袞监生，缙云人。

陈尧勋监生，溧阳人。

王登学吏员，义乌人。

胡尚文吏员，山阴人。

刘梦龙吏员，义乌人。

沈文佐吏员，义乌人。

章志竟监生，绍兴人。

罗尚宾监生，池州人。

楚尚善吏员，当涂人。

郑都咸监生，徽州人。

吴凤起监生，余干人。

李春华吏员，婺源人。

李沂吏员，南直人。

黎道焜监生，宁国人。

本缺顺治七年奉文裁革。

典史

区广宁景泰三年任。

杜凤成化二年任。

冯琬慈溪人。

彭宣乐平人。

汪俊奉化人。

周良平湖人。

李达四会人。

陈纲南海人，并成化年间任。

陈毓玉山人。

夏明黄岩人。

名玺颖上人。

邹汉南昌人，并弘治年间任。

冼俊北流人。

皮方丰城人，并正德年间任。

徐震山阴人，嘉靖年间任。

丁昭丰城人。

钱悌会稽人。

陈晟江宁人。

严祖高要人。

罗袞南海人。

陈文昭临海人。

徐承芳钱塘人。

任道山阴人。

唐才春桂林人。并嘉靖年间任。

张珙秀水人。万历二年任。

刘果浏阳人。万历八年任。

邵宰山阴人。

马芳会稽人。万历十七年任。

陈策丰城人。万历二十年任。

吴淳吏员，南海人。

陶德案吏员，当涂人。

黄成之吏员，海阳人。

张九兹

胡汝登吏员，歙县人。

施言吏员，上饶人。

刘正国吏员，广德州人。

舒楠吏员，池州人。

陈学礼吏员，松江人。

罗拱吏员，南昌人。

陈继荣吏员，广信人。

谢梦龙吏员，余姚人。

张维璧吏员，安陆人。

杨绩吏员，湖州人。

钟人龙吏员，杭州人。

童茂忠吏员，会稽人。

萧继荣吏员，宁国人。

钱祚乾吏员，会稽人。同县令高死难，一子一婿同时被戮。

娄鳌吏员，绍兴人。顺治九年任。

教谕

曾衡天顺元年任。

萧高天顺八年任。

都昂成化十年任。

陈绅成化十四年任。

诸敏成化二十年任。

陆唐举人，余姚人。弘治年间任。

韩颢鄞县人。正德二年任。

容仁茂名人。正德十二年任。

辛绍佐顺德人。守正不阿，教士有法。嘉靖四年间修府志。历升通判。

程鼎玉山人。嘉靖五年任。

丘广举人，湖广人。嘉靖十一年任。

萧锐万安人。嘉靖二十八年任。

萧松有传，见《名宦》。

邓国宾三水人。嘉靖二十八年任。

苏黎庶举人，番禺人。有碑记。

董鎔丽水人。嘉靖三十七年任。

储凤仪宜兴人。嘉靖四十一年任。

黄钟会稽人。隆庆元年任。

王宪春临川人。隆庆五年任。

萧汝升长乐人。万历元年任。

蔡坡闽县人。万历七年任。

钟撰瑞金人。历升学录、湖广通判。有传。

李嘉禾海门人。万历十一年任。

张经济侯官人。万历十四年任。升兴化教授。

余星举人，莆田人。万历十七年任。以忧去。

苏日登举人，顺德人。万历三十年任。以忧去。

孙正谊贡生，西安人。

杨卜韬举人，南海人。

林丛贡生，福宁人。

林履成贡生，莆田人。

陈景奎举人，晋江人。

王良臣举人，莆田人。

罗万象贡生，阳春人。

詹沚贡生，浦城人。

王宾贡生，龙溪人。

郭袞举人，南海人。

汪大期贡生，南陵人。

陈嘉猷贡生，建宁人。

林尚春举人，晋江人。

许绍勋举人，广东人。

赵士完举人，莱阳人。

陈希孔举人，广东人。

何起鸣贡生，顺治四年任。

游汉龙举人，顺治六年任，卒于官。

黄豹举人，莆田人。顺治九年任。

训导

饶旭

顾祐并景泰间任。

叶诚天顺间任。

陈湍成化元年任。

钟机成化二年任。

徐让成化八年任。

刘玉成化九年任。

朱明成化十九年任。

黎艮成化二十一年任。

吕昂成化二十二年任。

陈杰

朱铭

杨敷永丰人。

欧阳选保昌人。

林谷云和人。并弘治年间任。

韩宗说番禺人。

许琪琼山人。并正德年间任。

徐铨兰溪人。正德十四年任。

杨沂正德十五年任。

周叔度嘉靖二年任。

马廷鼐永广人。嘉靖五年任。

朱亟山阴人。嘉靖八年任。

史逊永嘉人。嘉靖十年任。

周梧嘉靖十一年任。

汤浚嘉靖十七年任。

陈彬嘉靖十八年任，升昌黎教谕。

张道武冈人。嘉靖二十二年任。

孔继先嘉靖二十三年任。

李煦保昌人。嘉靖三十一年任。

李一潮(据万历《永安县志》，“朝”应为“潮”。)仙居人。有文学。嘉靖三十五年任。

冯居敬保昌人。嘉靖三十六年任。

黄瞻之潮阳人。

樊明瑞衡山人。

吴浚徐闻人。嘉靖四十二年任。

周珩鄞县人。升瑞安教谕。

湛天润增城人。升学录、平乐府通判。

朱钟崖州人。

虞舜臣广东人。

王诚伯侯官人。

彭昊安溪人。

杨施建安人。升古田教谕。

彭经义安人。

黄鏐潮阳人。有传，见《名宦》。

夏日筹宁化人。升上津教谕。

杨继秀建安人。万历二十年任。

李南闾程乡人。万历二十一年任。

倪宗禹贡生，龙岩人。

裴应试贡生，清流人。豕宰应章胞弟。

詹洪肇贡生，侯官人。

许祥贡生，海澄人。

裴应征贡生，亦豕宰胞弟。升汉昌知县。

王命之贡生，余姚人。

杨时芳贡生，平和人。

赖天隆贡生，武平人。

黄绍捷贡生，建安人。

陈士桀贡生，建宁人。

薛晋贡生，福州人。

林茂贡生，福清人。

刘士弘贡生，四川人。

用维申贡生，浦城人。

丘昂霄贡生，武平人。

王震贡生，政和人。

陈继宗贡生，分水人。

揭弘济贡生，归化人。

顾思义贡生，永福人。

胡养元贡生，武平人。

黄国英贡生，广东人。崇祯十五年任。

何鼎铉贡生，福州人。顺治九年任。

巡检

王璘、高升、周愷、苏公田、蒲政、刘真、孟安、董宸、汪能、柳荣、朱昂、袁祥、金宾、王圯、王成、房兴俱成化年间任。

李绪、何通、余纲俱弘治年间任。

魏时学、曾让、韩环、韦珠、宋时臣、徐金、韩大伦、季春凤、王臣、梁玉、沈学俱嘉靖年间任。

周大纲、钟成能、戴廷重、沈鹏俱隆庆年间任。

雷正、丘生、张汝学称职、升主簿。

唐壤、郑国用、何俯、蔡继祖、朱芳、吕盛、周际可、王番、陈宪、任善继、李奇俱万历年间任。

方溥安庆人。

任弘训庐州人。

黄国祯宣城人。

苏应凤江西人。

翟虹和泾县人。

朱时春南直人。

陈嘉训宿迁人。

山瑞征江人。

谢宗翰永嘉人。

樊惟德应山人。

刘大为南海人。

梁祥肇庆人。

周日照道州人。

余迈潮州人。

陈仕聘泾县人。

陈有益严州人。

邹体仁长州人。

王明纲六安州人。

朱化京上虞人。

陈上擢广州人。

王廷勣泮州人。

李登扬广东人。

钱祚乾会稽人。

李懋枝铅山人。

唐代文衡阳人。

黎应祥临川人。崇祯十七年，死三隘寇难。

王炆元余姚人。顺治五年，任湖口司巡检。

王都会稽人。

官应朝蕲州人。

武职历官

正千户

崔礲山后宣府人，景泰年间调本府。

崔玉、崔辅国嘉靖间袭。

崔岩、崔鸣治万历年间袭。

崔之屏

副千户

陈𨔵直隶易州人，景泰年间调本府。

陈谅、陈灿嘉靖间袭。

陈瀚嘉靖间袭。

陈秩然、陈司钤万历间袭。

陈丕承天启间袭。

无继一员，王升。

调卫一员，刘敏。

百户

焦俊湖广沅陵县人。始任纪录，景泰间调本所。

焦铎、焦一桂、焦绶、焦允武万历间袭。

焦茂荣壮勇迈群。与许中军定国、陶千户国政共死于小陶梁钦、林士之寇难。

名宦

韩隆事迹见《安庆志》。据志，性友爱，以国子生，景泰初年知永安县事。地险事繁，尽心士民。立学校，作浮梁，除虎患，辨疑狱，息巨寇，民威德焉。六载考迹，百姓奏留之，复三年，卒于官。以县初设，其志未备。今观九载而民奏留，则其为民所宜，可知也。

邓概新淦人。成化间知永安县。公廉明断，以十条与民约。时邓茂七寇乱之后，顽民袭其遗逆，概取其尤者惩以法，众皆畏服。凡追逮不遣公皂，以信牌令里胥传置其家，捧牌自至，无敢后者。尤留心教事，增修学舍，暇日集诸生讲论不倦。在县五年，事治民安，父老至今思之。祀名宦。

刘灿临川人，举人。弘治十一年任知县。居官廉谨，不挠法徇人。听讼详悉，不作好恶。儒学被毁重，复建。立桥梁、道路，百废俱举。升池州府通判。至今以清官颂之，祀名宦。

罗珊南海人。正德中知永安县。政先爱民，不畏强御。总镇移文，欲开县忠洛乡银矿入贡，迫胁甚急。珊意非朝旨，且未闻此乡有矿，惧累民，乃抗言，县旧无矿场，且既已有诏禁私采，移文止之。大忤使者徐俊。时俊盖行赂得牒觅利，为珊所沮，诬讐珊杀人，总镇差官捕逮，且率党攻县门。禁辱备至，珊不为动。民汹汹，曰：“使贪利欲执吾宰，戕我众，盍死之！”俄顷，民毕集，往诉于当道。珊能声益著，膺荐擢去。父老德之，郡人、御史胡琼撰文立石于县。

徐勋长州人。以任子。知永安县。清慎才能，不恃世禄。察民欲恶，以为兴罢。建桥梁，立社学，设义塚，禁火葬，招降寇盗。监司贤其有龚渤海之风。析置大田县，勋任其役，贤劳罔懈。坐是疽发背，卒于官。民至今怀思，为立祠祀之。

姚仲韶高要人。嘉靖间知永安县。廉明饰法，境内盗贼屏迹，狱无冤民。卒于官，士民哀慕之。

钟质永丰人。成化间丞永安。笃实廉洁，有古人风。政不便，民必以告令。玩法者逮至庭，语之曰：“吾或惯汝，长官难犯也。”为令邓概所重。在县六年，力请致仕，民欲留之。质慨然曰：“吾何德欤，若而苦我！”竟得请而去，归装萧然。人

至今思之。

萧松临海人。嘉靖间，由龙南司训升永安谕。启迪诸生，亹亹不倦；躬行道义，口不言利。永乏《礼经》，松简质敏者数人业之，亲为指授。永之以《礼经》举者，自松始也。尤不苟于交际，士或贫者，助之。卒于官，士大夫至今称之。

黄鏊潮阳人。由岁贡，万历十三年任永安学训。刚正不阿，清廉不苟。立会课士，捐俸济贫。两署县篆，先正征输，令各图各派答应一依条编，一毫不科，里甲刑清讼简。至领斋夫以补积谷，筑万仞宫墙，开拜笏街，政教卓有可纪者。周军门以贤能荐之，惜升王官，浩然而归。士民立永怀碑，以系去思。

宦迹

郭仁长洲人。丁未进士。由监察御史建言，左迁知永安县。公廉明敏，节用爱民。稽册籍以正飞诡，汰冗费以苏里甲。讲学兴教，敬礼贤士大夫。轻刑薄赋，祷雨虔诚。建耕桐书院，崇祀先贤。诸政秩然振飭。擢刑部主事。邑人德之，为立去思碑。

徐谿海宁人。由举人，万历五年任知县。廉公有威，吏畏民怀，里甲不敢持一菜至庭。两造听人和息，一文不科，纸罚惩一惯盗，境内安恬。三年革弊清军，节省民财以千计。以不善阿承，中伤而去。百姓至今思之。

张守让南海人。由举人来令吾永。慈祥恺悌，溢于眉宇。治永之明年，辟耕桐、云龙、龙江三院，作兴人士，弦诵其间。而兴利害，凡建西桥，修县北浮桥、东之马陵桥并贡溪之浮桥；至儒学、义仓，输粟赈乏，皆利济事也。更禁塞坑矿冶，立之碑；请减各寺派饷，著之令，宿害顿除。迨宁远服，秩满觐行，擢南大理评事。久之，而邑人有贸易过侯故里者，即召见之。时侯八旬余，而子孙绕膝，犹顾问永邑利害增损，士民俊发与否。其惓惓致恋吾永者有如此。

施恒言乌程人。由举人第三魁频上公车，不屑小就，为亲屈篆吾永。胥役奸宄，望影惊无敢犯。盖长善恶恶，其赋性也。民健讼，辄赴上越告，侯曰：是藐令而诳上也。民有枉，令不为贿抑，不为情夺，必请于上剖之。情果虚，惩加三等。而案无留牍，莽无伏戍，因有神君之号。侯重以文章自命，其进衿士而课解者，出入意表。岁丙午，子衿童子试，拔二士，俱先后扬去。非藻鑑之精，能若是乎？乃易岁以忧去。枕块之余，不复起。岂斯民无禄，抑侯之自傲有松菊也？今其嗣君讳之圻者，于癸酉已擢高科。天之报施善人，夫岂爽哉！

余文中西安人。由举人知永安县。廉明慎断，汰冗费，杜杂差，里甲获苏，征输早办。月朔望，每礼圣毕，揖学师、诸生而进之，讲四书大义，倍有阐发，尤谆谆于

“敬信节爱，使民以时”章，诸生拱听无斁。斯盖侯之以文章饬吏治者也。侯精于取予，不朘民膏以肥己，不屑屈体以媚上，一意与民分甘去苦。两考趋朝，优叙之，特擢汀州府同知。共秩与前上官等，投刺相抗礼，上官颌之，是以席未暖而归装且促也。廉吏可为而不可为，亶其然哉！

何宗圣随州人。由举人授知永安事。其胞兄昆柱翁讳宗彦，时已晋秩礼侍，勉之行，曰：“邑令，昔贤所恨不得为者，汝为之，汝知之乎？”侯曰：“唯唯。”以故视事初，即勤考课，劝农业，均赋役，清狱讼，医学以疗贫苦，养济以恤孤独，尤軫念于无名之科派。无因之馈投，侯痛斥之。其善状不可殫述。盖惟兄命是遵也。觐行，擢中府经历，升工部郎中。历几升至工部右侍郎。皆烦剧之司职，侯解之威然。旋有事于瑄祠，即拂袖归。此则侯之概略也。诗曰：“高山仰止，景行行止。”侯也有焉。

李如鸿严州人。由举人起家为永邑宰。邑人想望丰采，盖温如穆如也。讼狱烦多为之清简，采办繁剧为之请上，以求苏豁。问农课士，抚商息旅，皆不遑寝处。以至选社师为蒙养，严乡约为民谕。而徭役悉均，征输早办，观风问俗，奏最当，为天下先，以示诸令之有劝心，庶直道在斯民乎？而侯之丰采又岸如也。不善事上官，无失民誉得乎，仅转山西太原府忻州守。士民咨嗟，卧辙扳留不得，而甘棠之慕有继召伯而兴颂云。

许士奇华亭人，由举人。少有声夔序，与犹子誉卿文名相颉颃，称一时祥麟威凤焉。未几，而侯之犹子已执白简，入兵科谏垣，侯犹困公车不已。勉就一命，宰永邑。曰：“昔贤恨不为令，宁以百里藐诸，不得作三公勋品耶？”下车以劝农、兴学为第一义，刑宁清无刻，讼宁简无繁，输纳宁宽无楔急，请不以徇，贿不以敛。士民歌舞，为立生祠祀焉，文载小淘祠碑中。以忧归。服阕，秩迁河南归德府同知。品不副望，是宁百里之不能作三公，抑亦乙榜之不能望两榜也？侯已怡然挂冠矣。

刘胤南昌人，由举人。事母至孝，为禄养，俯就永安令。奉母车间关来闽，左右趋翼之，问安视善，同于家居，视事必入告。侯简簿书，惩胥猾，葺学宫，建津梁，此其巨者。他善政不殫述。六载考最，升刑部主政，转兵部郎，出为榆林兵备僉事。榆林极边，民穷食匮，侯抚绥有方，寇至辄却之。以荫赠恩当予其大父及母，侯曰：“吾事毕矣。”请老终养，许之。《诗》云：“孝思不匮，永锡尔类。”其侯之谓与！

徐起霖南通州人，由贡生来宰吾永。时事政孔棘也，即筹所为御寇者。修城垣，备矢石，立震社。义勇黄六德、张贞吉，乡勇欧永福等为之长，联络各寨，抚安八保。无何，汀、漳流寇由南路扬旗至矣，纵火焚城外屋，延城楼，反风卷火，西、北两楼及民居罄毁，几不可守。侯昼夜防御，缉知内讧，急擒而歼之。群贼宵遁，地方以宁。有修其隙于当事，侯不免至再三。无何，而清兵已叩关入闽矣。侯美丰仪

，解满语，贝勒见之作慰快状。随军有敕授本府司理，而侯之苦海脱矣。署建篆，活饥妇者数百命，皆待赎者无赎，而枕籍日以数十计，必请后释，几无余生，侯先释之，后卒获请。署福篆，其所判兴、泉数逆案，宥以胁从，其不获解纲者，词严义正，皆其铁笔也。分闈得士，七八皆有声。而三部堂、陈部院、霍按台章且交上，旦夕需新命，旋以内艰报，即洒血徒步扶柩归。今读礼之余，不次超擢，以展尽底蕴。此伊人一方之瞻云望日者也。

高咸临钱塘人。顺治三年，以贡随军入闽，治吾永。时物情汹汹，未知有鼎革事，而四郊多垒，尤难于措置者。侯下车，恤饥谨，缓追征，储器械，练义勇，凡所以悉心为国为民者，罔不周至。易岁而狡寇数万蜂拥，且窥城矣。侯以死自誓，率参府及尉、青衿、练总、居民共御之，出奇杀贼梁钦授者。不期四阅月，粮尽援绝，城陷遭屠。独侯怒目骂贼，含笔就刃，而一时共事者胥骈戮矣。事久论定，绅士金呈各上台叩阁请恤，以表孤忠，以慰众魄。至九年十月，恤典所颁，侯获赠福建按察司僉事，荫一子入监读书，敕祭葬。侯之死慰藉于九京矣。尉钱祚乾，青衿萧汉桢、张子适、刘廷宣、庄宜民皆知名士，未有以上闻，幽魂妥乎。至练总陈京瑀、赖骏声之死，犹狼暉之死先軫，雷万春之死张巡，亦未可忽也。故附录之，以备他日之阐扬者。

卷六选举志

征辟

初未设科，以孝廉、秀才、明经、人材、耆老等目荐用。

王子罕二十五都人。由秀才授琼州府文昌县主簿，以清慎见称，擢监察御史。

杨伯崇二十七都人。由人材授直隶常州府通判。

赖中行二十七都人。由人材授直隶苏州府长州县知县。

陈存道二十六都人。由人材授浙江金华县知县。

杨福善授浙江东阳县知县。

范应在城人。由人材授常州府无锡县县丞。

李文茂授富峪卫知事。

廖余二十五都人。由人材授弋阳县丫岩寨巡检司巡检。

李伯玉二十七都人。由人材授宁国府泾县典史。

范本初在城人。由人材授杭州府富阳县税课局大使。

郑文质三十二都人。由人材授广东盐场大使，转湛川巡检。

吴先民二十四都人。由人材授繁昌县河泊所河泊。

陈辛贤三十二都人。由秀才授豹韬、富峪二卫经历。

王国臣马园人。由秀才奉诏剿抚沙，求钦授光禄寺署丞。

科贡

进士

宋雍熙二年乙酉中梁颢榜

陈世则二十六都人。系卿第三兄。官至朝议大夫。

陈世卿二十六都贡川翠竹峰人。官秘书少监，赠吏部尚书。有传。

明朝洪武十八年乙丑中丁显榜

邓文铨二十五都忠山人。茂名县知县，刑部主事，升佥都御史，出知武昌、德安二府，转苑马寺卿，致仕。有传，祀乡贤。

弘治六年癸丑中毛澄榜

苏信二十八都马家山人。全椒县知县。气宇轩昂，学识优裕，一贫到老而不苟。八十余岁终。

嘉靖二十年丁未中李春芳榜

林腾蛟二十六都贡川人。新会、休宁二县知县，升山东道监察御史、河南按察司佥事。有传，祀乡贤。

万历三十五年丁未科黄仕俊榜

严九岳二十六都贡川人。任广西梧州推官，升北户部主事。以运粮抵山海功，升岳州府知府。

万历三十八年庚戌科韩敬榜

李芳时二十七都人，以军籍住北京。历任河南参政。

崇祯四年辛未科陈于泰榜

罗明祖二十六都贡川人。授南直华亭知县，忧起补繁昌，再转湖广襄阳县知县。

乡举

洪武十七年甲子科

邓文铨

永乐十二年甲午科

赖福二十七都大湖人。绍兴府推官。二人俱沙县学中。

成化十六年庚子科

陈隆三十二都安沙人。授湖阳县知县。有传，祀乡贤。

苏信以岁贡中应天乡试。

正德二年丁卯科

林孜在城人。授揭阳县知县。以文学名，旧志多采其稿。

林雍四十一都人。中顺天乡试。

正德十四年己卯科

李璋在城人。授卫州府会昌县知县。

嘉靖四年乙酉科

李杏在城人。授东昌府推官，历大理寺寺正、四川按察司佥事，进阶参议，致仕。有传，祀乡贤。

嘉靖十年辛卯科

曾守成在城人。授顺德府任县知县。政尚平易，比古循良，百姓至今思之。见《任县志》。

嘉靖十九年庚子科

林腾鲤祥次子。授衡州府通判，历兴国州知州、郑府左长史。

嘉靖二十二年癸卯科

林腾蛟祥三子。第二名。

谢昊千户所人。授虹县教谕，授兗州府单县知县。

嘉靖三十七年戊午科

萧时中二十八都人。初授万年县县教谕(缺县名，据万历《永安县志》补。)，升安仁、兴业二县知县、桂林府通判、荆门州知州。

张云程张万程兄弟，二十六都贡川人。中广东乡试。

嘉靖四十年辛酉科

吴应雷千户所人。授郴州学正，升翁源县知县、广州府通判。以城功加五品服俸。

嘉靖四十三年甲子科

赖万均在城人。授赣州、浔州二府推官，升普安州知州。

万历元年癸酉科

陈源湛三十二都安沙人。以选贡中应天乡试。授和平县知县，升高州府通判。

万历十九年辛卯科

陈明炤二十六都贡川人。中广东乡试。

万历三十四年丙午科

严九岳

李芳时

天启四年甲子科

赖圣谟大湖人。改讳元吉。授北直保定府唐县知县。卒于官。

天启七年丁卯科

罗明祖

崇祯三年庚午科

陈行忠三十二都人。以《易经》中本省第十一名。

丙戌科

王镜贡川人。以《诗经》由副榜贡，中本省乡试。

武举

崇祯三年庚午科

马匡福在城人。

岁贡

陈定

黄华知事。

赖隆

黄懋知县。

姜琦训导。

陈俊断事。

赖洪都事。

陈崇黄梅县丞。

曾进福赣州府经历。

苏信进士。

王纪推官。

曾春辰州府经历。

陈祥余姚主簿。

朱仲富郁林州府。

江澄

陈兴业知县。

罗盟田州府经历。

姜海汉阳训导。

曾琇袁州府知县。

吴富

朱政县丞。

罗良德庆州训。

邓珣吴川县丞。

陈绍皋上虞主簿。

黄志灵山教谕。

赖琦当涂主簿。

严诚揭阳县丞。不阿权势，节用民财，政未几而卒，惜哉！见《揭阳志》。

吴寿崖州训导。

黄森应天训导。

曾正永州县丞。

饶简武强教谕。

庄日新云南吏目。

赖璘

赖璋遂昌知县。

杨璘抚州府推官。

邓彪宜春主簿。

朱相乐清主簿。

吴麟无为州同，升审理正。

林良南雄训导。

郑瑚慈溪县丞。

黄翊郢西知县。

林祥长沙府经历，封文林郎。有传。

赖文理应府学贡。

陈鏊博罗教谕。

郑和大梅溪人。

饶嵩乌程县。

张仁南雄训导，有传。

黄元厚揭阳训导。

吴伟应嘉靖二十年贡。

曾守和岷府教授。

张志忠应府贡，慈溪县县丞。

林敦周府教授。

林凤仪连州学正。

张秉三水教谕。

陈旦铜陵训导。

饶保应嘉靖二十年贡。

赖明僎应府学贡，建德训导。

李雍进贤教谕。

林腾骥祥长子，应嘉靖□年贡。

陈世武奉化教谕。

林腾鲲祥四子。化州学正。

范崑山怀安县教谕。

高翔黄陂知县。

饶健应隆庆元年贡。

陈源湛二十都人原文“二十人”，应为“二十都人”。。选贡，应天中试。

赖源临海训导，周府教授。

欧恕黄岩训导。

揭文晶宁洋贡，寿宁教谕。

朱璞泰宁教谕。

吴宏器古田训导。

李珏长山教谕。

林思锦应宁洋贡，长乐知县。

陈源洁郴州州同，升审理正。

陈良猷训导。

邓文才松溪教谕。

李埏兴化训导，赵府教授。

林腾鹄福宁州训导，升晋江教谕。

王文道应宁洋贡，惠安训导。

张继善儋州训导。

饶倬平和训导。

张盛文应宁洋贡。

庄森应万历辛卯年贡，著有《就正稿》。

张存俭应宁洋贡。

赖举贤二十都人(原文“二十人”，应为“二十都人”。)。选贡。

饶俨古田训导。

范志统万历二十五年贡。

邓应龙南安府判。

郑成章

陈思夔益府教授。

余俊鹄

严学光泉州教谕。

赖万崇

陈愚

赖万经四十年贡，任宁波鄞县丞。

谢涑四十二年贡，任上杭训。

黄鹏举四十四年贡，任甌宁训。

赖大受四十六年贡，任嘉兴丞。

陈以忠四十八年贡。

邓继光泰昌元年恩贡。

赖敏行天启元年恩贡，授归安簿。

林奇嵩二年贡，遂安簿。

曾立本四年贡，建阳训。

吴秉纯六年贡，武平谕。

李中桂天启元年贡。

邓应熹崇祯元年恩贡。

林梦江二年贡。

李遵乾四年贡。闽县训，升普宁谕。

杨懋行六年贡，授临川谕。

吴暄八年拔贡。

胡茂春八年府庠拔贡。

姜履祥八年贡，授上海丞。

赖万绸十年贡。

陈国谟十二年贡。

王镜十二年副榜贡。

叶同春十四年贡。

李栋十六年贡，揭阳训。

张省身存俭子，由恩贡，卒。

邢万典

刘心传

张邦佐由岁贡，顺治三年授潮州教授。

萧庚虞顺治三年拔贡。

张友仲顺治四年恩贡。

叶宗虞顺治四年贡。

李启钥府庠岁贡，顺治五年。

范昌祚顺治六年贡。

陈其安顺治八年恩贡。

杨弘仁顺治八年贡。

例贡

杨宗庄显君林楷杨缙赖永安

陈玮奉新主簿。

邓成吴昂赖仪

彭礼吏目。

许璋新昌主簿。

赖文达香山主簿。

林瓚

张元荆州卫经历，升夷陵州判。

吴宏仁鸿胪鸣赞。受封。升海康县知县。

陈瑗罗逸民

陈塘主簿。

林福生桐乡主簿。

张必大金溪主簿。

管谷序班，南城县丞。

张必正湖广布政司都事。

陈珣桂林经历。

罗惟正

张恭长陵卫经历。赠父母。升四川布政司经历。

饶旃吴时清

吴时敏上林苑监典簿，升南雄府经历。

赖天伦临江府照磨，益府典仪正。

冯愈祥符县丞。

赖天瑚南海主簿，荣府工正。

赖士孚长乐主簿。

吴时雍序班，致仕。

黄实赖明任张必玉

陈祥广东布政司副理问。

黄廷诏按察司经历。

张仲儒京卫经历。

赖楠布政司经历。

陈兴贤陈达荣黄曦赖随邓天用林亮罗一鸞

叶春阳州判。

陈宏猷州判。

陈汝端提举。

王举尹断事。

黄文俊经历。

赖大荣留守司经历。

黄学知经历。

赖宗周州判。

张丰宠县丞。

陈允升主簿。

陈表琼州经历。

邓崇厚序班。

邓崇教检校。

掾仕

陈柏泯案牘。

曾传宗驿丞。

聂文潭大使。

陈光远典史。

王仕实经历。

苏钱塘典史。

李瑶驿丞。

张魁驿丞。

范节大使。

赖晃驿丞。

蒲世祯大使。

赖朝胜新兴主簿，升益府工正。

范彩大使。

刘瓘柳浦巡检。

范廷爵始兴典史。

黄世科长阳典史。

黄甲大使。

林达大使。

陈柏椿揭阳主簿。

管仁甫巡检。

黄元巡检。

赖易寿州卫经历。

游山琼州照磨。

陈自勋武康典史。

潘铨大使。

陈梁武昌狱官，襄府典仪。

吴应元为下历巡检。给由之际，闻母病，弃官。割股以心祷，母疾旋愈。有司旌之。君子曰：割股虽不可以训，然应元未尝学问，乃能如是，则其度越寻常多矣。

陈兴仁柅山巡检，升晋府典簿。

廖宜德化县丞。

陈自然马平典史。

邓仙佑信阳卫经历，升审理正。

罗钦黄县县丞。

林五美巡检。

黄贡大使。

杨灿大使。

刘尚虞叶坊驿丞。

罗世清福州大使。

陈志元徐闻典史。

林五伦回岐驿丞。

林元和义合驿丞。

赖元驿丞。

饶道南纳卫经历。

陈珙黄文魁

邓天仪揭阳典史。

邓天任汝阳主簿。

林思守

萧应璋典吏。

赖万纲指挥。

曾用卿巡检。

赖万拱典史。

陈必诚典史。

陈自默

张仲卿典史。

张柱崇仁、宁都主簿。

罗升旻京局大使。

张维章

张邦才经历。

游铉经历。

罗东里经历。

刘景奎经历。

余正忠经历。

罗一模经历。

游魁经历。

邓世贤经历。

陈以明经历。

赖大化太平府照磨，署当涂县事。

邓国祥检校。

范于邦广州卫经历。

冯素主簿。

黄近思主簿。

管祥见主簿。

范时大主簿。

郑廷彦主簿。

张周和新会典史。

陈礼驿丞。

曾存守太仓州巡检。

陈易贵池典史。

杨应梯主簿。

萧应璋典史。

陈思盛临海典史。

杨应鸮典史。

杨应举典史。

庄孔瑞典史。

罗世俊典史。

张子延典史。

陈尚魁典史。

陈善承典名。

康年谟巡检。

萧九成杭库大使。

刘世吉杭库大使。

邓维麟巡检。

许士焯巡检。

徐应丛吏目。

叶维蓬河泊。

赖铉驿丞。

江链巡检。

熊必胜巡检。

陈尧言巡检。

许士鼎瓜州巡检。

李可大驿丞。

罗一朴大使。

游日华巡检。

游显卿巡检。

陈政司狱。

徐应椿河泊。

康克昌巡检。

赖鸣雷巡检。

林启元巡检。

谢守俊驿丞。

余廷选驿丞。

陈三畏巡检。

杨兆林典史。

刘中立省祭。

例官

襄府奉祀正官张淳

除授河南崇府引礼官林五经

礼部冠带儒士黄廷谟

坊表

丛桂坊在学前左，一县科第题名。

文魁为辛酉科吴应雷立。

登庸为辛卯科曾守成立。

进士为癸丑科苏信立。

冠英为庚子科陈隆立。

双凤鸣阳为癸卯林腾蛟、谢昊立。

敕赠为佥事李杏父李彦升立。

南冈一凤为丁卯科林孜立。

礼官为鸣赞吴宏仁立。

鸿胪为序班管谷立。

进士为丁未科林腾蛟立。

联芳为庚子林腾鲤、癸卯林腾蛟立。

崇正慕古为封君林祥立。

贞节为节妇张懋妻赖氏立。

清贵为太监欧贤立。

敕赠为经历张恭父张宗富立。

双璧为戊午萧时中、甲子赖万均立。

天宠洵承为封君严奎光立。

卷七人物志

名贤

宋

陈世卿字光远。雍熙二年进士第，授衡州推官，调东川节度推官。时李顺寇两川，知州张雍部分战守。世卿素善射，独城一面，亲射中数百人。贼寝盛，同幕皆图自全，世卿正色曰：“食君禄，当以死报。焉用避为？”亟出，白雍曰：“此徒皆懦怯，存之适足惑众，不若遣出求援。”雍从之。贼既引去，世卿适丁外艰。雍表其材，诏追出视事，就改掌书记。凡七年，召为秘书郎，迁太常丞，知新安县。或荐其堪任宪台，即召归。会张铨出知广州，表为通判。将行，召见，赐绯，加太常博士。景德初，徙知建州。真宗知其才，逾月授福建转运使。规画南剑州、安仁等银场，岁增课羡，诏奖之。俄，代姚铨为两浙路转运使，历祠部员外郎、三司三勾院。大中祥符四年，改度支员外郎，出为荆湖北路转运使，属澧州、慈利县、下溪等四州。蛮入侵县地四百余里，朝命世卿与阁门祗候史方、知澧州刘仁霸同领兵讨之。遂还所侵地，标正经界，取其要领。又令纳所掠汉口千余，复置澧州、武口等寨以控制之。诸蛮自是平定，有诏嘉奖。还朝召对，尽述溪洞利害，真宗器其材。复自言愿效用烦剧。会郡晬知广州被疾，乃授陈世卿秘书少监代之，加赐金紫。郡有计口买盐之制，人多不便，至即奏除之。九年卒，年六十四。诏赠吏部尚书，录其子南安主簿俨为太祝，侃、卫、伟、偁并以恩补官。《宋史》有传，略。

邓肃字志宏。少警悟能文，美风仪，善谈论。李纲见而奇之，相倡和，为忘年交。居父丧，哀毁逾礼，芝产其庐。入太学，所与游皆天下名士。时东南贡花石纲，肃作诗十一章，言守、令搜求扰民，用事者见之，屏出学。钦宗嗣位，召对便殿，补承务郎，授鸿胪寺簿。金人犯阙，肃被命诣敌营，留五十日而还。张邦昌僭位，肃义不屈，奔赴南京，擢左正言。先是，朝廷赐金国帛一千万，肃在其营，密觐均与将士之类大约不过八万。至是为高宗言之，且言：“金人不足畏，但其信赏必罚，不假文字，故人各用命。朝廷则不然，有同时立功而功又相等者，或已转数官，或尚为布衣，轻重上下只在吏手。赏既不明，谁肯自劝？欲望专立功赏一司，使凡立功者得以自陈。若公状已明而赏不行，或功同而赏有轻重先后者，并置之法。”上从之。朝臣受伪命者众，肃请分三等定罪。耿南仲得祠禄归，其子延禧为郡守。肃劾南仲父子同恶，沮渡河之战，遏勤王之兵。今日割三镇，明日截两河。及陛下欲进援京城，又为南仲父子所沮。误国如此，乞正典刑。南仲尝荐肃于钦宗，肃言之不恤。上嘉其直，赐五品服。范讷留守东京，肃言：“讷出师两河，望风先遁。今语人曰：留守之说有四，战、守、降、走而已。战无卒，守无粮，不降则走。且汉得人杰，乃守关中奔军之将，岂宜与此？”讷遂罢。内侍陈良弼，肩舆至横门外，开封买入内女童。肃连章论之。时官吏多托故而去，肃建议削其仕版，而取其禄以给禁卫。若夫先假指挥径徙江湖者，乞追□(原文字脱，疑为“付”字。)有司，以

正其罪。因入对言：“外夷之巧在文书简，简故速；中国之患在文书烦，烦故迟。”上曰：“正此讨论。”故并三省，尽依祖宗法。及建局讨论祖宗官制，两月不见施行。肃言：“太祖、太宗法严而令速，事简而官清，未尝旁搜曲引，以稽赏罚，故能以十万精兵混一六合。自时厥后，群臣无可议者，今日献一策，明日献一言，烦冗琐碎，惟恐不备。此文书所以益烦，而政事所以益缓也。今兵戈未息，岂可揖逊进退，尚循无事之时？欲乞限以旬日，期以必至，庶几法严事简，赏罚之权不至濡滞。肃在谏垣，遇事感激，不三月，凡抗二十疏，言皆切至，上多采□(原文字脱，疑为“纳”字)。会李纲学虽正而术疏，谋虽深而机浅，固不足以副意。惟陛下尝顾臣曰：李纲真以身徇国者。今日罢之，而责词甚严，此臣所以有疑也。且两河百姓无所适从，纲措置不一月间，民兵稍集。今纲既去，两河之民将何如哉？伪楚之臣，纷纷在朝。李纲先乞逐逆臣邦昌，然后叛党稍能正罪。今纲既去，叛臣将何如哉？叛臣在朝，政事乖矣；两河无兵，外夷骄矣。李纲于此，亦不可谓无一日之长。”执政怒，送肃吏部，罢归居家。绍兴二年，避寇福唐，以疾卒。有《栟榈集》二十五卷。据《宋史》传考正。

明

邓文铿字德声。洪武十八年进士，任高州府茂名县知县。以治最，召入为刑部主事，累升至佾都御史。风裁独持，不畏强御。时贵戚有冒禁鬻私茶者，盖关边计也。众莫敢言，文铿独劾之，其人卒置以法。文铿亦坐是出知武昌府，又改知德安府，后转苑马寺卿，宣德元年致仕。原隶沙县。

陈隆字文升，安沙人。成化庚子科，任潮阳知县。清勤慈爱，兴学劝农，节夫马费，革左右浸渔之弊，政平讼理。复调任，潮人感恩，立祠报祀，题其碑曰：“循良遗爱”。其刑家孝友，可敦薄俗，平心率物，素重乡评。年至九旬，好学不倦，杜门教子，谢迹公庭，一邑称之。

李杏字子芳。至性天植，颖悟夙成。居父丧，哀毁骨立，敝衣茹素，庐墓三年。分巡郑制匾(原文为“扁”。此次校注，一律改为匾。以下全志同。)褒之。嘉靖乙酉，领乡荐，北上，中途闻母疾，即奔回侍养(原文为“待养”。按文意，参校万历《永安县志》，改为“侍养”。)，原当道所给廪金，尽还之官。母卒，居丧如丧父时。初任东昌府推官，坚持节操，极其清介，家人至不能堪。民谣云：“李侯佐府治，只饮东昌水；李侯奉院委，妻子吃榆叶。”巡抚彭、巡按傅并入荐剡。三载考绩，赐恩父母。擢南京大理寺评事，转本寺寺正，升四川水利佾事。巡抚罗称为“金石君子”。奉命采矿西番，不惮险阻，涉泸水，深入不毛。厂酋仰德，不敢逼挠。每日廩给，惟受蔬米，余尽还之。行日，驿吏折乾以馈，峻却之，地方人称为佛爷。竣事乞休，章五上，幕府始允。明日遂行，供账、馈饯悉不受，行李萧然。归处山林，结平川茅舍，耽嗜图籍，绝足公门。乡邻争斗者，或就正，或感化自解，足成仁里。提督谭疏其可用，荐于朝；提学蔡嘉其行谊，请为会宗。四川巡抚黄，委

承差乔升，以为应得柴马银七十二两，送至其家，一文不入私帑，贸田以供祀事，馀赈戚里之贫者。如赈范当成之后，恤赖成孙之孤，助杨弘道之丧，殓林隐士之尸。族孙李商故，遗一孤，为择乳母，给柴米抚养之。奉诏进阶，年八十二卒。遗命服用布素，毋俾越礼。乡人颂之曰：“居官居乡，功业一致；事君事亲，忠孝两全。”提学王案行先生宦绩、乡行表表，当道宜崇祀乡贤，以风后世。所著有身、心、家、乡四范、容、忍、谦、恭四箴。

曾守成字汝文，号白岩。登嘉靖辛卯科贤书，授新会谕，转任县知县。下车询父老风俗，兴利除害，比古循良。尝试士，拔其尤者，皆一时名宿多颉去。精于藻鉴。任之人至今思之，载之任志独详。时公以善书名，诗文词句清新雅逸，人士推慕之。会宪臬墨，佯以索书名，移一厘米来邑求字。公岸然草书数十幅以献，宪恚甚。随以忧归。阋满，为忌者所中，不复起。遂优游林下，与乡二三大老及其族庠生定斋公曾胤皆有声雷时者，相与诗书酬唱，适志禽鱼山水间十余年。凡所著诗文若干卷，惜未得行世。

林腾蛟字士才。二十六都贡川人。少颖悟不群，为文立就，每见义必为，无所避。邻郡同知刘奉委至，值国丧，县如常治酒、演戏，林曰：“是尚可以为乐时乎？”乃作书责以大礼，及旦，面上之。同知览毕，恍然曰：“幸教知矣！”明晨即引去。外父张仁卒于官，无嗣，旅榱不能举，腾蛟毅然往视。官贫任浅，为书上太守胡巖泉公，大称奇士，曰：“有婿如此，何嫌乎哉！”为之厚恤、区画，榱乃归葬。明年癸卯，乡荐第二，丁未登进士。初任新会令。见何、谢二巢负固肆凶，即督府莫能问。乃阳抚而阴图之，蓄战士及达官可用者，不数月，平何、谢二巢。未几，内艰讣至，哀痛中，计擒谢大珍，捣其穴，斩大用及其党无遗，人莫知其秘。服阕补休宁，擒巨盗某亦出常算外。时倭奴以五千众横行江南，莫有当者。时林以秩满过家，时中曾叩曰：“何猖獗如是，抑何策以拒？”曰：“无难，但练兵两月可尽歼之。”后闻谭司马竟以是平倭，而浙习兵遂有闻于天下。大抵豪杰所见，相类如此。其明年，召拜监察御史。时三殿毁，欲新之，财大诎，简书督南直隶、江南、湖广逋负。所至悉心规画，逋几完；余不完者，奏免之。上可其奏，蠲至数百万计。每有建言，明切时务，通达国体。如赣南条议六事与马船采木诸疏，种种可述。缙绅间咸曰：“直御史也！”寻按贵阳，命下二日，当要者忌之，遂擢河南按察司僉事。时伊府骄恣，黠货淫刑(原文“谣刑”，乃“淫刑”之误。)，僭逾制度，侵官舍，夺民居，强娶嫠妇室女，纵护卫士行劫以入资，凌辱缙绅，当事者莫敢谁何。腾蛟曰：“是尚可以已乎？吾当出身，为吾民争旦夕命。”遂按不法事数十条，从抚按劾之。上官勘问，无敢对者，腾蛟独奋前抵数之。伊府词屈。狱方具，遽遭疾，卒于官。遗命其子，必结竟其事而后殓。人谓其以尸置对，气概至死不移云。伊竟降为庶人，百姓称快。是举也，销国家数十年积渐之祸，故尚书王邦瑞祭文云，“有掀天揭地之功”。河、洛、汝、颍之民千余为扶榱出境，以防患也。仍为祠庙，在在祀之。惜其早歿，未为国家效大业，可恨也。

陈源湛字体泉，安沙人。弱冠有文名，由恩贡观光上国，日与孙先生柏潭、叶先生台山游，而聆其绪论，恍然曰：“吾向之所矜为赤帟者，只敝帚耳，洗虑以之。”癸酉，获隼南闾，任广东和平县事。理幽雪冤，兴学作人，多善政。巨寇江月照、叶英负险肆毒，骚动三省，已厚宸忧。公计诱而歼灭之，叙岑功赏当上上，有攘而蔽之者，仅得薄转高州府判，再转梧州府判，署府篆。入觐，抱病归，故。广士民请祀名宦，邑人士慕其孝友，亦请祀学宫，刊所著《四礼》、《四箴》、《奇门》等书行于世。

严九岳字海日，贡川人。温良恺弟(原文作“温良岂弟”。)，颦笑不苟。午未联登，任梧州司理，多平反。历五载，间署府县篆，除弊吏，革陋规，清政难以枚举。升北京户部主事，转郎中。督通州饷，念粮户运差之苦，随到随收，不淹晷刻。往运官粮，户艰于交纳，破产丧命有之，遇公则更生也。顷奉运内帑数万饷辽阳边，迟时日者罚无赦。公昼夜兼程以赴至，脚运羨余千计，悉付经略以赏士，而公之心殫矣，力疲矣，二竖为灾，谋解组归；以课绩升岳州知府，而竟不克赴。子应球，国子生，勉成先志，葬公于二十七都东华坑。光禄卿王化行撰墓铭。著有《笥存稿》行于世。而祠公于学宫，为无忝俎豆云。

赖圣谟字次典，改讳元吉。由乡举，任北直唐县知县。甫一载，百废俱举。狂寇万余自蠡县庆都入，所经辄惨戮。闻公预图城守，先集家戚属十馀口，积薪锁廨，呼卫卒团守，着有急即举火焚之，内顾无忧。于是召义勇，设矢石，更伏万人敌于隘口。寇至，却之，俘渠凶一，而馀寇以数十计，夺回男妇以数百计。然当御敌时，公从垛口覘之，一凶称神手，矢向公脑发，不虞向貂帽穿落也，众惊为神护。寇知有备，引去。而提督、总督之荐章且交上矣。斗大土城，保全无患，士民踊跃贺更生，而公则以劳瘁成疾，势渐危笃，乃待封乘。弘翁适从永至唐，睹其状，号泣几殒。公曰：“男不孝，有志未竟，不能以禄养，又不能以封请，老母遥隔，奈何？”余无一言。以柩归，永之士民临江而哀吊之。岂御难死节，抑人有同心耶？

罗明祖字宣明，号纹山，登天启丁卯贤书，崇祯辛未进士。辄欲辨红丸、挺击两案，而有虚馆以待者，虑负奇为负气，仅授华亭令。下车厘弊害，兴人士，造庐问请眉公陈，布衣而一时之强有力者，颌之曰：“是不畏强御者。”以忧归；阌补繁昌令。繁倚南北要冲，且无城。流贼方大春啸横其间，计歼之。两台上请超擢大宁，不获，谪越藩，署萧山。又以不屈，中官故挤之，调襄阳。时值楚闱分校，得士九人皆名士。独是襄寇炽兵淫，民不堪命。初请禁于提督熊，不听；继上书于阁部杨，又以拒。城不宿兵，中之。而襄国王之题留，亦不能以虚拘矣。归林下，捐资恤孤族，节若有以泄其未泄之愤。曩时，有生徒远启，问闻知交，密迹酬答，语皆国计民瘼，不及一私。而所著书三十卷，评书百卷，学者获见之，惟占候、星数未易窥其秘云。

儒林

林祥字时和，腾蛟之父也。幼失怙，鞠于兄，事之如父焉。重礼义，尚躬行。居乡平易和厚，而人不可干以私。诚信素著，表正乡间，虽巨奸大猾亦俯首就化，所居乡一时咸变工、贾之习，向文学，彬彬焉。同时，特善张仁、林元二人者，意气合也。如知县姚公仲韶、教谕萧公松时称正大，故语常駸駸入。后有士辈耽乐优戏，纵而忘倦者，忽自念曰：“使在县有如姚为长令，学有如萧为师长，乡有如林者为先达，予辈恐不敢如是放肆。”其系人思慕之正如此。以选贡授长沙经历，屡乞休致，知府勉留数数。时遇觐，里役致常路费，却不受，曰：“吾苦不耐北风，幸乘此归乡足矣。”归时囊无寸余，盖皤然不污者。人谓无忝乡贤之列。

张仁字守性，号常斋。居贫力学，取受纤芥不苟。晨炊或不举，意气自如。时有观化者，按学进讲，深加奖赏，有“贫而能乐，学而能守”之语，仍令竖社学以居训。且善楷书九成宫体，独善唐李商隐诗，其吟咏亦绝相似。竟以贡授南雄府司训，逾年，卒于官。惜无嗣，其婿林腾蛟扶柩以归葬。

范志统字勉承，梅岗其别号也。禀性醇朴(原文作“禀性醇模”。)，处家行己较然不欺。壮岁游庠，声名藉甚。数奇，仅以明经授泉郡惠安司训。捐俸修学宫，赈寒士，协赞邑宰，发粟济饥，褒烈给殓，非寒毡优为者。邑宰罗为诗以赠，督学沈有“博物洽闻，清操介节”之语。秩满升周藩教授。周藩属懿亲王，贤且明，而辅导之选非德望素优者，不能有是宠命，故有望公就国者。左江兵备使王公率子衿为劝之驾，而公促装归。晚年(原文“脱年”，似为“晚年”之误。)，性宗愈彻。著有《梅岗诗集》行世。其冠婚丧祭，一遵家祀，浮屠之教，一切弃之。诗书佑后，慈惠布流，至今犹载人口碑云。

郑魁号石泉，郑文质之裔也。公气宇轩昂，天性抗直，乡邑咸古处君子目之。由贡授山东日照县令。邑古青、齐地，沃野平原，便耕织，喜健斗，而寇警时出为难。公至为兴学、劝农、捐盗、除奸，民咸德焉。惜其盛气矫矫，有不便于民者，率直径陈，仅一载，解组归。有慰留者，公曰：“居官不清正则辱身，居官清正，不媚上，不为上容。复不奉身以退则辱身，并以辱亲。菽水承欢何人耶？”比行，而邑之绅衿、稚老泣留者，至三日越境始罢。公曰：“吾以一经贻谋，俾诸孙绕膝受教足矣。”不以一介易彼三公，吾于公深有景行之思云。

邓应龙别号剑江，三十二都人，前朝之贡宦也。公幼而敦敏，即能博记五经诸坟典，比泮饫而频蹶场。屋人曰：“此伯乐所由艰遇也。”己亥恩贡得元，授江西南安府判。粮务弊丛而出纳惟谨，讼狱惨闻而平反兢持。岂曰“长才必处以治中别驾之任，乃克展骥足”，而公之才固优，遇自穷也。公习琴，有贻公以爨下者，携之任。一弹再鼓，鸣琴而治。时司理林公某欲得之，公以为知音，赠之。而司理所钟爱者，又为守台所特赏也，郡之守林公某遂领之。盖郡守、司理及公皆闽人，以是相龢，遂各挂冠归。而公之归装萧然，居林下无徇请，无侵欺，百忍自持，一经是课，而扼腕于舆论，不无人、琴之感耳。

孝义

赖豫字立卿。性至孝，读书与俊秀选。幼丧母，制于父命，卜择风水未葬，将母柩暂安置郭外。豫哀痛迫切，衣服、饮食恒从俭陋，每言及辄伤感。嘉靖丙辰五月内，适水暴涨。豫同仆渡河，缚母柩于大树，抱柩哀哭，其仆招之升屋登舟，不从。既而水愈盛，拔树推柩，豫随柩皆溺没。尸入急涛中十步许，衣挂于树，不去。越二日，获其尸，如生人，皆惜而异之。知县陆策、训导李一潮上其事诸当道。按察使李公谓其孝行可嘉，檄祀乡贤。郡守彭公题其门曰：“孝子赖豫之门。”

陈珪字信卿。邑庠生，千户陈璨弟。璨管屯，值荒，责偿不能盈数。不忍兄窘，即鬻己房产赔偿。甘心蓬蒿，教读以为活。分巡道郑按县学校。上其事。檄下，制“友恭”匾奖之。乡官、佾事李杏书“友恭”二字旌之。

陈潮千户陈璨第三子。嘉靖三十六年，流寇入境，璨督兵往，潮从行。忽贼奄至，璨被枪覆地，将兵之，潮以身蔽其父，血流被体，仍负痛负父以免。知府周贤宣公书“孝勇”匾奖之。乡官李杏书“急不遗亲”匾旌之。万历癸巳，巡按御史陈按郡，仍加奖劝。

陈赤美三十二都籍，住在城。幼失父，竭力养母。年十六，母继丧，贫无以敛，自卖身于市民林贵家为之佣。作年余，幸拾遗金二两，赎身以归，人以为孝感所致。堂兄长孙老孤无依赖，赤美月给米，终其身。尝于途拾遗金三两，所亡金女子哭于道，因问其实，乃以所获金还主刘庸，不责报。赤美贫，自以身当本户兵役间。督府取各府、县丁壮者备从征，赤美与焉。福清之战，督府刘自负射，命中，为士率先，出不意，矢穷，陷贼伏中。亲兵不及援，赤美独力保护，犹奋刺二倭奴。贼遂披靡，乃得路回福清城北冈。贼追围不舍，赤美以势渐迫，乃奋身于万箭中，冒重围出报监军，遂得兵以归刘。后刘语本府知府周曰：“汝治下有民人陈赤美者，临阵英勇如此，汝识否？”周对以初任，出，使人访致麾下。及升海道，每剿抚山海寇，缚贼首杨益等，擒二十四将，皆借其力。其人素未读书识字，而能知大义；至于临大敌能斩贼，突阵护全主帅以归，亦足称奇矣。军门王以泉州功，赏银五十两，与张兴、许五妹等共分；军门刘以福请功，赏银牌五两；分巡道秦以下茂功，赏银五两；推官施赏银叁两；海道周以招龙头寨功，赏银五两；知县傅以“笃孝奋义”匾奖之，知县苏旌以“董芳独步”之匾。

乡行

郑文端号屏山，安沙人。幼鬻鱼盐，志气便直，每携载籍以行。年三十余，一旦，惕然曰：“吾奚碌碌甘流俗哉！”尽弃所事，遂往省从师。为学刻苦惕励，榻不安寝。如是者三年，精通《易》学，文多心得。以儒士赴省试，不第，曰：“此不足学也。”乃专心益精所学，生徒从之者日众。永之学《易》，自先生启之。年八十

余终。

林元号三溧。在城人。幼聪颖，家贫，刻苦为学。性执毅，不与常伍。诗自成一家，幽隐皆有考据，多逸气；文逼古，一书辄尽纸。以中多有奇字，不入俗眼，但以文名者咸咨之。尝作《霖膏心泽》、《平寇》二赋上。前御史郭尹亟以“高士”称之，敦请宾席。老益贫，节益励，无陨获意。易簀前一日，作诗手书辞交游，中用《庄子》“鸟鸢”语，谈笑而终。人咸以老不见用惜之。葬于城南之某里，士大夫题之曰“高士”云。

余俊寿余荆山人。质朴似未雕之璞，趋善如赴海之潮。解纷息争，信义孚众。辛酉，谷价腾踊，能捐值以贷其乡族。群盗入里，被掳，坐余六公于上，因以止杀。大参王云竹诗以美之，县尹许公徽词请为大宾。其孝悌行谊有足法者。

陈王政字师文，号璽斋。贡川人。家贫好学，瓶无储粟，读书不辍，处之泊如也。性仁慈，行醇谨。庚午科，中备卷，金宗师檄取五经书院读书，在诸生中甚有声，而谦退毫无先人意。有凌其贫以厉言侮之者，政不色怒，言笑自若。后其人悔曰：“吾为彼所容矣。”事父、兄孝友，乡评重之。侄宪故，遗老母及二幼子，无所归，政收养于家，一衣一食未尝先妻、孥而后嫂、侄。人称其行谊有古善士风焉。

赖本需字守用，二十七都大湖人。恬静好修，敛迹山栖，未尝一至公门。兄弟叔侄之间不吝捐济，恩爱油然。少业儒，为庠生，壮即弃去。菽水养亲，家庭雍乐，有不知三公之贵者。行年九十，敦行有如一，乡评重之。

吴成鲤别号云门，正直天赋，见义勇为。万历六年，下令丈田，罔不遵宦门田多粮少，挠言山路梯田难丈，抵摊浮粮报命，小民虚粮，怨嗟无告。时县令为徐侯谿，公上书建言：“皇恩不可隐，民瘼良可哀。”备陈丈法，果断行之。更沙、永接壤，田粮交错，永丈沙不丈，互相影射，弊窦丛生。”公更诣抚院劳公堪陈言：“正界各丈，弊杜粮均，割回沙粮二百石归永，派征一年，随产赋役，诚为长久之计。”有挤而陷之者，竟以他事沮寝。代巡杨公四知曰：“是殆为有粮无田之民苏困乎？使早读书于朝堂，上一万言书，天下蒙其休矣。”重君书言正直，从而释之。语云：“为善降祥”。君子以是知公之宜昌厥后也。在城人。

罗天长别号紫曦，贡川人。少有逸志，好山水，尤好《老》、《庄》、《抱朴》等书。尝贾水泛洋，达六鳌山，有异遇，遂厌珍茹素，探奇武夷。武夷固多显迹，有《吕祖百字碑》，众莫解。公能辨蝌蚪文，为句、比字，栉刊之以行世。其隐武夷峰者十余年，归结庐于栢桐、六龙窝、岩梁诸处。所讲周天易数，四方从游者日众。公家徒壁立，处之怡然，炼性修真，卒年七十有九。其子为明祖，负重名，岿然成进士，洁己服官，皆紫曦先生庭训之功多也。

赖秉弘大湖人。少习举子业，弗售，常励后昆曰：“以代吾孝养焉。”而公之质性谦恭容忍，不以贤智先人。里有忿争，必得公片言以解。产薄而好施，族蕃而能睦，邑人士视为仪羽者。时公年七旬余，邑侯刘公胤旌以匾曰“达尊有二”，公逊谢之。而公上侍慈闱耄耋，俯视孙子玉立，执经绳武，历稽史册，指不多屈者。公之母以九十余终，乃邑黄氏女素娘，称圣善也。公之长子曰圣谟，领天启甲子乡荐，改讳元吉，授唐县令，有政声。后裔有令名人以为公隐德，故徼于天者厚欤。

严应球字尊素，贡川人，太学生，户部海日公子。性温朴，不苟言，乐捐施，睦族戚。父没，事庶母马氏一如父在，凡家政悉奉若母训，未常稍拂。会岁谨，减价赈糴，乏者济以粥。时江右有刘氏医者贷于公，恐负愿，出妻偿。公闻之，急焚券。刘夫妇感泣交拜而家祝曰：“愿公代代如户部耶！”值凶穷，逋者实繁。公辄蠲其三年租粒不取。修里道，布杠梁，远近咸有给孤之誉。崇祯间，知县刘公胤、何公思两以“乡善”申，直指使李公嗣京匾旌其门曰“善庆云祲(原文作“善庆云仍”。)，光大黄堂”等语。嗟乎！薄俗颓靡，得如是之孝友乐善，实晚近(原文作“脱近”。)未数见者。约略其事，以备采风。

吴三风字常茂，三十都岭厚人。行超流俗，谊重乡评，捐资募勇，力退巨寇，保固一方。凡不能举丧者，舍棺埋瘞；荒年无以举火者，施粥赈饥；修路编桥，人无病涉。县尹陈公以“仁厚芳型”旌间。

忠烈

元

陈君用字子材。先南平人，后徙浮流镇。少负气，勇猛过人。至正末，红巾贼由抚、盱入闽，闽阉授君用南平县尹，给钱五万缗，俾募兵，复散家财以继之。道兵克复建阳、浦城等县。累官权同知、副都元帅。至正十三年，贼围福城，率兵散之，城乃全。遂引兵逾北岭，至连江阻水而阵。君用曰：“今日不尽杀此贼，誓不生还！”率壮士六十人，徒涉斩贼，溃复合，大呼转战而死。事闻。追封颖川郡侯，谥“忠毅”。现郡入乡贤祠。此忠烈也，见《府志》，皆列名贤之上。梓成，其裔、邑庠生陈一忠方录出，谨载于此。

义勇祠

义勇祠者，为乡总、乡兵赖德辉等而立也。嘉靖辛酉年，流贼罗元潭等突恣氛焰，屠毒城堡，官兵莫敢撓其锋。将至本乡，辉等倡议，谋金乡兵以御之。战于官亭，杀贼数十。贼势鸱张，设伏围合，前截后殄。辉等力尽，偕其党俱死焉。嗣后，乡之人哀其死事，为建“义勇祠”以祀之。来往通衢，景仰厥祠，每动义勇(原文缺“勇”字，为编者所加。)-之心，关系风化，不綦大欤。并附其名于左：

赖德辉赖德贤张永保张遵贤陈汉洪陈衢赖德孙吴琴陈华封邓元忠邓正岳赖思衡林胜荣邓瑞邓昌盛邓观保陈具陈兴儒陈文重陈志本陈大道陈通太陈复耕陈有仔陈进福陈成孙张燮张万元张德昭陈宠陈华虎陈德略陈尧宾王四五王希畅赖元赖孝纯赖遵隆赖元安

四月，小淘寇梁钦、梁显兄弟为尉激变，伙其党林土等众，劫林田，杀乡勇罗令居父子三命。其子生员贞亮诉上建祠奖恤，未报。

十月二十八日，贼沿途戮辱，至吉山屯扎。城内外子弟壮勇数百人，百户焦茂荣统之，为贼空营遗什物所诱，中其陷，死者七十余命。

十一月间，请大兵剿贼。至小陶，偶未备，中军许定国、千户陶国政、百户焦茂荣及军兵死者二百余人，独典史雷起鳌殿军，以全残旅。

十月十九日，贼从罗地甲出，乡总欧永汉、子弟兵王永节等追至石门桥。永节杀黑旗贼首一名请功；永汉力敌，杀数贼无援，并教师冯死之。

七月内，狂寇四面围城。阮参府统兵杀贼首梁钦一名。贼益众，粮尽援绝，至十月十三日城陷，被屠者以数千计。县令及尉、青衿及练总俱死之。

贞烈

陈氏安沙黄真胜妻。过门，夫遭疾，舅、姑尤之，送归母家，至废寝食。夫亡往哭，自经死。查道立祠，匾以“贞烈”。僉事查约改观音阁为陈烈妇祠。诗曰：“人间处处观音阁，天下寥寥烈妇祠。除却金身旌木主，不知公论是耶非。”又诗曰：“堂堂吊影未亡人，百计无如一死真。千载《柏舟》应绝笔，不图闽有玉田陈。”

陈氏女嘉靖十二年，流贼入境，掠其家，尽污其妇人。时女年甫笄，且盛色，贼胁以刀，乃坚拒不从。家人曰：“姑从，以缓死。”女号泣，怒骂，爪贼面流血，遂遇害。

六烈嘉靖庚申岁，流贼劫贡川。严师训妻邓氏抗声骂贼，贼以刀针其口，尚作咄咄声，至断咽乃已。邓林彩妻陈氏，延颈大骂贼，求死。贼怒，丛杀之，溪其尸。吴天性妻邓氏，被执过井边，给贼释手，跃入井死。罗正茂妻刘氏、罗正卿妻姜氏，妯娌奔舟，为贼所及，各相携抱子投水死。林佑女尼姑同母被系隙室，度不能免，乃拜母，缢而死。此六人者，妇人、女子甘死如饴，惟恐辱身，何异烈丈夫舍生以取义，杀身以成仁。呜呼，烈哉！

赖启娘年十七归庠生张懋。及期生子，而懋卒，抚膺大恸，誓为懋植孤。未几，子

又夭，姑郭氏怜之，谓曰：“汝夫死，又无子，吾且以承佑为后，给吾养，当遣汝他适，无以我老累少年。”启娘收泪答曰：“吾既不能立张氏后，又可失身以从人乎？”遂秉节不移，孝养舅、姑各八十余而终。邑有司白诸当道，嘉靖八年奏闻，旌表而复其家。

庄昭名家女。幼丧父，独与母居，邻人罕识其面。而年二十一归于赖五十，明年，生子璧，越再期而赖卒，人争窘迫之，百端不移。嫁女植孤，孝养姑氏。姑氏老无齿，日哺脂滑柔脆，以为养。璧甫成而歿，鞠诸孙，遣游国学庠校间，攻苦服勤。七十九而终。郡守彭澄修郡乘，首先采入。仍令教谕邓国宾祭节妇墓，揭以“冰玉流芳”之匾。太师徐少湖公序《柏舟遗乡》卷，谓其“标赤帟于三纲之途”云。

李寿娘生员陈钊妻。钊亡无子，寿娘二十三，居家守制，不逾闺阃，朝夕哀毁三年。一旦，姑魏氏继亡，寿娘事祖姑、家翁，孝敬尽礼。或劝其他适，涕泣言曰：“妾闻之：烈女不嫁二夫。且以夫之兄弟俱丧，翁更无嗣，陈氏之绝续，系妾之一身耳。倘得徼天幸，立陈氏后，妾死且不朽。且祖姑曾氏在堂，相依为命，安忍须臾离也。”乃誓死靡他，专事祖姑，晨昏起居，与之同榻。后曾氏得以善终而无失养之苦者，寿娘力也。迨翁没，族人怜之苦节，与立堂侄陈兴仁为子，以奉陈钊之祀。嘉靖四十一年，通学嘉其行，以状白学道，给“褒节”二字旌之。万历二十一年，知县苏制匾加奖，仍造其庐。巡按御史陈临县，以其事闻，加殊礼焉。年八十有五。

范氏贡川叶天赐妻。二十岁而天赐卒，现年七十岁，无子而守节。封君林祥为诗以美之。

陈氏二十七都赖元爵妻。年十九而夫死，遗腹生善节。守贫抚孤，至于成立。年至六十二而终。县学匾以旌之。

高氏贡川人，庠生严九峦室也。于归未几，夫郡试，从行以讷闻，氏几不欲生。守节养姑，四十余年如一日。抚台邹公维琯因众请，匾曰“孝节可风”。又奖云：“出生宦门，长归士室，夫死誓以身殉，幸而为未亡人。姑在，谨以七餐。伤哉！一生孝子，青年守志，白首励操，可谓巾幗中之丈夫矣。宜上台显旌，輿志载述云”。

刘氏邑故民杨九经妻也。内范是闲，中庭无间。经不禄，以遗孤故，不敢身殉。历几年所，孤克成立，而当道褒美。学师李有“青年荼苦，皓首金坚”等语。府正堂赵有“有子有成，茹蘖独苦。其事可风，其美可传”等语，是盖节妇之定评尔。

郑桂女陈汉杜之妻也。年二十六。丙戌二月，贼至，携幼女六岁夏蟾而逃，为贼获，入营欲污之。坚闭户，且诳之曰：“待女熟睡后开门。”贼不之强。随将女缢死

，倒投溺桶，氏亦自缢死。时即有郑冬女者，黄尾四之妻、郑应京之女也，贼至，奔避郑岭，遭擒，逼不肯行，骂贼，至剖孕犹喷血唾贼面而死。衿耆上其事于徐侯，令合葬，题曰“双烈”之墓。

郑氏安沙陈选士室也。十七于归，仅二载，生子琮甫，三朝而夫逝。氏哀毁欲绝，有从穴地下志。亲戚为解曰：“死节易，立孤难，而为其易，呱呱失所恃矣。”于是强起抚孤。稍长，和丸画荻，勉以成立。孤克承菽水欢，以孝闻。天启初，绅衿上其事，邑侯谭公鵬祀旌其间，且近褒于宁化彭公德馨，远驰于建昌益府，赍以“贞节慈孝”之额，而赞美有词曰：“著之于易，从而终为之，于礼爰有三从守礼一意，今古所同。维彼存孤，美哉母功，以为女纪，俾印休风，良重之也。”而孙枝毓秀，兰桂其芳，人以为贞节之食报云。

赖氏贞女贡川人，字黄中立，未适。闻黄讣，哀毁几绝，悬父母躬往吊，遂终制不还。为立后，纺绩度日。年逾九旬余。抚台张公肯堂给银四十两，为建坊旌之。其银为家众花费，坊建迄今未竟。

许氏邑乡贤金宪澹斋李公裔孙文钢继室也，生子长洙，甫三岁。先娶庄氏，生二子，长六岁，次四岁，姑七旬有余。时钢已早世矣，氏年仅廿四。勉事孀姑，数十年如一日，以孝闻。至抚二遗如己生，绩课之余，每励其子以继家声。学师李公于蕃、府正堂赵公秉枢俱有奖语详上，以俟褒旌。

林氏善民有鹄之女，适于陈姓二子。明末，寇屠城，士女奔避山寨，苟全残生。戊子冬，大兵剿，复系累幼妇，氏与焉，索赎无可得。氏思：“经宿，此心难明。”乘间，遂自缢死。父弟以尸殓，颜色如生。

吴氏贞女邑民游景芳之妻。丁亥岁城陷，为贼所获。强污之，不从，是夜遂自缢死。

黄氏邑民王珙之妻。为贼锁禁，欲辱之，抵死拒命。贼知不可夺，姑舍之。其夫来赎，氏曰：“我只以一死相谢，无颜相见也。”遂缢死，以尸归。

黄中正邑庠生。丁亥冬，贼进城。义不受辱，亲取麻索数条，分阖家男女，令自尽。长男良诏十七岁；媳李氏，教谕遵乾公之女，十八岁；女如妹，十五岁；幼男良谕，甫五岁，同一横柱登时缢死。贼知，救莫及，惟幼男谕获苏。

陈氏菊香安沙人，赖孙盛之发配也。盛习儒业，就县府试，辄居二三，而蹶于道试。万历二十二年七月，全闽大收，盛再期脱颖，而阻于茶洋凶滩，舟坏而没。时氏年二十四，遗孤成文甫三岁。氏闻夫变，号泣累旬。夫柩归，治丧毕，即自经相从地下，家人不能为防守也。孤成文，邑庠生，方谋呈上表，扬氏节，又不幸早世。

今已论定，故特录之，以见幽芳愈久而愈著焉耳。

吴之俊邑庠生，一门男、妇数口。贼进城，有夙与俊隙者，鸩凶尽歼之，焚掳其产物。同时，诸生林馥者以守城被杀，诸生李秉铎者以骂贼自缢，皆一时殉难之变也。

四烈者皆贡堡人。贡堡之有六烈祠，其来尚矣。过斯祠者，辄留连咨嗟，至欲泣下，则其生气今犹在人世间也。今复有四烈。明末寇起，贡川庠生林尚幹，妻罗氏，与夫及子同避贼，遭擒。氏惧辱，乘贼间，即自经死。林安居妻严氏，被贼获，欲污不从，百端诱之，竟不从。贼怒刳其肢体。又冲村罗立妻刘氏，黎明，贼突入门。氏出走，贼拉入床，欲污之。力与贼抗，复肆愤骂，被贼刺死。又刘麟生妻严氏，猝遇贼，被擒，将污之。怒咬贼臂，贼怒，遂连砍数刀死。此四烈者，当与六烈后先辉映也。

杨敛字学生李舜元；杨韶，字李舜明。癸巳十月二十一夜，山寇吴赛娘闯入贡堡，敛谓夫曰：“事急，惟死耳。君可卫舅姑从间遁出。”遂自缢。时韶携二子登屋上，度不脱，欲投火。贼掠子，驱之下，曳之不前，连毙其子。韶拾子尸大骂，肆击之，被数刃，犹喃喃不休，及劈其额而绝。呜呼！从容就义，慷慨捐躯，皆烈丈夫事，而二妇死事似之，且出之一门，较前六烈、四烈为尤难云。

刘氏立娘邑民张子志妻也。十八于归，生二子可崇，甫二岁，逾笄而寡，孝养舅、姑。家翁庠生天叙命曰：“汝今夫死，田仅二亩，能抚吾孤，植汝节乎？”立娘收泪应曰：“立名立节，实夫家之芳闻有继也。”遂守孤不移，勤劳纺绩，教子读书，鞠诸孙游黉序。氏近八袞。顺治十七年，通学举呈陈侯，旌以“节孝慈寿”之匾，嘉其事实曰：“苦节懿行，允励世风，且勤奉侍，画荻有声”云。巡按李公仍加匾奖赏。复经府、县勘结，急题俟褒。

武功

邓授二十六都人。授四川卫指挥僉事。邓昂，即授之孙。

魏才二十七都岭后人。湖广辰州卫指挥，升四川行都司指挥、僉事。

刘贵二十六都人。由陈氏旧军授汀州卫镇抚。刘胜即贵之子，袭父职。

俞顺二十六都人。昭信校尉、平山卫百户，调金吾卫百户。

陈再兴二十六都人。授徐州卫百户。子陈顺，袭父职，调云南楚雄卫百户。

陈铭二十七都人。授山海卫百户。孙陈通，袭父职，调睢阳卫百户。

高桂二十五都人。授南海卫千户。

陈徐驴二十六都人。授云南昌化卫千户。

陈旻三十二都人。授万全碣石卫百户。

萧府晋二十八都人。袭镇海卫百户。

陈石兴安沙人。景泰三年，剿邓茂七有功，两府奏最，应授指挥使。

邢肇新在城人。顺治九年，通邑保举团练，乡勇赖伯行、黄六德、张贞吉等附之。剿贼有功，详上，以俟旌赏。

武功

邓授二十六都人。授四川卫指挥僉事。邓昂，即授之孙。

魏才二十七都岭后人。湖广辰州卫指挥，升四川行都司指挥僉事。

刘贵二十六都人。由陈氏旧军授汀州卫镇抚。刘胜，即贵之子，袭父职。

俞顺二十六都人。昭信校尉、平山卫百户，调金吾卫百户。

陈再兴二十六都人。授徐州卫百户。子陈顺，袭父职，调云南楚雄卫百户。

陈铭二十七都人。授山海卫百户。孙陈通，袭父职，调睢阳卫百户。

高桂二十五都人。授南海卫千户。

陈徐驴二十六都人。授云南吕化卫千户。

陈旻三十二都人。授万全碣石卫百户。

萧府晋二十八都人。袭镇海卫百户。

中贵①

(注释：①该标题为编者所加，以与目录对应。)

内官

欧贤二十九都人。正统己巳，选入内廷。颖敏好学，识理道。天顺改元，以长随转奉御，升御马监右监，寻迁左少监，未几升太监。宠数优隆，赐蟒衣、玉带，免原籍赋役，令有司起第。

英宗遗命司香裕陵。越成化甲午，改景陵监堂印。寻奉敕镇守居庸关，赐蟒衣一袭。时边报不宁，移镇陕西。辛丑，奉敕审录罪囚，多所平反。癸卯，削平洮贼，赐白金表里。甲辰，关中大饥，贤与都御史郑公时请内帑银百万两买粟。公曰：“有银无粟，民终无济，亟请拨漕运官粮抵汴、赴陕。”朝廷可其奏，全活者十五六。乙巳，民方凋瘵，春耕不给。乃出官廩所蓄豆谷，给散军民为种，其惠甚溥。是年冬，贼入靖虏，躬率官军兼程而进，斩首千余级，获輜重、驼马无算，赐敕奖论。宪宗皇帝得报，岁加禄米十五石。迨孝宗即阼，有白金、彩段之赐。是年冬，虏犯兰靖地方，与巡抚亟修堑以断贼归路，果一鼓而歼之。庚戌，啰哩入寇，即移檄守臣扑灭，未浹旬，悉就擒戮。又获宝钞、文绮之赐。辛亥春，复赐蟒衣二袭。及卒，遣神宫监太监刘忠谕祭。公天性淳朴，无崖岸、骄贵之习。训诸子侄，毋恃势位，各安本业，亦不为营求以叨爵秩，又绝他生福利之念。太师张懋谓：“昔马存亮、杨复光之弭乱讨贼，郑众、严遵美之辞赏避权，吕强、张承业之忠亮朴素，出乎其类，欧公兼有之矣。”故备书之，俾来者视以为式。知县苏民望志

仪宾

陈澈金二十六都贡川人。为岷府仪宾。五代孙陈文奎，今为唐元王府仪宾，占籍湖广武冈州。

期寿

陈庆年一百一岁，吉山人。

吴茂年九十九岁，在城人。

赖宗镛年九十岁，大湖人。

李荣年九十七岁，在城人。

寿官

麻定年九十六岁，在城人。

饶维岳年一百岁，在城人。

吴成鲤年九十六岁，在城人。

范儒年九十六岁，安沙人。

赖士畅年九十四岁，大湖人。

刘德胜年九十九岁，在城人。

卷八杂志

祥异

嘉靖二年三月，太平坊火；六月，仁义、安仁二坊火。共毁民居千余家，有司赈恤被火之家。

三十五年四月二十四日，大水，漂去民房以千计。

三十六年，流贼李有胜、张石秉劫掳贡川、金井，杀死军馀三十六人。

三十七年，广贼劫贡川，杀戮、烧毁过半。

三十八年十月，马骝见大类黑眚。

四十年，饶平贼苏阿普等抵南城外，烧毁房屋并唐王庙、西桥。

四十一年，三十都民邓兴，以平米为名，啸聚流劫者三年。江广军门召曾婆婆兵，本省军门发李游击兵攻剿。周知府招降苏阿普、赖忠潭、傅诏五等，贼始平。招安之际，邢存嗣、朱继文周旋其间，勇义服人，功居多。林天赠南营统贼兵，十六年而散其党，地方以宁。

万历三十一年三月，哄传怪异，或人形，或兽形，或绕梁排闼。男女昼夜团守，至用桃枝求神符，驱之方息。

四十八年暑月，南门外马岭岗木塔有狐崇痴汉，为迷者众。时正午，霹雳震之，妖殒塔心，砖存。

崇祯七年三月末旬，西门外异火烧叶家楼、黄宅车，延及南门外，居民瓦砾，唐王庙岿然无患，疑神灵护之。

九年八月初二，唐王庙边失火。其曲櫺巷、梨仔坑远近尽毁，庙又安然无事，信神之显也。

崇祯十七年正月元旦，日蚀。上元，月蚀。八月初一日，晕数重，巳、午、未三时方解。

乙酉年八月间，汀、漳流寇数千，从南门外攻城，火燃，西、北二门尽毁。时县令徐率兵民守御，发炮击死贼五人。阅三日，几陷。以内应被诛，群贼宵遁。

顺治四年四月间，淫雨淋漓，不计时日。城内外民房坍塌，四野田亩漂崩千数。上司来文，县查报灾伤，赈恤豁免。

顺治八年四月初十辰刻，小溪水涨滔天，观者丛于西桥。倏然桥毁，溺死者三十余人，滚去民房、舟车不可胜计。

丘墓

宋

陈世卿墓在县北二十七都。夫人罗氏附葬焉。王安石撰碑，铭世卿墓。曾巩撰神道碑。

明

林腾蛟墓在二十六都金山堂。金事詹莱撰墓铭。

李杏墓在二十七都畚里。参政黄钟撰墓铭。

罗明祖墓在城北二十七都瑶田。参政陈道辉撰铭。

寺观

寺观

高飞寺在县东北隅城内。唐中和二年建，明正统间重建，为祝圣道场。历代远，圯坏，更易。丁亥冬，贼寇后益颓落，百灯几覆。知县陈廷枢目击怆心，捐俸招僧，鸠工修理。近得次第改观，亦一时弘丽也。

栢榈寺在山北岸溪入数武许。创自晋，天福五年建，宣德五年重建。崖壑奔放，林木蓊然，如龙蟠虎伏，云蒸霞锁，时有仙子摇曳其中。历今近千百载。凡名流韵客、维舟探胜者，墨迹鳞堵，不可代记。

上灵峰寺唐天祐二年建。

进福寺五代间建，成化二年重建。二寺俱在二十四都。

同化寺唐中和四年建，宣德元年重建。

善积寺唐会昌元年建，正德三年重建。二寺俱在二十五都。

宝应寺在二十九都。宋景祐四年建。

禅林寺宋大中祥符六年建。

宝林寺元延祐元年建，景泰三年重建。

招化寺唐会昌元年建。三寺在三十都。

小进福院在二十四都。

翠云院二十五都。宣德四年重建。宋陈世卿、张君谷肄业之所。

大进福院

上景福院唐贞元二年建。上二院在二十八都。

保宁院

五峰院上二院在二十九都。

永庆院

天盖院

感恩院

感应院

德兴院上五院俱在三十都。

永安院

上保福院

恩福院唐大顺年间建。

西明院

新兴院

东莱院

报恩院上七院在三十一都。

小佑院

新丰院唐龙纪元年建，宣德八年重建。

上安仁院唐景福二年建。上三院在三十二都。

观音院四十一都。

福岩院四十二都。上二院俱周广德三年建。

报恩院晋天福元年建。

福寿院宋建隆三年建。上二院俱四十三都。

永兴庵宋咸淳元年建，景泰三年重建。

东华山庵

西华庵

新岩庵正统十二年毁于寇。上四庵在三十五都。

慧照庵在二十六都贡川。宋咸淳元年建，景泰三年重建。

秀峰庵在二十六都余荆山。宋建炎元年建。隆庆间，余寿重建。

东山庵在益溪。

斗山庵宣德、景泰年间重建。

白云庵斗山上，元延祐元年建，宣德四年重建。三庵俱在二十七都。

石笋岩院二十八都。宋咸淳元年建，正德元年重建。

天台山庵慧真和尚、原蛟精成人者居此庵而化，今废。二庵在二十九都。

龙安庵三十都。宋绍兴元年重建。

招福庵三十一都。宋德祐元年建。

善福庵三十二都。元至顺二年建。

通天岩庵四十一都。景泰三年建。

三官堂西门外。嘉靖间建。

真武堂卢后。陈真焕建。

观音堂西门广宁桥尾。隆庆二年十月二十八日，系王仙祐创建，刻祀观音佛五尊。乡官李杏勒石记。

龙兴堂县北。元中正统三年建。

积庆堂元中统元年建。

南华堂

高明堂

杨后堂上四堂在二十五都。

龙凤堂二十七都。元至顺三年建。

瑞峰堂四十一都。宋嘉定三年建。

南城堂南门外，曾氏家祠右。有真仙庙。

夫人宫登云塔下。知县郭仁建。

东岳宫

天妃宫二宫在贡川堡。

崇灵宫余荆山。宋熙宁进士余括、余授。余授读书其中，诗云“我爱当窗山献秀，四时不了眼中青”之句。

临水堂在二十五都。

登云塔南门外，与学宫对峙。一笔凌霄。毁于火，万历十九年，知县王廷绣重建。

凌霄塔在北门外。万历二十五年，知县张守让重建。

正顺庙

晏公庙

名山庙上三庙在二十六都。

瑞峰阁县东。宋嘉定中建。

观音阁东门内。二阁巍然，为县补空障缺。万历十八年毁于火。

临津阁二十六年都固发口渡岸。元至正(原文“年正”，乃“至正”之误。)二十二年建。

梅斋阁二十五都黄梅岩之下。宋左正言邓肃建。

义斋

大湖举人赖福建，以教乡之俊秀。

养济院

原在浮流仓之右，知县裴建改北门外演武场前。知县许培之修。万历二十一年，知县苏民望又于本院内及厉坛前空处，共增架十六间，以居残疾。

漏泽园

在东门外五里龙喷坪。周围有墙，立义冢石在焉。后增南门外康坪。父老咸谓来龙之处，具呈禁止，于龙喷坪一处理瘞。百姓贪近厌远，多就康坪。

仙释

唐裴头陀尝以铁履渡江，来居栢榈山。剪荆棘，结草庐，趺坐其中。座侧石窍日涌米二升以贍之，客至则增。后人凿而大之，米不复出矣。

通公不知其代。《仙篆》云：王公传蓝公，蓝公传通公。三十一都蔡地原人。自幼素，长为曹岩张家佣。一日耕田，众拔秧，公坐田畔不事事。俟众秧毕，用手一挥，数亩田即栽讫。又能返水上行，令田不涸。约日去，众环视之，不得间。撒树叶溪中，成鱼，众趋观鱼，即坐化矣。乡人塑其身，祀为生佛。祈晴祷雨，其应如响。近年被蔡地原人取其中指，灵迹遂减。

马氏名五娘。二十七都铜盘人。父马大相，母罗氏。广道元年正月十五日生，容貌丰美。及笄归婚，是夜，身中毒病，夫家弃还其父。父请僧徒送河边，将沉之。忽云雾飈起，有神附人语之，降童引上百丈岩头，得仙果食之。二妹及嫂杜氏来看，五娘以果分与之食，俱得飞升，云是九天玄女度之。今铜盘殿，其祖居地也。及百丈岩、上坪、云峰洞，三处皆有显迹。乡人以木刻像祀之，随所祷祝皆应。唯云峰洞木像一出，即大风随起，彼二处则不然也。

黄天玄未知何乡人。住持宜福观。秘传符篆，精五雷祈祷之术，祷雨辄应。后至新庵洞石龕坐化。

卷九艺文志

永安县治记

(明) 编修(清流)赖世隆撰

皇帝继统改元之二年，沙县寇悉平。诏以浮流险要之地，分置县以治之，赐其名曰永安。是年，始命古舒韩君隆来知县事。又明年，政既通，乃聚材鸠工，首建县治，定其規制。不逾时，厥功告成，请余记之。按郡志，沙县界于尤溪、将乐、清流三县之间，尝多盗贼出没，而浮流实当其冲，屡遭焚掠。正统间，御史张君淑因通判倪君冕之言，以沙县地远且广，上流三百馀里溪岩险迳，寇巢穴其间。官民睽隔，无以葺奸宣惠，欲奏请分县，予时亦力赞其言。章既上，朝议已允。有司徇私，事遂寝。末年，贼大作，闽中诸邑无城廓者多残破。虽命将出师，诸贼犹分寇旁郡。闻官军次沙县，令有司招抚，乃解归，遣老弱者伪(原文“为”，应为“伪”字。)降。既班师，贼再反复。业馀民重罹祸而死者，又不可胜数。

朝廷乃敕镇守官、今尚书薛君希琰，总督福建、江、浙诸军讨之。至是，在闽诸大臣及有司莅事者皆能协心合谋，赏罚有章，将士用命。官军民丁始皆奋勇杀贼，直抵浮流以上诸境，斩俘以万计，余贼乃服。事平，佥议经久之计。倪君仍申前议，以余言为质，薛君俱陈其便宜以闻，于是浮流置县之议乃定。遂分沙县二十都上保至三十二都，暨尤溪四都之地以隶之。筑城为之保障，分军为之守御，建学为之教育，凡官府之所宜有者，皆视他县。永安既城，实为延平上流之镇，诸邻县恃以为安矣。嗟夫！不因乱，曷以治？不有废，曷有兴？然治兴于前者，又当保其不废于后也。

今永安因寇乱而新创，韩君首为之令，能抚绥其民，以成县治，可谓其治于前矣。后之继为县者，尚思置县命名之意，保其治于不废，则民得其安矣。民得其安，则官亦安矣。上下相安，然后可保其治于永久也。予尝招捕躬历其地，而知其实，故韩君请记，予亦不辞，敢书其概，以告夫来者。

新建永安县儒学记

布政(三山)黄泽撰

学校，育材之地，风化之源，自古有国家者之所慎重也。我太祖高皇帝混一区宇以来，列圣相承，而于学校之政尤加意焉。故内而京师，外而郡邑，莫不建学，以育天下之英材。由是，八九十年之间，髦士汇进，治化大兴，视唐、虞三代为尤盛也。天顺纪年之初，永安儒学新创。既成，知县、古舒韩君隆驰书具其本末以告曰：“永安地名浮流，属于沙县。正统末年寇作，上命尚书薛君希琰总领天兵讨之。景

泰二年寇平，金议沙县山溪广远，民居四散，政教弗克遍及，莫若分邑治之。薛公俱陈便宜以闻，始命置县于浮流，周围筑城，匾曰：‘永安’。于时，隆来知县事，乃与初委通判、交南杨君季琦，既而经历、江阴秦君惠，鸠工聚材，经画规制。首及学校，建大成殿，翼以两庑，戟门、棖星门前后布列。继创明伦堂、东、西二斋、神库、膳堂，次序毕举，圣贤遗像亦皆塑饰。经始于景泰乙亥，计其兴工虽不久，而迄今有成，宜纪于石，使后人有所考见。愿其文以记之。”

余惟化民成俗，必本于学校。兹学之设，既择师儒以掌其教，又广生徒以充其额。训之以礼义廉耻之方，申之以孝悌忠信之行，将见斯民有所感慕，皆知为善，而风淳俗美矣。其士子作养于兹者，尚期立身行道，致君泽(原文“择”，应为“泽”字。)民，以为斯学之光，庶不负朝廷建学之意，与有司创立之功矣。是为记。

成化八年重修永安县学记

洗马(四明)杨守陈撰

永安，我国朝析沙、尤所置县也。学宫，政化之本，有司所宜先务。前此，草创而未精备，会乱，刘公忠器以名进士知县事视篆来，率诸生门奠谒毕，首举学圯宜修、阙宜广者。退与同寅贰令陈公铭、判簿汪公广、幕宾冯公琬、司训徐公让捐俸首倡之。邑之同义者，争先乐助。环宫之墙，百堵皆作，圣宫、贤庑，葺而新之。改筑明伦堂、棖星、戟卫二门，皆极宠丽。肄业有斋，休宿有室，庖、湑、稟、库各有所。栋桷之挠朽易治之，瓦盖砖级之陟剥者丹白之，漫漶不鲜者更饰彩绘。功始就绪，而刘以内艰去。陈君辈益勒弗弛，殫心力而集之，务臻厥美。经始于成化壬辰，落成于明年，凡所宜有，莫不毕备。皆真材坚璧，视旧规穹然增而高，焕而美矣。乃者以书币介乡贡进士、同郡冯君忠来以记征。

余惟永安为闽之沃壤，而闽故为先哲诸儒辈出之乡。永虽新邑，而何地无才？然游其间迄今二十余年，而未有歌《鹿鸣》来者，意前有司视学校为虚观，作兴未加之意。方圣天子益隆文教，而又得诸公以修举之作兴之，而被以思乐芹藻之化，则他日科第联翩，岂无炳炳德业若先哲者乎！且闻落成释奠之余，庙庭有桂，小而能花。夫前者后之占，天时者人事之验。适郡工告成，而嘉祥随应，是必有符合矣。诸所游者，饰而学，志而道，出与时会，大行其所抱负，无以负朝廷养育之恩。与诸公作兴惓惓，可并出以俟。是役也，度材植，令工佣，则曾、孙、吴、应，亦皆以义而起者云。

弘治十二年重修儒学记

提学副使(晋江)蔡清撰

延平府故无永安县。景泰初，当道者征邓茂七之乱，始请于朝，析尤溪及沙县之接壤处别为县，以便治。县建于景泰壬申年，而儒学则建于甲戌年。主建学事者，知县韩隆也。继是重修而增建者非一，各有纪载。至弘治壬戌，学弗戒于火，自大成殿而下一归于尽，所馀亦皆残敝弗堪。知县事、临川刘君灿曰：“永安土瘠民贫，官亦不暇给，而复重以此，奈何？然此化本所在也，庸何缓乎？”乃集僚佐及师生，图所以重建之方。用申于当道，得报可。遂经画百费，皆酌民力处之。有不贍，则自出其数年例所得于官者。若堂食、纸札价之类，悉以克之。肇工于弘治癸亥年十一月初七日。故址之卑者崇之，隘者广之。位置概因其旧，而间有所前却或改张，惟其宜也。中为大成殿，翼以两庑。殿后为明伦堂，翼以两斋。殿庑之南为戟门，戟门之左为四贤祠，右为文昌祠，又为南泮池，为棂星门。明伦堂之后为青云楼，楼之右为会饌堂。两庑之背为号房，各二十四间。西庑之北为神库，东庑之东、越路为神厨。而学之通门则居棂星之左。木石甃筑之类，色色务于精致。若夫神像之塑、神主之立，尤加谨焉。此其大凡也，其细者不必录矣。是役也，君常与县丞吴禧、凌谔，主簿祝俨、沈澜，典史邓汉，相继旦夕程督之。而选用耆彦曾仲纪、童昌董其事。故仅越岁而就，落成(原文脱一“成”字。)之日，戊辰之吉也。教谕韩颺、训导林谷谓是役所关系不细，乃以书详其事，遣门生吴昂来请记。且曰：“刘君发身乡进士，志慕古人。其治永安也，惠深而教洽，故其举，役虽重且繁，而成功之速，则有在于程督之外者。然则刘君其可谓之贤也已。因具书为节其要而次之如此。”

嗟夫！贤令长之所以汲汲于此者，要以为国家育才计尔。而永安人才于今日，指盖未可多屈，岂其以新造未久之故耶？耳目所及，如广州之顺德，台州之太平，亦皆因寇乱，析他县馀地创建者。考其时，顺德之建与永安同年，太平又稍后。今二县人物彬彬辈出，至有魁天下而赞皇猷者，其学行、事业，永安人士宜有得于见闻矣。况所谓四贤者，皆产在数百里之内，其风韵未远也。诸士子日肃过于殿庑及四贤祠，其神志之所游当何尚，所务当何在乎？亦可以深长思矣。夫圣贤之盛德大业，嘉谟懿范，悉已收之载籍之中，学者日事乎此，苟得其的，而不至于买椟还珠焉。其效岂止于科第不乏人，足为学校之光荣而已哉！而亦岂止为永安一县人物哉！责人则明，愚于是乎不能已。

万历二十一年重修儒学置田记

修撰(侯官)翁正春撰

永之有学，盖自景皇帝时沙寇平，议设县置令，以广德化，学宫与县治并设云。弘治壬戌，毁而复建，主者弗虔其事，规制多不如度。历岁久，庙宇就圯，大非所以妥圣灵者。且自隆庆癸酉来，科第寢微。诸逢掖有执堪舆家之说，归咎学宫，谓明伦堂前左右两夹道门宇低塞，其右逼近白虎；而棂星门去庙远，明堂旷荡不收，士挟策战文场弗得隼。职此之由，甚欲扫而更之。

会今邑侯苏公莅永之三日，遵故事谒文庙。心知其然，遂锐然以修学作人为己任。诸青衿有以前说进者，侯曰：“嘻！堪舆之说，圣道之所不载。顾多士入焉而溺，雄心锐气多因之然不振，是宜亟为改图，以释尔众之惑。矧昭代以六事察守令，校其首。兴废振弊，匪令畴尸，多士即不言，余固惻乎疚怀矣！”分守建南吴公行部，侯上其状，报可。于是鸠工庀材，诹日僦功，值视物，工视力，经理有方，绩用成而民不知。撤两夹道为通衢，旁列两屏如翼，进棂星门五丈许；泮池旧方广，今裁之为半壁形；移学前右坊，以辟白虎。向诸士之溺而惑者，一旦犁然释矣。由是，文庙焕然，视昔尤壮丽。他若两庑、两祠、尊经阁，多仍其旧，鼎新付之七八。计所费镪，凡百十餘缗。又念诸生中有贫不克婚，丧不克葬，齋粥乏兼辰之储者，皆当为之计画。乃又出镪三百缗，买忠山苗田六十六石，查出永留庵苗田一十六石，以为学田。侯皆亲履町畛，图其形以杜弊窳，俾诸弟子岁取给于是，庶几贫者婚，贫而丧者葬，齋粥偶乏者因之有备也。

嗟嗟！学校，守令之先务。俗吏所为急，乃斤斤簿书期会。间即有茂才异等，亦惟发奸摘伏为智，风行雷厉为威，谨迎送，望风旨，市宠猎名以为事，而于学校不啻弁髦。甚者传舍其官，狭小其地，谓古者国小，不备其制。殊不知家有塾，党有庠，即世家富室爱其子者，肄业有所，隆师有礼，靡所不周其图。矧铜章墨绶，俨然司一邑之民土，而于建学立师之道，藐焉弗撓诸怀，视其子弟贫若秦人视越之肥瘠，则为民父母之谓何？今苏侯通经术，明世务，每以文学饰吏治，而修学置田之举，有大造于永庠，作用若是，亶足称儒吏者。“汉”、“史”所载诸循良，可并谈欤！

是役也，经始于万历癸巳夏，落成于是岁季冬。董其役者，县尉陈君策，耆民邢存志、饶偁。征余文记之者，庠师苏君日登、杨君继秀、李君南闾，弟子员则饶俨、余俊鹄也，例皆得书。侯讳民望，字子仁，冲谷其别号，直隶宁国之宣城人。

永安县学建立乡贤名宦祀典记

(三泉)林腾蛟撰

永安故沙隶地，景泰间始割置邑。层峦叠嶂，江汇川渟，鸢孕灵秀，笃生哲贤，以名于世。第土瘠民贫，俗狃而风劲，故吏兹土者，辄病于安辑之难。呜呼！是岂难于治哉，亦难其人耳。

吾师万安梅川萧先生来典吾庠教事，修学宫，备祭器，严课业，厥有成绩矣。又病吾人之无所观法，而民俗日偷；师帅之不得其人，而民生日疚。乃喟然叹曰：“表德以垂范，崇祀以明典，非教化先务耶？”爰考载籍，博咨故老，咸啧啧然称曰：“宋了斋陈忠肃公瓘，守正不挠，在谏垣知无不言。其大者，辨王安石之邪说，斥惇、卞、京、布之奸。而《尊尧》之集，耿耿乎足以明君臣之义。大宋栢桐邓正言

公肃，当徽、钦、高宗朝，遇事敢言，进《花石纲》诗，哀留李忠定，劾耿南仲父子及臣伪楚者，其尤凛凛也。明，忠山邓都宪公文铿，持正风裁，不畏强御，肃边执宪，贵戚敛手避之。此非产于永而名于世者乎？”又称曰：“故知县邓公概，以名进士出牧兹邑。时邦逢新造，民狃宿顽。公敕以廉明，裁以威断，以十条与民约，而民信之，至今怀思不忘。此非宦于永，有德于民者乎？人心不磨，祀典久旷，情法殊歉。”梅川师得之，欣然喜曰：“是足以尸祝而作则矣。”乃谋之沐泉师、汤冰涯师，陈议合；又谋之大尹竹村裴，亦克允。遂上其议于当道诸公，各来报可。于是即庙门之东榜曰“乡贤”，西旁曰“名宦”。乃安神栖，乃虔祀事，时壬寅年秋也。若是，永之吏若氓睹兹巨典，莫不喁喁然思向而知所兴起矣。梅川师，表章垂训之功大矣。

蛟小子末学不才，私窃识之曰：“地一也，而古今异产焉；民一也，而古今异治焉。是不可以求其故乎？随俗以物化，狃故以习迁。是故有必产而无必成矣。崇贿以浚血，任情以仇下，是故有是民而无是治矣。”呜呼！岂非示之无则，而作之无素乎？我梅川师，敷文明湮修旷，作立仪轨，以兴起人心。则生兹土者，将不有厉节概，砥名行，以不辱于先贤；吏兹土者，将不有敦循笃，崇抚字，以不负吾民乎哉？由是，吾永当永为名邑，而不病于难治，以增兹山川之光宠，而称吾梅川师之功不衰。蛟何幸，实躬逢之，谨记。

枌桐书院

前御史(知县)郭仁撰

夫士之奋起久陋也，莫不怀忧世之心，思以补袞职之阙，其志固矫然立也。及乎儋爵立朝，虑惟恐不周其身，而或罹于咎；言惟恐逾乎其位，而或貽之危。于以并讳其言，而遗国家之虑，好为全身固家之图。是在非其任徼其责者，犹之可也。有当责受任者，而非靡于风焉，则安望其议论之明于世，节义之立于朝，而阴慝回邪之消沮于下哉！惟君子于所谓矫然立者，不敢隳也。虽际会明良之盛，亦若蒿目怛中，惴惴然惧其职之旷，过虑而极言。即咎且危，其心固无悔。非枌桐之高，有非凡近所易窥也。

先生名肃，字志宏。警悟博学，美风仪，善谈论，最为李文忠公纲所知。仕高宗朝，为右正言。居官不两月，切论时事凡二十余疏，竟忤执政，罢归。夫先生怀忧世之志，岂特居谏垣尽言责哉！其始在诸生之列，即上诗讽谏花石纲搜扰之害，志概风节可想见矣。余初不知先生何许人，昨岁以言外补得令永安。乡人有以君子勗我者，持先生集赠行。展而读之，景慕其高；比考行迹，乃知先生为沙县之枌桐人。枌桐自国朝割隶永安，是先生为永安人，永安之有先生，乡之望也。古者乡先生歿而祀于社，非率民以听神，将以垂后作则，俾其乡之后进觐前哲之遗范，思性行之可宗，观法恒于斯也。然则枌桐先生之于永安，非合于祭法者乎？虽尝祀于乡贤，

非特典也，宜有专祀。余因谒郡，道出栟榈，循山陟阪，询咨耆宿，乃得先生潜读故地焉。地在栟榈寺之前，为平麓者凡百武许，后负岩壁，前绕流泉。薙秽除漫，发此奥区，盖数百年之湮废，良有待也。余敢不勉图为先生复其旧观哉！既构堂三楹，作室两腋，治门设键，题本主其中。俾寺僧一人世主之，置门子一人岁守之。惟是章缝时其游息，而樵牧毁画者有禁。春夏之仲，祀以特牲，令、丞执礼而师生相之用虔。庶几永安之士观感兴起，退而省曰：“先生之志，吾奚难于志！他日立朝，吾之有言，奚异于先生之言！”则是先生垂远之休，将复伸于今日，而吾道有耿光矣，安得而不祀之。祠未请制，故因先生之地旧称而名之曰“栟榈书院”。落成之日，实嘉靖三十年三月□日也。

科甲题名记

同知(罗池)计宗道撰

皇明学宫遍天下，而士之登名科甲者，何地无之？昔人云：“百步之内，必有茂草。”不可诬已。永安之为学以造士者，创自景泰间，为邑分自沙阳、尤溪。其山川之秀，盘结联络，气势嵯峨；二水自西南交至，逶迤曲折自东北而去，不五六百里竟泻沧溟，信一方雄镇也。所以朝廷兼设武人守之。虽以地僻之故，而其人才之出，如宋左正言邓肃，亦其里人，与杨龟山、罗豫章、陈了斋咸名当时，同为郡人。则士之崛然而兴者，何限其地哉！夫地因人显，人因地杰。有是地，有是人，则有是才，有是名。而名可易得乎？于戏！今斯地之士，既以登名天府，而复得镌名斯学之宫，盖欲垂诸星汉之表，而人仰其清光也。思名以副实，追前贤芳躅于百世之下，使同一道德功业之称也。彼以名焉而已者，无足尚矣。

忠洛无银矿记

御史(郡人)胡琮撰

永安忠洛乡距城六十里，崇山汇川，居人鲜少，樵采罕至，老木蓄翳。断崖抉石与查腐相错，游埋剥蚀，久而异状，人视之误以为银矿也。始作于童稚之言，父老弗信，曰：“山川为矿固也，然有常产。古今一山川，未闻昔无而今有者，其诬乎？”

正德癸酉，民有趋利者，诱浙之峒民，拥众突来，未敢恣发。适郡节推郭姓者摄县事，峒民度其老而贪，得厚啗以利。郭欣然许其开凿，且为之陈于总镇。邑人以其地密迤大帽山，为江、浙、闽、广丛盗之会，虑其闻风袭夺，因以为乱，群情惊惧罔措。时佥宪、睢阳蔡公天佑行部至郡，闻之，乃兼程诣县，数郭之罪，率庶民塞而禁之。峒民方以采无所得，及闻蔡来，众遂宵遁。至是，人心始安，皆德于蔡。然闻总镇，祸已基于此矣。

正德丁丑，知县事、南海罗君珊，以儒饰吏，政先爱民。忽一日视事，有持总镇公文至者，云“欲进贡”，促罗偕往其所，督民发矿。罗知其罪，奉廷旨又以实无所产，惧为民累，乃抗言：“本府旧额忠洛无场，他县场冶，又奉正德五年诏书除豁，禁民私采，是宜据实申夺。”因忤使者徐俊。盖徐俊赂得公文，诈称进贡以牟大利者。为罗所阻，于是诬罗以人命，给于总镇。差官复来，以拘罪人为名，罗不为动。又率其党攻县仪门，迫胁备至。邑人汹汹，咸曰：“使者贪利，欲执吾宰，以蠹吾土。吾辈有死而已，不知其身。”父老惧其党及民相攻为乱，乃谋为申救之策，民不期而集者数百。遂同诉诸当道，皆壮罗之持守不变，为之别白。其事始寢、民疑释。

罗以秋仲往朝于京，父老陈玄真等恐其宰以最他迁，则奸人复作。有罗之志者，无所征，于是具事始末，诣余乞言，期立石于忠洛，以表劝将来。余惟圣人论利为义之和实，盖以万物各得其分以为利也。夫何儉夫鄙人恣凭城社，擅采银矿，以牟大利者。其不至于胥攘胥夺，构成祸乱不已也，其害孰甚焉。且古有以锡山为无锡者，彼何人耶，今忠洛之矿，借曰有之，在位者尤当防守，以息争端。况本非实有，而或纳赂，以病民乎？郭首乱阶，所谓儉鄙之尤者，宁逭其责耶？若蔡公之刚明，已虑有今日，贤于人远矣。罗君以位卑势寡而所恃如此，尤人所难也。后之当道与宰摄是邑者，适是事若是类者，其知所自择哉！

安贡堡记

封君(邑人)林祥撰

邑北四十里市，曰“贡川”，居人联络，弦诵相闻，余世家焉。嘉靖三十九年，广贼入寇，掠劫烧戮，备极惨毒。流贼风燃，民汹汹无宁日。抚按行示村落，筑堡自卫。余倡士民捐资营筑，询谋僉同白欧阳尹弘。欧公恺悌，力赞其议。遍呈巡抚刘公焘、巡按李公廷龙、分巡余公日德、分守张公瀚，胥报曰“可”。下本府议。知府周公贤宣痛惻民隐，区画劝相以堡筑为己任，专委汤经历冈责成之。汤君殫竭心力，速堡之成。至于周，规画备工，作足粮糗。程能计功，奖勤黜惰，则监生赖明任，生员邓达材、乡老赖章、陈珂、余粟也。分理庶务，则范普、邓文绅、杨廷谏、林嘉言、黄应清、姜有道；至于树长画，成始终，则士民刘福、严焕、李正枝、赖明传、林腾鹄、林文、吴从周、林嘉谟、罗庭桂、叶天佑、严奕大、刘岩升。广计六百二十三丈，高计二丈四尺，费金六千有奇。大计贡民三则，派筑五百七十八丈，余四十五丈，时拙莫举。分巡曾公一经、知府周公、知县欧公、经历汤君、县丞张君世鉴而乡宦、按察司僉事李公杏咸赞之。

堡北临流，南水直卫，迅激崩塌，费不可支。上世都人范癸六舍田一百一十六石于奉先堂以为焚修费，乃为善集寺归俗淫僧所占，士民白诸当道，查卖助堡。抚按司府皆是其议，行阴阳万全，定价二百三十金。召原派人户，丈增五钱。官买存堡，

以支倾颓。其田粮四石六斗四升，原在冯吉安、林守清户，今收入黎永怀户当差。盖永民深德周公，立祠尸祝，额曰“永怀”，志(原文“识”，乃“志”字之误。)不忘也。旧有浮桥，征编夫守。请移编门夫十名，守堡五门。堡无职官，靡督防御，乃请移安沙巡检永驻贡川。乡有各牙，旧有恒课，请追入堡，以备修砌。巡抚谭公纶、涂公泽民、巡按王公宗载、分巡史公嗣元、知府陆公相儒、知县卓光谟力张主之，以终底绩。楼櫓修修，粉堞迢迢；上削下壑，尽侦宵遯；外奸潜夺，内犬靡聒，贡民自是永有宁宇哉！

余于是有感焉：世之治乱，惟时事之成否，惟机际其时，适其机惟人。邓寇乱倾，百年承平，复遭荼毒，实逢其数，谓非时耶？上天厌乱，生我诸公，民之汤火，以身捍卫，谓非机哉？《易》曰：“大人休否。”又曰：“系于苞桑。”周公德望，久简岩廊，回翔闽疆，几逾一纪。以成休否之吉，以永苞桑之系，非天之不遗吾民哉？老夫耄矣，遭此乱离，今复际遇，乐此升平，亦天不遗于我也，乃喜为之记。记之日，落成日也。

郭公去思碑

教谕邓国宾撰

彻邑士民绎思前令剑泉郭公之德政，相与伐石竖去思碑。既成，乡大夫吴宏仁、林祥、管谷辈，庠彦李雍、饶侯辈，耆艾林元、吴奎、罗琪鼎辈，合十数百人，群造学宫，嘱国宾为之记，谓学校乃纪善之宗也。国宾辞不容再，乃前士民而问焉，曰：“闻古之县令有三异，有十奇，公得无有是乎？”士民曰：“清涤成性，惜民膏脂，抚字有方，刑罚罕用，民不畏吏，犬不夜号，四民乐业，万家安堵。迟之岁时，将与生成同功，三异、十奇何足为公知也！”曰：“亶是则公之恩惠广大为难名矣。然得无有为乎？得无以公在当路，故为溢词，如宋璟之《遗爱颂》乎？”士民同声曰：“有意为善，虽公亦私。吾人知思公之德而已，于显庸乎何知！使非公之德泽果在人心，即位都卿相，于吾人乎何与？”

夫世之司牧所在，蜚声非不藉藉，而能系人去后思者，鲜有闻也。睹今日士民之情，则公之去思在人，信有不可解于心者。《诗》咏《甘棠》，“传”称《遗爱》，“史”纪《循良》，义盖兼之矣。公何以得此于邑之士人哉！夫为人上者，莫非君子也。然《诗》称民之父母，必归之恺悌，谓其中心无欲，而强教悦安也，谓其好恶同民，而民之攸暨也。

公性天仁厚，心地光明，学问精粹，而德行纯懿。其存诸中者，皆惻隐慈爱之实心；见诸外者，皆公平正大之实政。治道之大端，莫先于均赋役、兴学校，莫急于省刑罚、节财用。公则躬稽黄册之弊源，厘正钱粮之飞诡，而赋役均；时诣学以发义理之精微，间捐资以助生徒之不给，而学校兴；慎好恶之端，流矜恕之德，示民以

可生之路，而刑罚省；禁无名之科派，革里役之常供，敦俭约以为诸僚先，而财用节。且视民如伤，而不忍之心常施于见闻之所及。如时适愆阳，农有忧色，公即引咎责躬。去檐帷，行烈日中，而甘霖为之应祷以至。事有不便于民，公辄为之陈请；民有误罹于罪，公必为之拯拔。诚激于中，爱形于色，必得报可乃已。比与父母之于子，为之趋利避害，为之捍患御灾，又何异哉！常俸之外，毫无所取。趋朝之日，行李肃然，视浚民膏脂以为己利者，固天地悬隔。修邑乘之缺典而监戒昭，崇耕耨之特祀而风化飭。此又岂俗吏尚浮节，簿书期会以为政者，敢望下风哉！《诗》曰：“恺悌君子，民之父母。”公之谓矣。民之思之，不亦宜乎？昔崔瑗为汲县令，童翊为顺昌令，民皆为立碑。今日之人心，其即汲县、顺昌之人心也。斯民也，三代之所以直道而行也，诎不信夫！

公讳仁，古吴长州人也。登丁未进士，授监察御史。以建言左迁永安，今复晋秩秋官。其福被天下，而惠永安尚未有艾云。是役也，现任知县刘、本县丞邹暘、主簿马胤龙、典史陈文昭，皆仰止前修，见而知慕，顺士民之情而乐观厥成者也。士民捐资效劳者，例书于碑阴。

永怀祠记

佥事(邑人)李杏撰

《书》曰：“记功宗，以功作元祀。”故为政者能树大功烈于民，民必元祀以报之。祀以明禋，元以崇享，礼莫殷焉者也。

吾延在昔，守土诸贤彬彬兢美，然而丕视功载，则大方岳洞岩周公其选乎？公曩由工部尚书郎以岁上章，涪滩奉命出守吾延。雄于割，七邑恃为保障。永乃属邑，贡土隶焉。衣裳文物之盛，甲视他乡。二百年来，鼓舞皞翳既醉之泽，咏歌太平者，匪一日矣。嘉靖末年，流寇猖獗，大肆屠掠之惨，公也目击创残痍，切念展文武之志介，张弛随宜，修捍卫民，不遑暇食。适贡众戚往诉，公乃抚慰而登进之，曰：“匹夫不获，繄谁之辜？余为若等画其筹，将安出而可？”众叩首曰：“积忿之极，矢各用奋。惟公大挥经略，宏济时艰。”公曰：“俞哉！然不可无备也。兵法：毋恃不来，恃吾有待。余将捐俸百若干缗，檄汝令筑汝堡，复汝室家，峙汝刍糗，而简恤汝众，以戒戎作，则可乎？”于是民皆挽涕稽首，曰：“小人得更生矣！”公遂白于抚按、巡守，即日捐资檄下。邑尹欧阳弘氏者，奉命祇若，早夜率作惟勤。测土圭，分地域，稽夫力，度财物，辨施舍，作秩钗，纤悉罔弗戒。而乡民咸踊跃仰承德意，富者具馐，贫者输力，乃悉大和。会公仍遣汤经府开训术，万全程督考成，而堡首陈珂等纠众分猷，刻期底绩，屹然虎踞，于邑若齿唇焉。父老欢呼，顿颡嘉绩。乃复请曰：“完者将圯，可无虑乎？”公曰：“稽呈僧占废堂苗田百馀石，迫入官卖。谕众输值，以完工，而岁收羡馀以修圯。”议上诸道，道曰：“然。”乃复白于抚、按，各报可。则堡有备而不费金，城屹屹万年可保于无虞也。

计工肇于辛酉春正月，逾载乃告成。东西相距三百丈，南北三百二十丈。其用民力、木石、牡砺之费七千馀资。

盖工以义役，民自乐从。一时之劳，万世之利也。尝观《春秋》重民力，凡有兴作必书，而惟“城邢”无讥焉，美救患之义也。今者之役，下顺于民，上孚于时，设备以御灾，体险以立制，储峙以预防，非“城邢”之义耶？兹固君子所乐与也。于时，貤封御史林公祥、国子生赖明任、邑学子邓达材咸曰：“公德不可谖矣。曾道欧尹之惠，亦尝往来于怀者，立象生祠以曾公，并而欧尹侑焉，秩祀之谓也。”乃走状命杏记之。杏遂击节颺言曰：“君子立政，凡可以利众益民而协于义者，虽殫竭财力所不惜，以其所系者大也。然非至诚惻怛而达时识势者，恶足以语此？故于公之通变宜民也，可以观智焉；于勤恤民隐也，可以观仁焉；又于惠心惠德，民役忘劳也，可以观诚焉。具斯三善事，虽大必济，载诸祭法，义协功宗。贡民肖像而俎豆之，功以宗惇，祀以元秩，垂之万载，世享公德不忘也。或谓：公在延，广曜德一乡，乃其小者。愚则曰：民心之天无小也。贡民之德公，亦犹南国之思召，召之泽不止于南，公之恩奚啻于贡。要之，随在见思，不系于祠之有无也。虽然，公何心哉？尝闻古有道者，务其实而深避乎其名。今斯之举，吾固知公之甚不欲，而奚愚言之赘耶？昔狄梁王生祠，先儒谓李邕记之为有愧。杏何人斯，敢叨斯役？特以不肖邑人也，目其盛，重违其请，好德之忱根于心者为尤切，故不揣濡毫直书以纪实，俾诏来祀(原文“来知”，为“来祀”之误。)，知所师焉。

苏近斋先生去思碑

御史(邑人)林腾蛟撰

番禺先生既即师席，鸣鼓进诸生。诸生鹄立鹜趋，肃雍屏息，以听先生。乃先生揖其寮胥，命曰：“吾侪所为来者，所以为诸生则耶！诗曰：‘伐柯伐柯，其则不远。’言具在我也。夫蠹范无良器，树表表者寡直影。继今若其左右予，无宁使予废则于诸生也夫！”其寮应之曰：“诺。”又曰：“吾与若，弟兄也；诸生，吾子弟也。”日阅于墙，而率子弟以孝悌，是以梟巢畜凰也，庸可几耶？继今其监于前车，黜忿饰下，明义远利而和衷是务，图以及于诸生，岂不可耶？”其寮又应之曰：“诺。”于是诸生踞而前曰：“先生何以教予二三子也？”先生愀然，正襟起而曰：“吾何以教二三子也！自讼之匪遑，其敢以颊舌先二三子？吾抗颜是席，方日兢兢焉。而使二三子谓予疑也哉？”诸生曰：“不敢，愿先生有以诏之。”先生曰：“居，吾语汝：金之冶也，化则器，否则顽；驹之伏辕也，驯则驺，否则弩；矿之就模也，融则金，否则砾；敌之对垒也，克则王，否则虏。二三子之志愿何如耶？其将而器、而驺、而金、而王乎？抑其顽、其弩、其砾、其虏也？”于是诸生悚然汗洽，赧然色变，复踞而前曰：“二三子虽不敏，安能顽、弩之甘，而砾、虏之屑也！惟先生悯之，而有大造于二三子也。”先生曰：“生之至愿诚审乎，则为之而已矣。夫质贵化，气贵驯，习贵融，己贵克。故君子砭矜、箴暴、销鄙、祛吝，旦

夕凜凜若大敌之我乘也，惟惧其弗克。故身外之治忽，弗聪涉焉；户外之臧否，弗齿涉焉；狱颂之庭，弗武涉焉。何则？利刃必衣甲以蓄锐也，淑媛不窥户以全美也。谷也而水走之，霏也而光入之，以受益也。二三子母亦是务乎？”诸生曰：“唯唯。先生幸惠教予诸生，诸生不敏，敢不夙夜如教！”

然先生益务检饬蹈迪，严取予，时时遇诸生，辄以此推言之甚。具居一年，寮案式和，习士烝烝改观矣。无何，以艰归番禺，乃诸生思之不置。又一年，相与伐石为碑，树之学宫。摭其行实，请予书之。先生名黎庶，别号近斋。

柱史氏曰：“永有学殆百年，而师何其寥寥也！”乃近斋先生藉藉颂慕，则临海萧先生松及。先生云，萧先生善《三礼》、《家言》，尝上书阙下，请《三礼》并置博士，不报。为教断断焉，激昂流俗，嶙然不滓。是时，学生无学戴氏礼者，有之，自萧先生始。乃先生则弘奖兼容，然咸得士心。语曰：“桃李不言，下自成蹊。”岂不信哉！

卢侯永思碑

侍郎(长乐)陈省撰

夫吏民上者，亦称雄哉！难在民乎？余谓难不在民，而在上。据几而临一郡，数邑之民，剧不能困吾剖，巧不能遁吾察，疑不能当吾决，威不加乎怒，恩不乘乎喜，如是而称能吏，世多有之。乃若沦濡浹洽，鼓舞变动，能使民未至而望，既至而祝，既去而思，则于今不数数见焉。乃得于剑郡永安之民之于司理卢君，盖爱慕而望，欢欣而祝，去之久而思之愈勤，此岂可以声音笑貌为哉！

君起家进士，司刑延平。敷精敏于慈祥，运干捷于廉恕。诸所讞讯，能令奸者输诚，枉者平反，健者、黠者帖然安于不竞。即古史所称，天下无冤民，与民自以不冤者，奚多逊焉！

一日，永离其令，奸风大作，民不聊生，相与诣佛，祝曰：“吾邑僻且瘠甚也，神其相我，得借卢侯，俾雨露永民！”当道稔其贤，从民之欲，因以邑篆属君署，则人人大喜加额。君至，刷弊剔蠹，所剖决如干将之犀兕，明断如皎曦之照幽微。修葺城垣，不扰民一钱，是曹盍之理也；作演武场，泽及枯骨，是召、杜之仁也。至于法立而关千百年之计，惠行而系数百万苍生之命，则清田丈亩，尤足以系永思。盖永安自丈田以来，里书势豪奸敝百出，欺隐多方，飞射毫厘，至蔑顷亩。承威首发，荡产覆家，当事之人，无复为念。即念之，谓已成事，不欲任劳怨，竟莫之恤。君独惻然，谓此系民瘼非细也，事要于其当，即十反不为病，况不可已者乎？于是日夜筹画，核其敝源起于丈田之时，未取亲供供册之时，催完太速。遂请于当路，立为报田匀苗之法，补其未取亲供之敝，务报出于民而丈合于官者为定额。一时

敝窳革除殆尽，奸者弭，强者敛，弱而贫者苏。

政方月余，而德及永民甚大。兹以迁秩行久矣，民享君之惠，思君之泽。室家相聚，则曰：“卢侯蔽覆我也。”饱食暖衣，则曰：“卢侯衣哺我也。”吏不至门，犬不夜吠，则曰：“卢侯安辑我也。”相与颂侯不忘，鳩工立亭尸祝之。予同年、太守萧君时中、门人诸生、余子名世辈，率耆民征予文，以勒诸石。

嗟乎，民易感哉！乃卢君者，何以得斯于民也？剖剧、察奸、决疑、明务，力可勉为之。望其来，忧其去，而永其思，此非才合于诚，政出于学，未可以厚望于斯世。古今称循吏系民去思者，汉推何武，唐推韦丹，外此寥寥也。何生永始之世，竟无推挽功，能不大显著？韦在元和，借周墀之荐，庶几有闻。君不为煦煦皎皎之行，以果毅沉重之守，为廊庙所知，行将由比部而铨曹，由郎署而卿贰，以大行其志，而大霑其泽。君之去思如何、如韦，而所值明时过之矣。不佞暗于世务，而喜论吏治。思欲临民者皆得如君，不难乎民，而难乎我。使期月之政，足以系千百年之思；一政之举，足以系百万苍生之命，俾海宇皆获如永民之霑霑焉。则君今日之思于永之民也，他日将思于天下之民也。余僭预言之，为君左券。

督理耆民赖士文罗世吉

公正

张天吉邓文魁饶备朱魁赖万里游丰用

吴遇彩张上元

黄少沧先生永怀碑

知州(邑人)萧时中撰

永自创邑迄今百数十年间，其治行称良者仅五六计，其称善教，则不若其数。岂教难而治则易哉？语有云：“以身教者从，以言教者诵。”今余于少沧黄先生信之。

先生之先大父沧溪公，以名进士出守吉安，卓有惠政，晋督江右学政。余署教时，当受督课命，居会省，则闻诸士子论明允必曰沧溪，沧溪宗师云。后以大参转余闽观察，未及抵任而歿。歿之日，靡有寸余以遗及子孙，其廉洁乃如此。而少沧先生其长子也，读礼毕事，慎念其先大夫清白家法，而以身审行之。饘粥甘心，茹淡被素，唯闭户办学，不轻步履，动求古人躬行而已。先公大夫所荐拔称得士，其通要者，知先生居约，欲以其馀为先生计，幸一见而致之。而先生素重干谒，竟守不见之节。然厄于数，不偶场屋。万历癸未年，竟以贡选上，且自念不能俯仰，惟时有

司事，乃授余永邑司训，冀以简秩免仆仆也。抵学日，一意慕向古人造士良法，辨拆几微，课业上下，拳拳罔替。每以己膳膳诸士，就课者岁时常挚馈，不特重却，且常以其馀给诸生之不足者。居常论海，必先躬行实践，所亲就乐育必端士，其奇袤汇落落不入也，大率以身先为教，孰不欲奋励趋于古人哉！亲见祀圣宫墙卑下弗称，先生则筑起以壮伟观；或言面学故路塞不宜，先生则买宅复辟之；启圣祠拜台毁缺，先生则备砖埴从新筑造。凡所费，皆自先生，不该有众也。前值缺县署，百姓父老驰请于上，重得先生。先生则恳切辞解。而上亦廉知先生有守有为，竟从父老请。先生接署，输期迫年。为先生虑者，恐其或愆速戾也，时则输役纷纷，兢赴效纳，故不假一鞭笞，遂报完先于他邑，前此所未闻者。先是，赋役蠹弊滋甚，父老辈请于谭府祖，愿遵立总则，分各图自派，时为转闻。檄下，为蠹者多方挠之，且忧以害。先生弗之动，毅然行报，岁计省千余金，遂为常法。此通邑不朽惠也。先者，民苦迫逮扰甚。先生视署半载，村落安枕，鸡犬以宁，深陋穷谷，扶杖交庆，快幸在一时何如耳！

方届瓜期，拟有破调峻擢以偿先生，乃阒寂无闻及。先生不谋于人，径牒乞休。闻之日，诸士子彷徨于学，士夫辈太息于家，百姓父老咨嗟于道路，咸怆然不平于心。或曰：“人不可轻为人所知，知则必为用而诟随。”先生求致，意其远诟欤？或又言：“嗇于身者，每丰于后。”先生不尽其未用，殆欲丰于后耶？余谓：先生耿介好修，顺理洁行，志念所向往，决然赴之，斯鞠躬君子哉！教士而士怀，治民而民戴，生平毕矣，又奚计其他？诸士、父老咸首是余言，但终不能释然于怀者，遂请余言劓诸石，建亭以志去后深长之思。先生广东揭阳县人，讳燧，少沧其别号云。

督理耆民邢存志吴衍饶偁

坊里麻日成李迂叶奖臣赖天洪

唐田王庙碑

编修(三山)唐震撰

孚佑广烈王神庙者，唐田王李肃庙食之宇也。初，王诞于陈州中川坊。母杨氏，生产夕，大见灵异，知其必贵，阴保之。及成童，父相尝诲之曰：“汝祖冲勋于帝室，赐壤琅琊。既薨，累世弗振，吾所以最恨。汝能继先志，吾死且瞑目。”王泣而谢曰：“惟大人之命是从。”既长，膂力绝伦，发语成章。会唐中衰，天下多故。王以世家子从戎，搢旗获馘，而功名益盛。与浑、马辈胥前后，寻封田王。

建中间，天子幸奉天，怀光观望，谋归河中。闽叛将牛氏乘中原有事，闭关窃据。及朱泚平，天子赐王弓矢，命之曰：“闽粤弗廷，汝实征之。”于是，王率精锐数

万，裨将有五，即今之胡、陈、周、汤、张是也。师次临汀浮流口，进于浮流城南，与贼遇。时王师未集，贼突兀至，锋交而后兵未继。左右俱失色，王笑曰：“此正吾报国之日也！”乃与短兵接，鏖战良久，而贼势益盛，犹手战数十而歿。尸浮于水，弥月不坏。

邑大姓詹纠，悯王之忠且勇，敛其尸，具服，殓而祠焉。凡祷无不应。贞元十五年，而朝廷追封死于王事者，有司具其实以闻，敕赐孚佑广烈王祀，妃陈氏配享。由唐迄今，五百有馀岁矣，廊庑圯毁，鞠为蔓草，乡人黄文馭等募众维新焉。由是乡人子趋云集，弗日完成，轮奂翼然焉。处士杨永中请余为文以纪之。余惟昔张巡守睢阳，死于贼手，骨齏形粉，似真可痛。向令遂破子琦，擒思明，俘禄山，勒石渔阳，饮至唐室，不过荣身一时，齐名李、郭，安能庙食千载，人谈诸口，恍然如昨？此岂他哉！是盖富贵易衰，忠义弗振，亦故天相之也。王之迹实不忝张侯，是宜庙食，继继承承，亦千百斯载，用书为忠义劝。

障水陂记

知州(邑人)萧时中撰

昔太史公从负薪塞宣房，悲《瓠子之歌》，而作《河渠书》，叹曰：“甚哉，水之为利害也何哉！”论其利，则滋益灌溉，岁致千万石入；语害，则横流暴出，鱼鳖其民。后世形地者流谓，其所系大有征验，其逶迤环抱则为吉，其直走反背则凶。

永初盖沙县远村，介漳、汀间，居民不盈百亩之宅、一丘之兆，各因其向背而趋避之。自景泰间寇乱后，始创城郭，置邑治。城之西、南，二水会流，襟带于右，独东一水至城后而直流。先是，亦尝筑为陂，堰障而上迎，汇西、南二水而合流，形地者谓其改无情为有情也。嘉靖丙辰，大水漫城坏屋，漂拔巨木，而陂亦因以毁，盖本卑狭浅薄致然。距今三十余年，未有创议改建者。

万历壬辰，君侯苏父母奉檄蒞治，起敝维新，百废俱举。庠生饶俨、李西铭等，乃敢以是请。君侯可其议，集耆民邢存志、吴衍、饶偁等掌其事，又选择市民公正有力量者麻日成、张天吉等分任其劳。兴工于是年冬十一月，告成于今春四月，盖阅数月而毕事。是役也，君侯捐俸以先倡，为子民者，孰不感激思奋以慰之。富余者输钱谷，丁壮者服筋力，盖本利民为劝相之道，故其成若是之速也。度其陂，昔也高不过数尺，阔不满丈，今增而十倍焉。诚坚固不拔，足垂永久。

夫睹河、洛者思禹功，今君侯功在永，当不下禹矣。然尚不肯以成功自居，谓此足以称塞，且惓惓于条陈兴举之议者，不一而足，凡可待泽于下，日未艾焉。矧谓不可无纪述，使后人见清风之华、峻伟之烈也。共谋碑言于斗阳萧子，萧子曰：“碑以勒勋而传后，才如蔡邕，故能骨鲠训典，句无择言，余则安能？特以分属子民，

身亲其盛，且将徼惠利于无穷者，故不敢重辞。”乃直叙其事，载诸石。使后形德慕功者，读镌而似面焉。亦今日载言之职也，于是乎记。

掌事耆民邢存志吴衍饶称李圻

公正麻日成邓万寿张天吉李迂饶维岳陈志昂陈必寿同立

赖孝子传

御史(邑人)林腾蛟撰

嘉靖丙辰夏，五水暴溢，九龙、燕江平地高十数丈，沿江庐舍漂没以千数。风声怒号，雨如注，昼旦晦冥。

先是，孝子之母死未葬，家人蒿厝之城北隅冈山上。至是，孝子急觅舟救之。独呼苍头三四人，俱出门。祖母止之曰：“水势若是，死尔，不可去！”孝子掉臂不从，曰：“柩亡俱亡矣，何颜以立天地间！”至则厝屋坏矣。出柩而曳之舟，舟小水猛，威不克载。顾冈有古树，大可数围，乃与苍头力绁柩升树。遣苍头归，报曰：“柩升矣。”乃孝子执盖树柯上守柩。是时，村民避水高阜，咸不忍孝子独立风雨波涛中，招与俱，孝子第摇手谢之，不赴。顷，水及柯；又顷，水拔树，柩并孝子俱没。越二日，水退。柩不知所之，孝子尸在冈下数武，颜色不变。远近观者若堵，咸悲孝子，又嗟异孝子能尸独留也。

初，孝子母卒，齿尚稚。既长，则数以葬事请于父。父方信堪舆家言，苛择阴阳吉利，无所遇，以是卒不得葬。孝子以母未葬也，朝夕伤心自贬损，终其身未尝一御丝绮服。家人怪之。不敢问也。及置妇，妇间问之，曰：“吾人且未能成，奚服为？”以是知孝子意盖有在也。孝子为人恭而婉，居常俯首默默，不妄出一言。及询厥事理当否，及闺阁情状琐屑，咸能中其肯綮。少善饮，及就予家大人封君学，封君戒之，即不饮，饮即不至醉。先是，督学宪臣试子弟俊敏可进者若干人肄于学，命曰“俊秀生”，孝子与焉。孝子死，有司具其事观察诸司，诸司啧啧曰：“孝子，孝子！”署其门曰“赖孝子门”。孝子名豫，字立卿。

赞曰：“河孽为雷，岁在龙也。湏湏城野，鱼鳖宫也。母儿何辜，罹兹凶也。号吁不应，儿心恫也。儿魄虽留，魂俱东也。尾闾可塞，恨焉穷也！化为精卫，衔石终也。”

六烈祠记

佥事(四明)毛为光撰

嗟嗟，仗节死义之事，岂妇人女子能辨哉？而载籍以来，刚心烈气往往出自乡泽间。余不知峨冠大绅，名为男子者，或冒耻逞颜，窃一时之生于人世，当施何面目见天下也！夫节义者，天地之正气，无古今，无男女，一也。顾其在男子恒易，而在妇人女子难；在古之妇人女子易，而在叔季难。乃至男子无闻，而妇人女子多表见。或在穷村下邑，生丁末世者，得与古之倡傅姆而闲图史者比芳揆烈，此不亦奇哉！

闽中庚申岁，寇盗被野。当时刳贞铲素、甘为瓦全者，无论妇女，即以人士自命，翻为贼响导以鱼肉乡闾；甚而身膺民社，不闻背城一战，率奉头鼠窜，令赭衣辈抚掌而笑，恶矣。

今永安为延平外邑，安贡堡又永之一乡聚。顾有妇女六人抗节死，如诸生称说，呜呼烈哉！六人者：严师训妻邓氏，抗声骂贼，贼以刀针其口，尚作咄咄声，至断咽乃已；邓林彩妻陈氏，延颈大骂贼求死，贼怒，丛刺之，溪其尸；吴天性妻，被执，过井边，给贼释手，跃入井死；罗正茂妻刘氏、罗正卿妻姜氏妯娌，奔舟，为贼所及，各相携抱子投水死；林佑女尾姑，同母被系隙室，度不能免，乃拜母，缢而死。呜呼烈哉！鼎镬在前，白刃在后，归人不归鬼，在呼吸间耳。乃慷慨就死，不少低回。岂非天地间正气激昂、喷薄不能自禁者哉？或曰：永有六贤书院，盖杨龟山、李延平诸公云，无亦遗风流教渐染所致欤！庚申至今，只十六岁所，当时从贼以生者，老死无算，仅同腐草；而六烈之名，烱与天壤共尽，则谓之不死亦宜。

先是，余以行部经其地，诸生以祠请。余曰：“前有六贤，今有六烈，奚不可者！”已请督学胡公、部使者孙公，咸报可。县令复请予碑之，余曰：“昔秦人虎噬六国，靡然北面，独鲁仲连不肯帝秦。燕下齐七十余城，为主死节者惟画邑王蠋，至今歆美。夫国有一士，犹然重于九鼎，矧一乡有六烈女，何为不可风哉？予独惜夫六烈者不在通都大邑，不为六丈夫耳！尝读《陵母碑铭》云：“妇人之服，衣兮衾兮。有忠有烈，男子之心兮。男子之服，冠兮盖兮。惟邪惟佞，妇人之态兮。”余于六烈亦云：“祠前松竹篱立，风来辄戛击作声，俨然抗贼状。流溪漱石潺潺，为诸淑媛发灵响。夜深月堕屋梁，玉色犹生，肝胆俱亮。嘻！入斯祠者，有不赧颜泚颡哉？”

是役也，倡议则诸生，勤相则父老，而始终之者，前令、今升兴化判许君培之也。

忠勇祠记

(邑人)御史林腾蛟撰

邑南四十里曰邢庄。邢，巨族也，世敦睦急义。然介汀、漳间，恐鼠辈窃发，莫可自卫，亦世率子弟习戈铤击刺之术。国初，有祖邢君福，以捕获功授巡检；嗣后，

亦以屡擒渠魁，渐被旌赉。鼠辈相戒毋敢近，邢庄盖隐然邑南屏蔽云。

嘉靖癸丑秋八月，河背寇流劫大田王土坪，并龙岩之苏家山。合势乘胜而下，锋炽不可当。二十八日午，卒至西洋会食，先声袭城邑。邢存嗣、邢忠翔等，急悉族众，拒于车头大坪，扼险击之。分布方定，贼遽至，挥旗而登。我众拏其旗批杀，贼堕指戡胁不可数计。自午至申，盖二十余合。贼知不可进，乃佯少却，潜越炉窠后，扞藤葛，蚁附出大圳，绕阵背，围我左翼。会日暮，失措。于是邢志宏、仲卿、必崇战歿于阵，子炯、进贵、祖晏、必安身数枪，突围出。贼悉众趋中哨，仲翔、宗善业伤重，犹力战。景清虑不能支，持矛赴之。仲翔、宗善得脱身遁。景清独战数贼，力竭，死之。宗善创甚，行不前，贼追及于下林仔，肢解以殉。存续、忠翔以身殿，余众获完。存志抵家，洞开大门以疑贼。贼至，果不敢入，乘夜遁。于是知城中有备，又虞邢氏尾其后，次旦，从蚌口觅路遁。会县尉陈君文昭、千户崔君辅国，督兵为声势。贼仓皇自刃其伤重不能行者，毁其尸以去。

事闻，代巡玉泉赵公、分守南溪丁公、分巡枫潭万公、太守少波沈公，各嗟悼不已，发帑金恤之。死者复其家，伤者复其身，仍各表其门曰“忠勇”，且命有司立祠，祀志宏、宗善、仲卿、景清、必崇五子云。祠成，邢存嗣者介吾友李吕和、萧宜卿以记请。予谓：是时贼势鸱张火烈，使非邢庄一击，建瓴破竹，岌岌哉城也，几何不殆？而竟迂道遁去，是五子将与桓潭、先轸肩勇并勋矣。独窃叹平居胼胝负耒，出粟饷卒，有急，身膏草野以捍邑，又非有受半缗之值、一朝之养也。饷卒乃顾趑趄岸帙，于于由由，金之不前，可胜慨哉，可胜慨哉！

予敬为之记，仍为乐章，庶焄蒿于登歌，表英灵于万祀。辞曰：“嶂合兮峦回，泉泠泠兮东逝。霞霁兮云澄，灵连蜷兮天际。宗党兮簪盍，望苦兮心悵。吹喧腾兮繁舞，群来下兮慰予饥渴。炳萧燎兮馨升，日惨兮风，羌贞魂兮帝鉴，誓不化兮为厉。同仇兮故山并驾，婉婉兮聊憩。奠琼飴兮桂浆，式醉饱兮慈惠。灵夷犹兮康娱，愴淹留兮容与。扬灵兮未极，焱奄返兮遐举。佐天光兮虹霓，烂昭昭兮我所，妖殄销兮室家乐胥。

重造南塔记

邑人、知州(斗阳)萧时中撰

邑肇创景泰初，当兵燹后，有城郭。市井安居，戍守可恃，民乃平定安集。然地无他产殖，唯事耕稼。不数十年，生齿繁殖，殷殷訇訇。于是建西、北二桥，通道往来；建南、北二塔，以壮观视，遂称乐邑云。自嘉靖末寇讧四起，桥、塔相继漂毁，闾里萧索，视昔盛时气象不侔耳。

万历己丑秋，大父母王侯綰组蒞治。时则惟百里，存亡休戚是急，无遑工作务。乃

宣序民事，顺时土，而阜其财求，用明德，专化导，仅二期而信孚民和，庶几哉可役使矣！乃进父老耆旧，议兴作之次，金谓：“南塔達市，举目共见，且峙学宫东南隅，文风所系，造宜先。”侯颌之，遂捐俸金凡几，为士民倡。选于众，以耆民邓积培主规划，以市民公正赖士文等任职宣力，鸠工集材，各莫不奔走承次，强志用命。是秋社而赋事，越春末而献功。其规制视昔不异，高足望氛祲，广可容宴俎。启八扉下俯，城堞居廛，鳞次比密，鲜愁叹之声；四顾通道，商旅往来，有即次之安。虽山川不殊，而举目有兴起之势。

是役也，计其费比初造时仅三之一。为费省而成功速，即是而循次依仿，悉兴起无难已。职事者伐石作亭，问言于斗阳子为之记。斗阳子曰：“嗟嗟！天地兴衰，百物成毁，固自有数焉。彼一时也，百废俱废，值数衰也；此一时也，兴衰起弊，瞻视维新，非气数当盛矣乎？虽然，匪侯父母慈惠，忠利之教，足以辑和其人民，安能使其从命如流，而成功若是其速？由兹而民物安阜，比隆富庶，学士辈云蒸蔚起，为国之祯。于是绎思奕世，载侯德者宁有纪乎？”于是乎记。

督工耆民邓积培赖士文罗世吉

公正邓存敬王天赐朱魁温仙胜饶维山游丰用李竣饶应祖吴遇彩陈兴杰乐鸣凤立石

开基檀越陈椿杨永亨李永大黄功续吴应福

鼎建孚佑广烈王庙碑记

明景泰四年，始设永安县。故有唐王庙，创自唐贞元间，历宋至今，八百有余载。中经五代、金、元，干戈鼎沸之际，或坏或毁，旋废旋兴。乡父老遇灾殄，祈祷立应，岁时伏腊，尸祝而报之者，有如一。史嚭氏所谓神依人而行，固然哉！

初庙南向，嘉靖四十一年毁于贼，改西向。寝殿中严，翼以夹室。川亭前峙，扞以重门。后为堂以栖神，右为厅以祝厘。庖湢具备，届期而完，迄今三十有三年矣。父老辈刘逊、黄尚卿、陈藩始诣余，请记之，重改为也。

按王，唐忠臣李肃，字行中，陈州中川坊人。祖冲，封琅琊。值中微，王崛起行伍，立战功，起家至招讨使。建中四年，天子幸奉天。四方观望，闽将牛氏据闽而叛。天子赐王以弓矢，率裨将胡、陈、周、张、汤，统十万兵往讨之。王志吞逆臣，欲灭此而后朝食。师出临汀浮流口，突与贼遇，王奋勇持短兵鏖战，杀伤甚众。以兵不继，王竟死焉。尸浮于江，经月不变。邑人詹纠获之，颜色如生，咸以为神，敛而殡之。贞元二年，庙而祀之惟谨。贞元十五年，事闻朝庭。录死战之臣，敕封孚佑广烈王，以妃陈氏配享。里人祀詹纠为侍将，皆义举也。

昔汉关云长以前将军遇害江陵，论者特称其雄勇冠世，而深惜其功之不就。不知公志在灭魏吞吴，一意扶汉，则一死足以报昭烈而重千古，宜祀之者遍天下，而江陵为特隆。唐丁朱泚之乱，乱臣贼将在在而是。王将五指挥兵讨叛，义旗一指，群奸破胆，即毕命戈矛，奋身原野，足为唐家立赤帜，以愧天下之不忠者。视云长诚异代而同功！方王之战于浮流口也，忠魂凛凛，精爽长存。正统、嘉靖间，恒有阴助歼贼之异，而屹为此城之保障，其有功于永安也甚大。祀典所谓以死勤事，御大灾，捍大患，王其合焉，固宜世世血食于不废，则永固王之江陵也。代愈远，而尸祝王者益虔益严，此固人心慕王之深，益以见忠烈之在天壤间为不磨云。

是役也，始事者，知县欧阳弘，归善人；踵成者，知县李大标，潮阳人。采忠烈入志者，知县苏民望，宣城人；撰记者，普安守、邑人赖万珣也。

唐贞元二年新创，福首邓宗养、黄文驭、李功奴。明洪武五年重建，福首李景昌、蔡岩从、范富系。嘉靖四十一年，福首刘逊、陈天章、李怀仪、黄尚卿、李伯璉、张杰、陈藩立石

重建北塔碑(记)

知县(南海)张守让撰

昔在景泰，沙、尤之隶浮流未有分也。此地荆棘未锄，豺狼之所嗥耳。于是三年削平邓寇，征其既然，始剪荆棘，驱豺狼而邑焉。风教既辟，荷列圣仁厚所繁育，文治蒸蒸，埒于剑南矣。

山川之气不常衰，不常盛，逮今日亦少溺焉，则何以故？余不佞，承乏永安，蒿目而忧百姓，业已逾期。有可以兴坠更始者不遗余力，则尝陟山陬，览地脉，岂所以助流节宣者，犹有所未至欤！闻核邑乘，暨邑父老所建议，谓城之初植，负阴面阳，南、北并置塔焉，有若鸠。其初盛，自嘉靖癸卯，两塔俱毁，后南建而北废，有而无鸠。中衰是与非，与夫不究民事而征于地脉，其说眇。又曰：“浮图之兴，以奉西方圣人也。俗固信鬼而复倡之，毋乃不可乎？”语曰：“善变者因俗。”吾以救时也，有可与百姓请命，何爱发肤乎？始鸠所议，审量日力，计徒庸，虑材用。既已落成矣，即邑之乡先生、诸士子、耆老咸聚而观之，谓余始事，宜有言以记。余谢不敏，已乃揖乡先生而告之曰：“诸老先生之力也。夫地由人胜，国之望也。昔人谓此土也硗瘠，此水也批岩(按文意，“岩”字后似有脱字。)□，又□□，今始有赖矣。是峨峨者，请以诸老先生当之已。”揖诸士子而告之曰：“诸士子之力也。夫若知学乎？譬之学矣，数仞之崇，始于积累。愿其树本，欲敦赋，村欲称畚土之基，曲直之机，虽良匠公输，不治。令尔诸士人各其材，而皆可趣于峻，一也。是表表者，请以诸髦俊当之已。”乃揖诸耆老而告之曰：“诸父老之力也。夫若等善自寿，三寿有极而积德无疆，所谓‘德则千岁’之信法是也。力耕以供租赋，

诗书以教子孙，安常处顺以燕朝夕，斯奉千岁之信法，亦千岁之征，寿也有如此塔，告止矣。”余不佞，亦因以自勗焉。食邑之俸，惟其利而无所私也。此塔不迁，若其中有可欲，则朝建而暮发其藏矣。故曰“善建不拔”。

是役也，始事于萧，赖诸乡先生募缘，于邓积培、赖士文、罗世吉、朱魁、黄弘彝、游丰用、邓天伦、康应伦、游仲、庄象、张天乔、罗世潮、刘信、游邦觐、冯梦魁、邢子汴等一十六人皆与有力焉。始于丙申冬，成于丁酉秋。

时万历二十五年岁丁酉孟冬朔有二日吉旦

重建北塔碑(记)

(邑人)知州萧时中撰

永安创邑以来，有南、北二塔。其南者，据形胜，揽收景象，足以壮伟观；北者，当三水之交，关锁镇重，为邑治屏障。嘉靖癸卯，北塔毁，迄万历辛巳，南塔又毁。会西、北二桥或漂或毁，彼一时也，百物不兴，气象消索。加以兵燹频仍，四郊多故，待泽靡托，斯固气运之值衰薄，以致人事之不减从。

值长民父母，加意地方，深思改弦，为覆露茨，下询父老，则谓：“前辈尝云：吾邑二塔极有关系，今相继毁后，数见不利。于是，以南者举目所瞩，建造改观耳，而北塔以主持不偶，遂尔中止。”岁是乙未，今我□□呐铭翁张侯父母来宰余邑，至则咨耆老，风听臚言。永虽僻小，非闽文物之地耶？创治以来百余年耳。迨今言富室，胡为无常他邑之下；而士习疏旷，胡为十科不举；民风偷薄，胡至相讼而蔑亲？所系必有其自。或谓形地者云，此塔为邑水襟会之门户，居今当亟造者。言深当张侯父母心，爰询南塔经事劝首练习者五名，益以忠实能任事十一名，给以计劳效资之簿，商度量材，任工兴事。肇始是年正月，迄秋落成，为高照旧刹九级，为广则拓开六面，皆厅事，比旧加宏敞。是不徒为栖神徼福之末，其利赖于永之地宜，则宏且久也。于是，劝首邓积培等诣余言曰：“事有关系重大者，不可无记。现我侯父母为民为事之心如此，功至历百世不可泯者乎！子，邑士中知所当重者，愿借一言以纪之。”余谓：“营作之举，岂易言哉。必上因天时，下协地宜，中系人事。一劳永利，则实我君侯父母念虑精详，劝相明备，功德在民，不可诬也。无乃气运当兴，地宜当盛，与人事相符，如此哉。”然则是举也，比常建置殆什百倍蓰，令后之称功颂德者不衰，又岂恃一时一事兴衰起敝者比隆已耶？侯为五羊巨姓，其莅余邑也，深仁厚德在民心，其操持廉洁可质天日，自设治以来所未闻见者。其详则有邑乘，笔此不敢备叙。是为记。

万历二十二年，塔首邓积培、罗世吉、黄弘彝、赖士文、朱魁、游丰用、邓天爵、游纪、张天乔、康庆信、庄象、罗世潮、刘信、冯梦魁、游邦观、邢子善立石

张侯重建西桥记

(邑人)知州萧时中撰

永自创邑以来，原建西桥一所，命曰“广宁”。其道上通行汀、漳，下达郡省，旁及南、北省。直百物之所往来、憩息也，商贾之所积居、贸易也，实邑日中会市焉。

嘉靖初遭火时，水深沙阔，舟渡不足，而邑侯、榆溪徐公主持复建，易名“永宁桥”。嘉靖末，水灾漂废后，止以木棚其上，以通往来，非久计也。今市民王仙佑者，馀有资积，遂施所积以建之。后因驻贾群多，宿守者弗慎，继毁焉。时遇绌难以举嬴，复苟且以木棚加板于上，无荫屋。木植易朽，往来者摇曳可惧，不敢由，而不免于洄寒及脐之患。为今侯父母每一经往，深加动念，慨然议兴创。闻之先时市民王某者，以一人能建置，居今何独无之，复计其费实浩大，难责于一人，乃择选市中殷实勤慎者如谢文周、邓存敬、李竣、饶应祖四名为劝首。先捐俸为倡，今百姓慕义者各出所有以济之。于是陈真焕、邓万寿、王天赐等上体侯父母为民之盛心，下以福田八中桥为第一之说，宣谕于民，随其家产之上下，为出锄资之多寡，计可若干缗。遂鳩工择日，贸材伐石，计水高下，每梁增石，令高几尺，不日告成。诚所谓脉络贯穿，势侔坤轴；鱼鳞密次，踊若鳌戴；蛟螭盘结，若飞若动者也，壮哉！此桥有成，往来既安，憩息有所，不病于涉，不惧于朽，人莫不利之。

于是周等请余小，丐言为记，以志不朽。余乃叹息而言曰：昔桥之欲谋复作也，人莫不难之。既侯有命，周等莫不黾敏，夙夜承之。今桥既成，民之往来，莫不欣戴而歌咏之。匪侯有命，岂有今日之桥！要之，侯以身先主持于上，民以悦使忘劳于下，往来者享侯之安，咏歌者颂侯之勋。愿侯寿考，与桥永存，敷锡其余，以利永民于无垠。于是乎记。

时万历二十五年，桥首谢文周、邓存敬、李竣、饶应祖立石

重修贡溪浮桥碑记

太常寺卿(晋安)陈联芳撰

延平永安县北出(原文为“南出四拾里”，按文意，应为“北出四拾里”，“南”为“北”之误。)四十里为贡川，汀水与清水合流而前，名曰贡溪。折剑浦而东入江，江入海。盖四达之衢，商旅辐凑，泉货转毂之门户也。溪当上流，旧设浮桥以济。先时乡荐绅文学林君腾鹄、义民林日弘、生员日光率输租为修费，岁遭猾匠乾没，舟日圯，猝遇潦，则漂断而去。递兴递毁，往来称厉，数矣。

邑侯张公至，深念吾民之病涉也，慨然起而新之。乃下令核所侵匿资，且捐俸为倡，于是庀工程材，舟衡而细缩焉。舟若钩联，细若绳贯，桥日完固矣。复饬卒以守，重申为令，使岁岁葺理，不至废坠，为虑至深远已。工既竣，邑父老耆民叶天佑、严明用、高立，生员林嘉谟、杨名显、罗胤享、严学光、杨名第、赖尊贤、林璜、严一槐、叶春霞，桥首姜有道、罗胤元、严九经、赖亲贤、严九绍，乡总副严九绍、林琼辈，饮侯之赐，请勒石纪伐，相率征词于不佞。不佞闻之，辰角见而除道，天根见而成梁，此有司济人事也。第财出于公帑，而后索于闾阎，虽云暂劳永逸，其如力绌举赢何？张公视邑犹家，视民犹子，一切纷更喜事屏去不为，独于兴利举废则不恤己私，而务纾民之急，斯诚仁人长者之用心，得为政之体矣。且也储租以待，践更以守，惶惶然水雨之戒，可为后事之师。使嗣公从政者，率公意而行之，则斯桥其永永无虞哉。

张公抱经济才，宰永安，多异政，具《风雅雪山》诸记中。其兴革有条，则烹鲜之政也；课民有歌，则弦诵之化也；历官如水，则四知之风也。至于劝学育才，建置义廩，增修台堡，纚纚足述，余不具论；论其著者，则以永民之思，尤在桥矣。是宜镌诸贞石，以垂不朽。乃若文学林君，首义可嘉，并诸士民输金姓名、舟租额数，例得并载于左，用昭来者。

万历二十六年秋九月吉日立石

禁矿祛弊记

(邑人)知州萧时中撰

自邑有铁贡额，射利者每藉以滋蠹。不知额有常数，启有常所，即所而冶，(原文为“治”，“治”为“冶”字误。)缘(原文为“绿”，“绿”为“缘”字误。)数以贡，孰云不宜？且公移云：“毋毁坟墓，毋坏田畴。”重民计也。

今射利者不念，惟私是逞，察其可入，始焉，啖之以细，乘其间隙可遂，号召丁夫，江海可塞，丘阜可平，至锄夷其葬骸，践蹂其植穗，挖损疆土，所经为墟，罹毒小民，无由控白，可嗟极矣！兹者莲(原文为“逆花山”，“逆”为“莲”之误。)花山之东为邑治祖脉，其小干自白水濚过，行散为二十八都东西洋、北坑、北峡、虎溪、洪坑、黄狮坑、黄村洋等乡。前畚屏风山等处，为庐舍千烟，为民数万计，昔曾经兴造者，欲沿此启挖冶矿，以数乡民课正，旧迹尚存，山灵无恙，今春冶场又欲图为启取。乡众合议，集里老陈永福等，连金赴县控诉(原文“挖诉”，“挖”为“控”之误。)。君侯乃单车至其地覘之，果属有干地脉，诉牒不虚，禁永不许启取。

众思利之所在，欲趋者多失，今不为长虑，诚惧朵颐窥伺，投间窃发。则今日君侯

一念仁民公心，奚以垂诸久远？于是福等谓，中为同都子民，且熟知地宜，共征一言为记，且以志侯至仁，覃被八乡民庶草木命脉于深长也。昔商圣一夫不获，引为己辜；今君侯启矿一禁，所系千万民命，其可绎思当无穷已。余故不辞叙其事，不计其言之俚，复录之以铭，铭曰：

咨冶铸兮规巨利，驱丁夫兮日万簣。截地脉兮岫嵒陂，地脉伤兮庶命毙。吁攸暨兮察真戾，临荒僻兮开高睨。伸众志兮神君惠，惠泽流兮千百世。

时万历戊戌仲秋吉旦，乡民陈永福等立石

议修县北浮桥碑记

知县(南海)张守让撰

余视篆浮流，度兹津梁，则喟然叹曰：“舟且圯，不治则厉，是余责也。”用是核修费，得额租百斗，更捐城基之入，岁时金十八，可备兹役。乃率幕僚吴淳、陶德案庀材鸠工，且葺且创，迄三载行有绪。爰著为议：舟凡三十四，按兹费，岁可新者六，可葺者十，二三年中宜可迭葺不圯，六年则舟可尽新。递新递葺，毋俾废坠，庶舟、梁不毁而人利济乎！谨识。

时万历己亥仲春立石

儒学义仓记

署教谕、举人(南海)杨上韬撰

南海张公治永之明年，辟耕桐、云龙、龙江三院，月旦集青襟课之。士习斌斌，业过弦诵声矣，而犹兀兀不休也。一日，揖诸博谋曰：“夫士操铅槧以修圣贤之业，其沉湛者，苦志寒檠；而弛跼不羁者，又耻问家人生产，以故士多贫。士贫而有司秦越之视，甚非所以崇化厉贤、开太平之理也。”于是，于殿东庠之左营室一楹，为义仓，捐资贮粟若干石。贫不能存者廩之，不能婚及丧葬者助之。敛散一听之学，有司不从中制焉。盖省文移核视之扰，期于径简可行，已复曰：“此沾沾者济几何？广大而流布之，则诸君子事也。”仍为劝，令自今以后，秩转者，补弟子员者，受饬者，隼而贡者、科者、甲者，各输粟有差。庶几哉穰穰，以无殍于出哉，法具永钞中。说者谓：“出途常赉，入途常嗇，不闻漏卮乎？则公之法将无穷。”余应之曰：“不然，以法劝者穷，以法法劝者通。语有之：‘人无所不至，惟天不容伪。’天之所激，豚鱼犹孚，况人乎？”余睹公治永，兴修百废，几罄橐装，其不倦施而好行德，真足销人鄙嗇之心。而凄惋悲鸣，见于山隍之祷，风鸦之记，又足感泣鬼神。至如禁馈遗，勤农桑，语语呕心，直如慈母之字婴儿，百世而下，读永

政一书，犹愀然想见其为人，心折意倾，而不爱发肤、手足以从之也。

昔汉武表卜式以风海内，而民莫应，至区区一倪宽之义，牛车儋负，縲属不绝者，何也？虚号难招，而真诚能动物也。永留川盘郁纡回，庞洪未散，宁无节侠之士焚薛券、渺故人麦者乎？宁无汉循良如文翁、仲谋、任延其人者乎？夫事患无以倡之耳，以义倡者未有以利汉者也。《诗》曰：“高山仰止，景行行止。”公恺悌作人，谆谆恳到，有不闻风兴起者，非夫也。余嘉公之义，望后之君子恢张盛美，无令公独专义声。则兹举也，食人者不苦于继，而乐为施；食于人者，不知其来，而忘为德。士有所借以为善；人兢于劝以成仁里，即称天地不涸之藏可也，造永岂浅浅哉！

万历己亥仲春旦，训导倪宗禹、裴应试同立石

重建邑东马陵桥记

(邑人)知州萧时中撰

夫治世之政，岂必輿金辇宝以为民惠哉？因其欲而与之聚之，因其患而与之丢之，因其废坠而与之修举。兴起之要，皆顺时乘便，察民情所向背而行之耳矣。

邑之东为小涧，水涸也曾不容舟，水之涨也望洋千里，故有桥以通利涉。未建邑之先，先有兹桥，匪若西、北二桥造于创邑后也。然北桥余见其再易新耳，西桥余见其三易新耳，兹桥则嘉靖初乡先达三峰林先生倡首修理，余时尚髫，距今又六十余年，岁久积坏，往来者莫不危惧。值万历己亥，西桥易而焕然一新，士庶无不颂我侯之绩，为永邑之永赖不衰。乃坊民赖志等复请于侯，乃度时乘会，议举任事公勤者若张天灿等掌其事。侯首捐俸为倡，嘱之曰：“岁久毁坏，可修则修，不则更创，慎毋惜一时之劳，而遗久远之逸也。”于是阅视其详，还报。爰鸠工于七月，阅腊月而落成。巍然轮奂，视昔改观。侯喜其劝相之勤，成功之速，乃益资以助。

灿等念侯功德之在民者不可忘，且诸大事不可无记，于是请言于斗阳萧子。萧子曰：事关众者，难于独集，且难于速成。是桥也，构于永乐，迄今馀三百年，中更修葺凡几，第以工费不资，仅仅修补，不至圯败而已。乃今我侯心切为民、为事，请之而即合，举之而即成。又得任事者公勤不贰，以故众情响应，幽明交孚，正所谓时事之便也。其成之速，不亦宜乎？抑尤有感焉。忆余髫至今，洪水数溢，此桥几欲毁而复全，非有神以默相然乎？然能使水之弗毁，而不能使桥之更新，非我侯积信劳民，先以率众，安能令民之信从，以成有兹桥？《传》曰：“乐只君子，民之父母。”盖神尊也，父母亲也，幽之当严，明之可恃。由兹桥也，当知所以敬慎弗忘哉。是为记。

皇明万历庚子仲春吉旦

桥首余麟、张天灿、赖万绎、吴与敬率众立石

张侯新建云龙书院记

修撰翁正春撰

延津史溪之上流有贡川焉，固截然永安之藩蔽也。大都生齿不下数万，人文甲于邑中，宋大儒了斋之桑梓在焉。堡筑自肃皇帝之辛酉岁，历有巡司、守御司无居，葺葺一官陆沉。都人恤之，谋治其舍于公署之左空地。继典是职而来者，往往矫令滋扰郡邑。核其状，知为大蠹，不裁其官不可也。坐是，司舍颓圯犹空地矣。

今皇上丁酉岁，县大夫张君领县事，巡行堡内，见其山川嶙峋，其人笃于古而质有其内。一旦，进诸士谓曰：“此中故称名贤梓里，以科目显者，夫既以节义著声矣。今士独扼于科目，何耶？岂其干将、莫邪不可以试，母亦用力之不专、弹射之无素欤？吾守土亦与有责焉。”遂不难捐资，鸠工程材，于久废之司舍而创书院。院成，张君题之曰“云龙书院”。冀为诸士庆遭逢，而吐气扬眉于此际也。令诸士肄业其中，殚心陶铸。仍于堡内公课，昔属之乾没者，设为定制，入之院以资会膳，盖两载于兹矣。

诸士欣然铭佩，相与模其像而俎豆焉。赖生尊贤、李生中桂、赖生希颜特驰状走币，具张君之廉于官、爱于士、誉于朝、戴于野、载之牒甚悉，且曰：“愿请名公言，以勒之石。”余曰：有司之养士，犹之农圃然。时耕而耕，时耨而耨，时获而获，善养故也。降水为溢，嘉谷不生；疾风振之，嘉树不殖。今之养士者，视其官如传舍，汲汲然取焦赫之名，猎延揽之誉，譬之掘苗，为害滋甚，况且为政不废吐屋搜罗。若以笼络徂许为旦夕可毕吾事，恶足为善养也？张君之造士，教之必因其材，会之必择其地，曲意责成，何难速效，殆深于善养之道矣。昔人谓鲁人陟岱岳必先东山，吴人涉沧溟必先震泽，由观法近也。诸士羹墙张君，是必举张君之廉于官、爱于士、誉于朝、戴于野者，观法之审矣。自是而得售于时也。以君之廉，廉于官；以君之爱，爱于士；以君之誉，誉于朝；以君之戴，戴于野，国家将有赖焉。夫非东山、震泽之谓欤！余谓是院之成，育士也，乃所以育天下也。《易》曰：“养贤及民。”则斯院顾不大哉？方今圣天子德象重华，道称六合，诸士云蒸霞变，润色鸿业，正惟其时。虽然，亦士之自养何如耳。良田无晚岁，膏泽多丰年，此县大夫意也。余不佞，特载笔为诸士申之。张君讳守让，号呐铭，庚午乡进士，南海人。

时万历己亥孟秋。门人杨名显、严九龄、杨名弟、赖尊贤、赖希颜、杨如林、叶联第、刘晴奎、叶春震、林璜、赖敬贤、赖希扑、严学光、刘芳、罗胤亨、李中桂、

叶必正、赖如楨、林日森、严一槐、叶春阳、严九岳、林音、夏彦、严九穗、儒士刘延第、姜颐祥、邓继光、张友颜等立石

寺僧减饷祛蠹记

都御史陈省撰

潭上游邑曰永安县，盖所隶新创邑也。邑有寺，寺各有田粮，大小不一。住持僧主之，照合境输赋役，若编氓，亡隆杀焉。方治平世，诸寺院号殷盛，名利民田饷诚有不如。

自嘉靖间，岛寇倡乱，议以寺租充兵食饷，诸寺观始困耳。万历以来稍靖，诉诸当道，幸一少休。则委官按各郡邑清核其数，于中稍减，独潭郡及永邑未蒙减例。郡僧曰：“派则不一，委官之不靖也，胥徒之作诟也。”合而诉诸上。咸是先入之言而莫之信也，三诉而三不直。时永安宰张大夫曰：“一邑之政，孰非令所当求其是；一民失所，孰非令所当置其安。况僧住吾土，则吾氓也，可令其所失乎？”于是悉心详辨，盖数往复，然后得白，岁可免五十余金。大夫喜语诸僧曰：“兹而后庶几其少苏乎？”先是，僧极疲困，实以前僧多为豪猾，佥典寺租剥削，至数传不休；比征饷急，则又称贷取盈用益困。侯为榜，戒诸豪毋侵剥，间有告者辄为直之。于是豪右屏绝，诸僧稍是宁处矣。

诸僧曰：“今而后，知我侯之意非浅鲜也，兹僧辈一时之幸，一时之知感恩也。继此，孰知我侯苦心若是乎？”于是，僧真明、僧如规皆福之长乐籍，乃相与请南台东山馆，叩首请于幼溪曰：“某所主持，邑长令有惠利及于僧辈者如此，其用心之勤，恐后来莫之知感也，欲借重巨公惠一言以垂诸久。恃同邑，敢以请。”幼溪曰：“余素喜谈吏治，尤喜嘉赏羔羊素丝之节。彼邑来者，每向余语大夫洁廉孤高之操，亶亶不绝口，余所乐闻而不倦者。”遂删次其来请之词以与之。

严禁安沙开炉记

知县何宗圣撰

安沙离城八十里，其俗尚节义，其人事、诗书，闽中称善地云。迩来皃几氏嗜利罔忌，谋于其地关岩、小苔溪取矿煽铁。众哗然，赴上诉焉。上以其害民，特下令禁之，而众又请予文记焉。予曰：以若所言，深得思患预防之义矣。盖君子举动，必早计于利、害之间。有利无害即行之，不遗余力也可；有害无利即止之，不俟终日也可。铁炉者，见其害未见其利者也。何者？炉一而行，集众数百，其来如集膻之蝇，弗待召也；其悍如负嵎之虎，未易驱也。利耶？害耶？安得泄泄然视之，而徐徐然逐之耶？予昔入境时，滌头山铅坑被人盗掘，凡两粤之亡命、异处之优人，日

咸集焉。识者忧其乱在旦夕间矣。自将为首下诏狱，而不逞之徒始鸟兽散。此前之所经，弗早图几至于败坏；今赖早禁之，后即有嗜利者，亦胁息而不敢动。真得思患预防之义哉！且不徒防患已也。扶兴之气无轻泄，则酝酿之厚重为人钟。尝观嵩岳矣。嵩岳之中何物不储？然未闻古开之者。故含毓发越之奇生，“申及甫，维周之翰”，有以哉！安沙之山灵，尔曹不欲人轻泄，则储秀孕精。而且令节义之士垂名两间，无以波流茅靡易也；而且令诗书之儒竖业千载，宁以电光石火限也！此造化一定之理也，又何难与嵩岳并传哉？谨记，以告后之留心爱民者。

刘侯立田兴水利记

(晋江)蒋德撰

剑南之属邑同永安，为上游名区，其发脉自南，郡峰排戟多像火星。设县初，激东溪之水开圳，由北入铁甲局而下，开沟屈曲至南城，外作方池，当中以注水。据形家坎离制伏之说，则以疏地脉，奠民居，意义亦渊以远矣。先是，设水夫一名，岁支工食银四两二钱，凡补铲疏浚，于是乎属之。百余年，灾眚不作，民有宁宇，况以汲、以盥、以耕、以耨，皆食其余润，利亦溥哉。

万历末年，有汰役之令，而水夫坐免，圳渠竟为涸辙。民是用恐，近屡议复，然工食无所出，即多方挪移，倏更倏废，与筑室道旁等耳。邑侯刘公莅兹土，辄咨利病，父老上其状，公毅然曰：“此吾责也！”徒令有司捐俸，则乘舆济人，惠而难为继也；即挪移别项，则又剜肉医疮，暂而不可久也。乃悉心参酌，永画可行，初终毋改者，著为令。先捐俸十两，为士民倡，而士民胥踊跃奔命，各出金、钱两等，分购(原文为“赔”，按文意应为“购”，“赔”为“购”之误。)东门外等处谷田七石，并新架亭屋二间，计其入可供水夫每岁工食而止。刻期竣事，而水道洋溢如建瓴、如赴壑，合邑举手加额，不啻阜之霖而渴之浆也，于都休哉！由兹以往，民安物阜，公之泽当与县治相终始(原文为“相终如”，“如”为“始”之误。)，利赖无穷矣。

政有行之一日，而可要之百年者，善其始也。抑公之亟拯民艰，不特此也。如苏采木之疲役，捐天斗之逋租，反复条陈，为民请命，若流贾生之涕，而进郑侠为图。凡所规画，无不身视民，家视邑，则其再造于永者，宁有既乎？侯讳胤，字祚之，别号洞阳，江西南昌人，乙卯科进士。董率则邑佐李春华，邑幕陈继荣，走币嘱余记文，则学博汪太期、揭弘济，庠生吴绪尧、林修己；首事耆民陈所闻、刘仁泽、张天英、郑以恭、陈鼎铭皆服劳役，并勒诸石。

重建永安县治堂记

知县事刘胤撰

景皇帝之三年，设永安县，迄今近二百岁。治堂欹久，前县俱有志未逮。余自壬申夏拜命兹邑，修举废坠者夥，堂独后之，非敢传舍视，亦虑不资耳。

然年复一年，环视榱栋，如蠹如线，有立挠象，咨询輿情，咸称万不容缓，繫岂异人任耶。爰率倡金，并就采，供海务，助道府，剩木付工师，卜吉于乙亥腊月八日昧爽，北向稽首，以告经始。其高下广狭惟旧度是仍。迄除夕日而梁栋跂，献岁五月而轮奂美，何不日成之若是哉？《诗》曰：“庶民攻之。”又曰：“勿亟子来。”我永有焉，是以弗胜瞽鼓，而金钱无糜，约计费金九十有奇。

堂既落成，栋隆有吉。君子跻，小民駢，亦二百年来之旷举也。用是纪其事，知是堂鼎新之岁月与创构之节，受以时焉耳。时同寅少尹吴君讳凤起、邑幕张君讳维璧得并书。坊里爱上，急公吏书，勤督省费，其劳并著。

崇祯九年丙子岁孟秋月吉旦

坊里王之祯、欧王兴，吏罗一文、饶观德、庄仲标

文昌、武曲两桥碑文

罗明祖撰

嘉靖丙辰之岁端阳月涨，石桥毁。崇祯癸酉之岁端阳月乙亥日告竣，仍也。维时合邑之荐绅寿俊僉呈有司之长，报可。用牲一、豕一、牢一，虔祷于天地、山川、上下神祇已，冶人锻铁，木人庀材，石人伐石，舟人载具，星人卜日，地人审址，始于癸酉岁之七月二十有二日，以迄今日，不诚而孚，不瞽而劝，不扶而强，不肃而成。南山之树，北山之殖，云沓雾集，鳩以俟材。其材也予之，其不材也弛之。上有攸给，下有攸足，民逸其居，工为其能。墩共二十有二，二十之二既如其数，江渚之间绵亘如虹。募僧僧照明跪而请，应请者翕然。祇先以为輿望者，庄氏贞其人也。贞偕众不敢有其功，僉曰：“不有刘侯，其克济乎？”而侯顾乃寮而揖之，曰：“凡幕侯吴公、张公及庠师林公、顾公与有力焉。”既而永安之属乡贡川如之。

君子曰：仁之廓也如是夫！侯一人而二桥举，无以异也，风之也。侯姓刘，讳胤，号洞阳，江西南昌人；吴公讳凤起，号视衢，江西余干人；张公讳维璧，号异度，湖广安陆人；庠师姓林，讳尚春，本省晋江人；顾公讳思义，号质庵，亦本省永福人；孝廉陈君行忠，字靖此；赖君圣谟，字次典；恩贡赖君敏行，字体健；邓君应熹，字遵朱，皆本邑首事者也。

铭曰：“爽哉永邦，厥水燕江。龟山中峙，津不可杠。石桥复竣，道无虞泽。父母通矣，肤公有双。”

又文

(南昌)刘胤撰

永安县踞剑潭之上游，其治形胜，为燕江二水襟带。东南联漳、泉，西北可通粤，盖要区也。先是，建大桥于二水间，长虹翼然，以往来冠盖行旅，且堪輿家为北辰关锁，邑之巨镇。嘉靖丙辰，河伯告灾，仅留一二墩而已。邑中每复议建，然而随议随罢者，以金钱之靡费甚奢，而愿力之任让难齐也，徙倚至今。

余以壬申初夏受命以长兹土。甫下车，其乡绅、父老、群子弟以复建北桥为请，为万世利。余维时逊谢不遑，自顾绵力，宁堪此哉？更相率而前，曰：“非侯弗能以就绪大功也。”余于是自念曰，此不可以法令强民也。即捐白镪一百两为倡。以身先之，当必有好义之众环而应焉。其孝廉陈君行忠、赖君圣谟及义民邓冀良、庄贞等首任其事。复分举各坊之持正无染指者若而人，仍递为首，合参舆论，定间(原文为“间左”，“间”为“间”之误。)左之族，资产饶差，以为输助之多寡，相维相督，人乐从也。諏吉狸沉，以祭山林川泽。其镪自家帑以至于公，相属也；其土石、甃木自郊关以至四方，相属也。木取其修伟者，石取其贞润者，甃取其坚致者。载逾年而二桥成。余题以“文昌”、“武曲”，翼然倍壮丽于昔矣。

迨落成，其乡绅、父老、郡子弟归德于余，余顾安敢！然恒考古《周礼》，司险一职掌九州之图，以周知其山林、川泽之阻，而达其道路，则此亦守土之急任也，要亦近百年以来不偶之机缘也。母亦唯是。永安踞上游之形胜，旺气首钟，竟此时此地灵长发，适逢其际也乎哉。则余借以兴万世之利，端不朽矣。时共襄是举，则少尹吴公起凤、莲幕张公维璧、博士林君尚春、顾公思义，例得并书。

邑侯刘重建城隍庙记

(晋江)黄景昉撰

凡抚有一方者，皆事神以为民，因率民以祀神，则以捍御奠安，惟神是依，非其有功德于民者不与焉。我国家庙制，各省直郡邑必崇祀城隍于郭内，以弼阴教，示与民迓而亲，亦威而尊也。上游永安城隍庙在县治之左，几二百载犹仍其旧，虽历有修者，大都涂饰其外，而中之朽蠹实多。迄至今，并中外俱圯矣。当事者屡议修，费以数百计，率苦难之，匪直不能为，亦不敢为也。将母神有余恫，民怀依戚乎？

邑侯刘公牧兹土(原文为“牧兹上”，“上”为“土”之误。)，留心振刷，有废必兴。如葺学宫、疏水道、建津梁，皆先出俸钱为士民倡，永邑改观若再造然。独斯庙倾颓，父老以重费之后，母或齿及。公每朔望至，辄咨嗟太息，进父老语之曰：“治民事神，有司责也。吾所兴作，凡以为民，乃民力普存，而神栖弗庇，其曷以

明报？吾悉尽捐吾禄，以毕吾责。若等其各图，以竣斯役可焉。”会当覲行，随发俸金一百十两，择耆民与坊民中之敦敏晓练者董其事。手书募簿，温语谕众。众益感激，相与竭蹶奔命。鸠工程材，昕夕靡有斁念。公覲旋，复议扩基，倍加宏敞。先是，内宫湫隘，则赎故址翼以夹室；四围逼促，则辟隙地环以墙垣。庙堂前后左口爽垲巨丽，焕然一新矣。总其费约五百两有奇。经始于癸酉年腊月六日，落成于甲戌年腊月廿七日。

父老动珉纪绩，驰介问记于余，因为之辄然。私谓：弹丸之区，诸费孔棘，公何以一倡百和，举前人之不能为、与不敢为者而优为之耶？公精忠纯孝，为国为民，肫挚一念，上可格苍穹，下可孚豚鱼，是以气志相感，神人交应，其成以不日，良非偶矣。由此捍御奠安，垂庥(原文“垂庥”，乃“垂庥”之误。)百里，世世且嘉赖之，宁惟是，壮一时之美观也欤哉！公讳胤，字祚之，别号洞阳，乙卯科进士，江西南昌人。首事督理耆老陈世用、邓继禹，坊民童一理、张天英、冯瑜、张传洁等有功于庙，例当并登诸石。

崇祯七年岁次甲戌仲冬月谷旦立

郡佐司马黄公平寇生祠记

(邑人)诸生曾省撰

夫子民者，使人望而畏之，私则议焉，曰“未可”。来而慕之，去则已焉，曰“未可”。至望之如神明，而私则父母戚之来之；若子弟而去，则涕泣随之，甚而沐浴之，歌咏(原文“歌味”，乃“歌咏”之误。)之不已，而谋所以祀之也，其为功烈于民，复何如耶？语曰：“前哲令德，典祀及之。”郡佐黄公有焉。

甲申未变，海内震动，黔、赤流离，秦、楚、燕、赵间为毒益甚。于时，兵军夜呼，野无居人，即有贤良异能之司，且束手无从。然则，若之何而可？曰：“有黄司马任，若闽可安枕矣。”方公之佐剑南时也，修礼教，治军旅，公徭役，清犴狴，通邑大都，咸闻异绩。若者，为公政教之一斑也。居无何去。冬有十月，适治僻陋有蜂聚窃发者掠居民，焚谷帛，逼屯我边陲，蹂躏我土地，屠戮我人民，铙角声闻，男女交恐。当此，既不可以文令，又不可以武竞，安得一二大吏能处兹文武之间者，受命抚师以往。于是上僉曰“黄司马”，下僉曰“黄司马”，而公则岸然拜命而御兹土也。既则毅然视篆而福兹土，厥所为平心和德，表见于俗者，荐绅先生悉能言之。不宁唯是。以公初莅永时，盗势充斥深崖穷谷，食害其横。公乃集士民，策战守，日夜骑走城上，互相察觉。勤则优之，怠则舞之，不蒲鞭以示盛；而民尊不令告，以示信而民亲，故永僻弹丸获恙者，公之力也。

今春盗少止，公虑民之离散糊口四方者众，系彼苗黍实为民天，无以垦之，是谓荒

天，遂星驾出说于田。于时，虎符、熊幡、朱输、帛盖，遥望马前，角首地下者，实繁有徒。俄讯之，则昔之蜂聚窃发者若而人，流涕丐公为招抚之请。斯时，剑戟遮道，哄声振野。公则端容肃体，既叱其无状，复悯其顽昏，词旨婉约温厚，辑绎如越石。登楼长啸，盗众闻之，各相泣掩面，愿乞归田者，愿死王事者。公乃一一为排解，散金粟以给，于是，村落得安堵，渐业田桑。夫初则猖獗，而卒安全之，终则穷败而复悯抚之，以公之才之能，又岂在王、郭之下哉。宜夫直指表章天阙，如“ 闾阎沾湛，行伍风清 ” 等语，又乌足概公？此士民愿乞为永安主人者，今竟不能也。公行矣，斯父母戚之不得，泣涕随之不能，沐浴歌咏之不尽。无已，则决所谋以祀之。

夫在祀与为民御大灾，捍大患，则祀之，非是弗与。今公不啻(原文脱“ 啻 ” 字。)他是，所谓起生灵于既燹之余，斯为功烈，尚可区豆耶？虽然，金石之咏，来者所观。大人君子，未常急于身后，而实之既立，名必随焉。欲无获誉，将为辟之，则百姓之公也，其何辞省也。小子经生安能补公索美名，以所闻所传俱无异词，爰约略行绩，以应绢户之请，将使登斯堂者，履其姓字而形容。若其可图，则景仰而歌慕之者，岂独兹一人也哉！公讳一铎，号滚思，江南徽州人，乡进士。

卷十题咏

游公佥宪按临永安县有感而作

昨自龙岩过永安，小民历历诉艰难。

山深岚障愁多病，地罕田庐恨少宽。

杼轴不胜豪横剑，桑麻莫御岁时寒。

兹行正是观风化，闻此能无愧素餐。

宪副罗公按临永安县勉诸生作

暑雨初停溪涨落，乡村农务正纷纭。

挥镰麦垅收黄阵，跃马秧田蒔绿云。

彩燕巢成泥寂寂，水蚕茧熟柘欣欣。

风光流转不相待，希圣希贤可厌勤？

佥宪杨公按临永安县有感而作

观风远到永安城，灵雨连宵未得晴。

泽被花封桑柘盛，水流沟洫稻秧生。

隰原馐妇无愁叹，里巷儿童有颂声。

莫讶随车春事足，雨岐举戴使君名。

燕江十景

知县(邑人)林孜

凤山凝翠

高冈突兀留遗迹，胜地逶迤献瑞形。传谷声音宣盛治，回峰羽翼舞虞庭。

梧桐蓁蓁千年碧，竹实森森四季青。

遥祝梵宫清玉珮，萧韶乐奏应和鸣。

又

灵鸟呈形瑞气钟，何年降影入龕嵒。

至今草木多佳润，翠竹苍梧不改容。

燕水交流

昔曾遗卵生商室，续却分形落此江。

两派合来同羽振，中流分下肖尻降。

洲衔晓月梁悬垒，岸拍春涛泥坠缸。

四面诗坛连近地，千年胜概溢中邦。

又

不穿帘幕不将雏，只影飞飞落鉴湖。

化作清江载佳景，从今不慕辋川图。

三峰凤翥

森森玉笋峙平原，碍日凌风万古存。

瞻眺尽知称砥柱，跻攀端不让高崑。

神仙择胜曾频憩，灵鸟呈祥亦暂蹲。

自此人文钟秀气，不生嘉植降魁元。

又

两峰如髻一峰低，娲石当年炼未齐。

一自九苞翔仞后，人人相继蹑丹梯。

九曲龙潜

(已废，诗不载)

东山朝旭

高原雄据邑城东，上有清轩曲磴通。

近市晨烟凝欲散，平林宿露淡还浓。

青皇专主长分绿，白翠微浮已射红。

日上海云同紫翠，楼台鼓角几千重。

又

郭中震位有名山，登眺那知近闾閻。

莫道地灵鸡叫早，金乌飞影到林间。

西竺夕阳

(已废，诗亦不载)

莲崖秀峙

匪红匪白是青莲，凿削真形罩晓烟。

香案每临天上吏，翠屏常对洞中仙。

濂溪乐道称君子，李白豪吟费锦笺。

千载寂寥今有主，山房长望华峰巅。

又

太华分来一段奇，青天削出翠英姿。

乾坤许我频相倚，会有仙人来奕棋。

石壁寒潭

奇石如屏天琢成，寒漪围绕玉华清。

渊澄彻底琉璃碧，壁立凌空帷幕撑。

苔藓不侵蜗篆古，蛟螭深伏鉴光平。

几回短棹吹横笛，(原文漏“吹”字。)飒飒凉飈肃气生。

又

铁壁峨峨障水南，云根削落镜光涵。

婵娟倒浸深千尺，引得骊龙出九潭。

长虹锁渡

遥讶雌雄垂蟒螭，近观结构有舆梁。

涛翻渡口双龙跃，日映江心万柱光。

步履不须扶醉病，登临真足任徜徉。

千年传诵济川绩，铁索空教贯巨航。

又

西北虹霓跨水涯，风烟楼阁倚云遮。

行人闯闯晴空上，渡口孤舟尽日斜。

两塔撑天

南北摩云双玉笋，晨昏对日两金戈。

香烟缥缈藤萝上，经卷封藏猿狖窠。

轮影平明侵碧汉，铎声清夜响鸣珂。

平原遥望应千尺，青鸟回翔不敢过。

又

双瞻玉笏插青霄，南北联云一样高。

只道去天才咫尺，晨昏执立敢辞劳？

贡川八景

慧照禅林

都给事中(沙阳)官荣

贡川名利古丛林，楼阁玲珑仙界深。

禅榻昼分尘鞅少，法堂时听梵钟音。

黄昏翠竹供吟趣，绿水青山惬赏心。

自愧俗缘抛未得，那知长此共追寻。

又

侍郎(将乐)黄琛

丈室蒲围绝点埃，神心已定俗心灰。

慧灯照影泥粘絮，止水涵空镜离台。

石砌雨晴苔藓合，小池风暖白莲开。

年来忝结东林社，策杖寻幽日几回。

佛阁临津

凌虚高瞰俯清溪，乘兴登临思欲迷。

满眼烟波堪入画，无边光景任标题。

水连山色秋光好，天外钟声月影低。

历览山川观玩处，浑如移步上天梯。

梵阁辉煌跨彩霓，嵯峨上与碧云齐。

平临一水诸天净，远带双峰众树低。

篆袅炉烟僧入定，窗涵风月客留题。

宦游爱此时登览，也似忘情过虎溪。

双峰晴雪

官荣

六霁汗漫舞瑶空，晚霁双峰半未融。

危顶当阳清已液，阴崖著树白如□。

剡溪不见乘舟客，灞岸应无策蹇翁。

自是三农欣击壤，预知来处必年丰。

五港春涛

正源浩浩涨溪来，石坎中分五港开。

溅沫当空翻瑞雪，怒涛终日吼狂雷。

行人只解津头望，画史那堪笔上猜。

借问滔滔向东去，年光流尽几时回？

云起象峰

名峰如象绕溪滨，高处岿峩起白云。

磅礴树阴尝暗淡，霏澄潭影结氤氲。

浮空曾见楼台叠，行雨应教士庶欣。

嗟我久违亲舍远，几回瞻怅思纷然。

雨飞龙水

曾闻一雨度晴岚，云是神龙出碧潭。

圣水至今飞未断，井田随处润均覃。

濯缨去垢因好洁，洗耳逃名靡不堪。

几欲投闲同俊彦，策筇历览也何惭。

岩挂清泉

灵岩横绝卓危巔，中有清泉万丈悬。

触地喧流翻雪浪，引源分派荫桑田。

朝看爽气侵怀里，夜听寒声落枕边。

闻道禅师安息处，至今遗迹尚相传。

峰环翠竹

列嶂环回耸碧岑，万竿修竹长森森。

月笼琐碎筛金影，风度琮琤戛玉音。

劲直不更桃李态，扶疏端守岁寒心。

好同晋代嵇康辈，遣兴于今共笑吟。

题拈桐山

拈桐一境群山宗，吾爱此地常从容。

乾坤秀气才一簇，璧玉削出十数峰。
翠崒峭直耸秋汉，爽气晓刷烟霞浓。
巅顶灵岩停今古，偃蹇常有千年松。
心疑此非尘凡地，造化岂肯有凡庸。
有洞可游真仙子，有水定如蟠神龙。
奕棋弯弓与骤马，至今果有神仙踪。
溪光澄彻清无底，水声容蓄秋溶溶。
此间胜游不可穷，往往藏在幽僻中。
鬼神蔽获不敢露，似恐俗眼窥天工。
可惜此地今寂然，未遇昔日林门贤。
一亩可耕谷口田，一竿可钓山河渊。
天子不能使北面，王侯不敢齐其肩。
栖栖抱道岩石下，此人终为万人传。
桐庐若无严子陵，安得此名千万年！

又

〔宋〕丞相李纲

枌桐百里远沙溪，水□称为小武夷。
列岫笼烟红削玉，澄潭浸月碧生漪。
猿猱饮水联修臂，樛木连云拥老枝。
天下幽奇多僻壤，直疑造化恶人知。

又

(邑人)陈偁

名蓝依净境，风物倍精神。翠巘藏仙迹，寒潭绝世尘。
岭猿吟岁月，山鸟语留人。拟学栖真客，林泉老此身。

又

(邑人)陈颜

栟榈古僧寺，松竹冷萧萧。山耸狮昂鼻，溪横龙转腰。
珠帘垂石壁，天柱插云霄。应是仙都府，疑为路匪遥。

栟榈山景

降仙台

昔日神仙到此台，台前踪迹绝尘埃。
清风明月空遐想，妙节幢幡去不回。

马埵石

高高峰顶坦然平，传说神仙走马行。
踪迹至今犹在目，人间无路问长生。

烂柯石

对面神仙坐白云，当时事迹至今闻。
斧柯可惜空传朽，局内输赢犹未分。

射垛峰

传说神仙事可疑，更将弧矢习威仪。

想因溪上崔嵬石，还见当年中的时。

狮子峰

远瞰威仪若虎蹲，分明盘踞近祇园。

往来百兽徒惊慑，不测陶熔造化源。

天柱峰

突兀巍然气象清，擎天因此得佳名。

游人若到高高处，宛若蓬莱顶上行。

小门石

峭壁悬崖小径通，门前有路到真空。

游人顿觉尘嚣息，更在清风明月中。

石龟岩

石块鲜鳞类甲虫，岩墟端的有遗踪。

方今四海干戈息，不用剜钻卜吉凶。

养素庵

昔人养素已成丹，尚有灵龟在此间。

若问长生深到处，白云明月古来闲。

接仙桥

限若横空类跨桥，个中有路透云霄。

上元阿母朝真去，腾踏苍龙意气骄。

集仙岩

闻说仙踪集此岩，火铃风佩两骖骖。

不知座上当年事，较论仙经第几函。

步云台

台前水碧风初定，台上云收雨乍晴。

行客舣舟台下宿，月明时有步虚声。

栟榈踏沙行词

山巘琅玕，溪横绿玉，樵歌声断渔歌续。石屏风隐读书岩，算只少武夷一曲。贝叶伊蒲，黄花翠竹，老僧受用清闲福。任他二十四中书，止一觉黄梁梦熟。

黄杨岩

邓肃

石壁巉岩惊鬼划，异草幽花锁春色。

群山迢迢不能高，突兀独磨霄汉碧。

芒鞋千尺上崔嵬，手摘星辰脚底雷。

拨破烟云得洞户，醉眼恐是天门开。

入门嵯峨森碧玉，冷香吹面天香馥。

箕踞胡床挥麈尾，万指未充空洞腹。

我因避地访名山，扁舟夜渡沙溪寒。

辛勤博此一笑喜，大半犹在水云间。

猛将今无三角虎，狐狸昼号鳅鳢舞。

灵岩知有老龙潜，挽出人间作霖雨。

游黄杨岩

陈世卿

朔风夜号空，千隅几枝□。深山自春色，芳草不凋绿。
朋来得进游，招提藏翠麓。新酒赤如丹，竹萌肥胜肉。
一醉出门去，缺月挂修竹。归路沙溪浅，危桥溅寒玉。
夜过渭滨居，门庭应不俗。对座寂无言，泉声如击筑。
宗明更可人，相邀勤秉烛。开缄得捷音，豺狼俱面北。
回櫂今可矣，当心嗟未足。西去有奇岩，祥云覆华屋。
箕踞列千人，未克空洞腹。更约林宗俱，来伴白云宿。
枌桐奇岩，甲于诸郡，主寺僧文易俾书一纸，
揭之堂隅，以为诸君子引玉之媒云

林孜

燕水之北贡川南，枌桐岩石环清潭。
亭亭芙蓉削千尺，苍然缥质云霄参。
前后左右如人立，各有芳名占称什。
日临水面耀金盘，月出潭心浮玉璧。
咫尺之外霹雳滩，龙门天堑舟人寒。
回看此境真图画，雁荡武夷堪并观。
自从开辟赋形色，流落人寰千万祀。
经更朝代至皇明，沧海桑田任迁革。

坤灵久秘寂若无，景泰之初河山图。
经营县治风气盛，人文勃勃名上都。
巨石捍门称北钥，一方镇定资华岳。
中有禅林古道场，名贤对峙席嘉号。
忝我称为地主人，因循岁月将六旬。
混挹丹青谬题品，鼓枻频过情已亲。
醉来击破铁如意，明月清风旧相契。
老僧复邀历中峰，羽化飘飘若遗世。
朗风玄圃居群仙，铿锵仙乐聆钧天。
笑迎示我瑶华句，属和愧答归来篇。
俚词不入仙人耳，镌刻徒为百世俟。
猿鹤蛟龙应护持，蜗涎苔藓无侵饵。

大湖八景

镜湖秋月

娟娟素魄半空悬，倒蘸平湖一镜天。
光漾清波银练净，风生细浪玉花圆。
雁警霜冷栖寒渚，龙误珠吞起碧渊。
爽溢吟襟诗逸兴，宵中转影到帘前。

屏嶂朝阳

巍然宝嶂自天开，咫尺应看近上台。

云敛层巔升旭日，霧開和氣藹春台。

重重采綉霞光爛，嘒嘒和鳴鳳瑞來。

千古書屏青疊疊，品題爭得謫仙才。

桃源活水

尋幽遠遠入山隈，照面桃花隔岸開。

方朔昔年偷顆去，漁郎何代問津回。

一灣漱玉涵春色，兩岸清流長翠苔。

試問源頭在何處？洞門雲下混將來。

梅嶺層巒

幽村村外擁層巒，梅嶺如階踞地蟠。

幾樹孤高凌頂上，數重青翠接雲端。

烟枝帶雪连云鎖，玉葉漫山和月寒。

人道江南春信早，嶺頭先得一枝看。

擎天雨霁

雨過前峰作霽天，擎天霽色出層巔。

鳥飛海上金流彩，雲亂風中白散綿。

高下林花分潤色，輕盈堤柳驪晴烟。

我來意欲梯危磴，摘斗扞星霄漢邊。

高隱雪晴

茅屋青山隱者家，田園隨分度年華。

回头又了三秋历，触目俄看六出花。

有客观梅研易象，何人仗节在龙沙。

朝晴喜出黄棉袄，冷暖林泉亦可夸。

石洞寒泉

遨游石室觉心安，别是乾坤仔细看。

水自洞门流出冷，源通仙界本来宽。

奇岩怪石今犹古，甘露和风暑亦寒。

不羡浴沂归去咏，还来此地可盘桓。

乔木郊墟

森森古木色苍苍，葆翠凌霄接大方。

远到郊原开锦障，近遮墟市送风凉。

中藏柱国真梁栋，内隐行商贩物场。

信是溯源唐宋远，湖山端的是名乡。

题拱极楼(二律)

旧县令(姑苏榆溪)徐勋

十里溪山百尺楼，玉栏干外俯清流。

雨馀江阔城如浸，波撼光摇地若浮。

柳暗画桥春色老，日沉西溼晚霞收。

滕王阁上谁人记，景物何如此处悠。

又

城上高楼凌昊空，画檐虚敞碧云笼。

浊醪对景伤春暮，薄纈登高怯晚风。

锁渡石桥溪漠漠，排空山岭翠重重。

公馀到此销长日，北望思□餐也同。

题登云塔万玉轩(二律)

旧县令(姑苏剑泉)郭仁

郭外烟霞一径通，倚岩飞阁翠微中。

香花细落诸天净，锡仗如来万劫空。

八月冰壶兼吏隐，千家土鼓庆年丰。

秋风忽漫凌双舄，廊庙江湖梦想同。

又

直议干明主，孤身窜八闽。岭欹云欲堕，山合昼常暝。

问俗淳漓异，观风喜戚并。何时坐飞鹧，濯足锦江萍。

题高飞洗心亭

剑泉

羁栖金马客，憔悴白头吟。露泫江州泪，云流湘水心。

致玄谋似拙，官冷病犹禁。日暮春明路，秋风尘更深。

迎春日过永安，待赦先晚行遇雨(一律)

(淮南龙岩)卢泮

奉使驰驱过永安，一年佳节正开端。

皇恩雨露同时布，春色乾坤到处看。

问俗已知墟落静，官民还喜税徭宽。

漫言有脚阳和意，昨夜随车雨未干。

桃源洞口

(邑人)陈源湛

介破巉岩一涧流，探奇乘涨弄扁舟。

悬崖高削千寻玉，幽壑寒生六月秋。

点岫烟云闲去住，忘机鸥鸟自沉浮。

武陵人远桃空在，临眺踌躇意未休。

题枌桐走马岩

绝巘攀跻上，奇观入望来。浮云低岭树，远水带城隈。

物外尘嚣断，空中复道开。昆仑如可问，八骏欲登台。

枌桐书院

(邑人)罗明祖

先生形已往，庙貌尚巍然。正气峰为骨，孤里壑欲烟。

典型存草莽，俎豆自周旋。谁问登临石，永言花石篇。

经桃源洞坎壁间韵

司理(古吴)叶培恕

层崖破髓忽涓流，若倩渔郎来系舟。

山面初开图已古，春情未半气如秋。

人经悟后身同幻，境到幽时世觉浮。

谷口金门浑是寄，桃花尽处意俱休。

栟榈寺

县令(吴兴)陈廷枢

一湾坠石笼飞烟，削壁横空汉边。

虬龙蜿蜒含雨出，羽衣飘拂惹云还。

路于绝处微通鸟，山到穷时小有天。

半角僧囊闲补衲，层峦影入万花妍。

桃源洞

低压仙岩径，参差星列悬。危□偏雾锁，古碣半云牵。

翠滴嵯峨影，风横一线天。武陵旧不识，闲照夕阳边。

百丈崖

仙岩高百丈，未及一线天。古篆迷烟笼，萝云狎汉牵。

□帘空喷雨，抱竹带斜秋。暮霭悬崖争，幽光入兽渊。

珠帘洞

一帘风瑟雨潇潇，仄径遥封练白漻。

云来劣削珠影，指点迷离浣俗□。

桃源洞

(邑人)陈有忠

悬崖天削就，紫气绊烟萝。扣石幽机隐，循堤逸兴多。

秋声鸣涧壑，春意盎枝柯。怕有渔郎问，避秦来此呵。

百丈岩

扶节聊指点，阁与白云齐。乍听钧天奏，远亲紫树栖。

峦多山屈曲，石插路蒙翳。能勾神游入，仙都应上跻。

葛里先觉窝

蹶破仙源几处烟，偷闲剩得杖头钱。

层将怪树栖归鸟，万壑寒流调响泉。

读罢黄庭风弄竹，写成仙易月侵筵。

而今试问稚川子，丹灶飞时甚岁年？

修竹湾

天然幽景镌修竹，修就天然难更仆。

湛露偏多结远林，轻风漫戛摇空谷。

湾连曲曲恁萧疎，磴嶮层层饶笋矗。

中有奇观无尽观，洞天算此才六六。

栢榈寺

(邑人)曾省

山水有静理，每与幽人遇。曲幻杳冥间，是为佛灵寓。

古刹翳层阴，藓苔垂月露。秃树杂栢榈，山老名犹故。

旧代晋衣冠，所以烟霞具。岩腹咽钟言，荒碑眠疾鬼。

溪声湔泱来，危壑相吞吐。对之生远心，毋乃发沐浴。

桃源洞

拨云入洞来，洗却市尘俗。碧涧杂桃花，悬崖插笋玉。
非关鬼斧工，别自幻机轴。隔水问渔津，旧时胜几曲。

百丈岩

一水泠然出，危桥彼岸连。仙居传百丈，世界总三千。
崩依云末，嵯峨插汉边。如何人境外，憩此已忘年。

葛里仙掌岩

巨灵得意手，幻出此峰城。游客心多险，仙人掌自平。
断桥偷凤翅，绝壑锁雷声。个里幽奇处，虎头笔未成。

过桃源有怀李忠定公

(麻城)周邦翰

丞相宁忘宋，神仙偶避秦。涧淘千古恨，花老开时春。
避径牵云度，荒亭没雨新。隔林空响发，疑有烂柯人。

游栢桐登桃源洞绝顶

(三山)郭章

嵯峨绝巘拥苍穹，傍壁攀萝鸟道通。
十月朔风生涧底，半间虚阁在云中。
斜阳忽见晴江影，野寺遥闻隔水谿。
借问此来谁得趣，烟霞洞口一渔翁。

游修竹湾登紫云低

(三山)杨铉

上有巉崖下有溪，此中把酒吊冯夷。

帆归远浦连云转，花落澄潭带月漪。

芒屨惯穿千级磴，蕉衫时挂老松枝。

游忽喜高人至，为报山公是故知。

游桃源洞

(古绶)李含芳

数载神游到未能，已知仙迹久飞腾。

空馀桃树传名洞，尚有枯枝挂古藤。

峡窄云封天一线，峰高雾罩岭千层。

刘郎却忆当年事，源壑还教此日登。

游修竹湾

曲磴千层翠竹连，同人选胜欲依仙。

山根露锁疑无径，石窦云开别有天。

鸟度池边寒带影，风生树杪暗飞泉。

此君最爱堪療俗，醉卧峰头未许旋。

陈邑侯重修永志跋言

世之重文章起家者，谓以文章饰吏治为不朽事也，而于吏治为尤重。

父母陈侯，家学渊源，举进士，令吾永。永，蕞尔邑也，自寇变残毁，民之贸迁有无，征输偿欠者，计无复之，加之四郊多垒，旦暮警闻，尤难戡定。

侯甫下车，百废俱举，兴学校，课农桑，改饷仓，建公署，楼舍聿新，器械有备，募练乡勇，联络寨堡，举邢肇新等为之长。发综指示，协谋官兵，出辄奏绩。计其时有招而就抚者，有抗而蒙戮者，威惠并济，难以枚举。因而感德向风，事悉上听。乃簿书之余。进耆老而索邑志，则惘如也。前志版灾于寇，自邑令苏侯迄今，六十余年未入志者，又湮漫湮灭而不可考。侯毅然捐俸，重修辑之。访遗搜隐，必实有系朝野、裨风化者，为表章焉。三阅月，书成展卷。名宦高侯殉难，当宁优恤，赠金宪，予葬祭，荫一子入监读书，载在国乘，亦垂麻千古。至徐侯之发奸御暴，施侯之清讼格顽，凡有建置兴革者，不更胷若指掌乎！庄诵名贤，如严君海日夙著勤劳，罗君宣明学负宏博，且与邓栢桐诸君后先辉映焉。至闺阁之幽光，必阐闾巷之隐德；克彰义勇有录，移孝作忠，灾异有纪，省愆防患又有郑重也；下至山川、胜境都有名咏，侯亦裒而集之，不使草木隐辉，山灵閼色，非登高赋才，何以有此？古人云：“胸有万兵，乃能从容而折冲；腹有万卷，亦可造次而讲艺。”儒者帝臣，书生王佐，不其然乎？若然，则侯之重以文章起家，且以文章饰吏治为不朽事者，固有明征已。

顺治十年癸巳春王正月谷旦，治下晚生陈行忠谨撰